

خلطة عمري

سارة الذهبى



متوفر على جوجل بلاي

3

تطبيق مكتبة كتب مجانية على جوجل بلاي أكبر تطبيق للكتب في الوطن العربي وحصرها في يوميا كتب في بحث جوجل بلاي مكتبة كتب مجانية



تطبيق مكتبة كتب مجانية متوفر على جوجل بلاي

للمزيد من الكتب والحصريّات التي لن تجدها في مكان آخر من جوجل بلاي
اكتب مكتبة كتب مجانية الكتب بروابط مباشرة وستجد أكثر من ٢٠ الف
كتاب

- كام طبقة؟!!!! حاطط اتنين وعاملها تثبت.
= اتنين إيه بس!! الحُفر اللي في وشي دي محتاجة ٥ وشوش على الأقل!! ويمكن
يطلب 6 كان!

- وشوش!! إحنا بنمحرر!! ٢ كفاية، والله لو حطينا كثير بيحير كده وبيقرب على
وش جس!

= اسمع مني ٥ وشوش.. والرموش دي تشيلها خالص وتلرز علبتين رموش في
بعض وتركهملي... أنا بحب إحساس ريش النعام اللي بيتركب فوق العين ده. ولو
عندك استراس حطهولي عند رموشي من فوق كده ويا ريت الآي شادو يبقى
جليتر كده... وبعدين اللينسر العسلي دي مش عامله أي إبهار الصراحة!! عندك
لون عيون مايا دياب.. لون عين الديب السحلاوي ده؟

= آه عندي، بس مبتطلعش حلوة في الحقيقة بلاش منها!

- طب خلاص حطلي لينسر عين نانسي وارسملي مناخير نانسي وشفافيف نانسي،
عايزة حاجة هادية كده.

- = لينسر نانسي وماشي، بس أرسملك المناخير إزاي؟! مناخير حضرتك سوري
في اللفظ قد مناخير إبراهيم نصر!! هتصرف فيها إزاي دي.. محتاجين جراحة
تشيل نصها على الأقل!! حضرتك مبصتيش لحجم فتحة المناخير قبل كده واللا
إيه؟

- يا قليل الأدب، بقى مناخيري البندقة دي قد مناخير إبراهيم نصر!! هي شبه
مناخير هاني رمزي بس بالكونتور هتظبط والله وبص سيبك من شفافيف نانسي
خلينا في شفافيف كيم كارديشان.. عارفها منفوخة ومدملكة كده؟ أظن دي سهلة
يعني!

- = يا آنسة حضرتك بتطلبي المستحيل!! الناس دي دافعة دم قلبها في عمليات

وحضرتك تجيلي في ساعتين عايزة تبقي زيهم !!
- إيه يا چو أنا دافعة دم قلبي في الكام ساعة دول أنا كمان واللا كيم أحسن مني
دي عاملة زي شوال الرز يعني.. اتصرف!
- = طيب البلاشر كده تمام؟
- لأ طبعا.. عايزة لون مُلفت حطلي من اللون البطيخي ده طبقتين يا دوب بيانو.
= طيب الشعر؟ القصة دي حلوة؟ صح؟
- هو أنا بتاعة قصة!! إنتي مش شايف الزعرورة بتاعتي حزينة إزاي؟! عايزة
اكستنشن... عايزاه يوصل لضهري وهنخلي لونه تلجي زي فيديوهات منير... أكيد
تعرفه؟!

= طبعا... يا ريتك كنتي روحتيه وريحتيني!
- كده يا چو.. ده أنا حتى مغيرة حاجات بسيطة عشان أفضل على طبيعتي ..
= مفهوم طبعا... طيب عندك أي ملاحظات تانية قبل الصبّة؟
- آه، تعرف تعملي ابتسامة الفنانة دينا الشربيني اللي هيا سنانها بيضا بياض
مستفز كأنها مرگبة طقم سنان دي؟ معرفش إيه اللي عاجب عمرو دياب فيها
أساسا!!
= مفيش مشكلة هكلم الدكتور وتروحيه ونعمل الهوليوود سمايل.
- ومعلش لو مفياش رذالة يعني ممكن تنفخلي خدودي على ٣٠ كده... عايزة حاجة
زي حدود لولة..

= لولة مين، قريبتك؟
- لا، ليلي علوي حبيبة قلبي.... هي نفخت خدودها بس للأسف بوقها اتعوج
سيكا، فاسيننا بقى من عوجة البق دي وخلينا في النفخ.. ولو ممكن يعني نشيل

شوية سيلوليت من الأرداف والفخدين ونحطهم في الخدود عادي... أنا مش محتاجهم في حاجة وكنت بفكر أشفطهم وأتبرع بيهم للغلاية أو لأي جزارة وأهو أكسب ثواب ...

تمام أنا أهم حاجة أطلع على طبيعتي يا چو، أنا מבجش الهبل اللي العرايس بتعمله اليومين دول.. عايزة ناتشورال لووك كده.. أظن واضح؟! = واضح طبعا يا مدام مايا دياب.. واضح هو في أم ناتشورال لووك أكثر من كده، والله أنا صعبان عليا العريس من دلوقتي.

- متقلتش، إحنا مضمينه على مؤخر كبير أوي... سمي الله يا جو واتكل على الله، بس متنساش أهم حاجة كله يكون طبيعي... أو ك؟



تطبيق مكتبة كتب مجانية
متوفر على جوجل بلاي

الطريق القصير للنجاح في الكاريير ..

- التطبيل... من أول ما تحط طراطيف صوابك في الشركة اللي اتقبلت فيها اشتغلهم في التطبيل قبل ما يشتغلوك في الأزرق لأنهم كده كده هيشغلوك في الأزرق، أنت هتركز بقى على الناس الواصلة اللي كلمتهم مسموعة في الشركة.. ما تطبلش لحد مش هيجيك من وراه مصلحة خليك selective وناصح
- تكون موظف مطيع... يقولوك هتروح قسم كذا تقول ماشي... هنتقلك فرع أسوان قولهم آمين...
- يقولوك هنشغلك ساعات أوفر تايم ببلاش تقولهم كان نفسي أتطوع وأتبرعلكوا بكل مرتبي وكليتي مش محتاجها أساسا وزحمالي الدنيا جوه... قالوك هتمشي على الحيطه تقولهم أنا في الأساس عنكبوت بس لما كبرت ربنا كرمني وبقيت من الثدييات!
- الموظف اللي ميقولش لأ ده كل الناس بتجبه.. هو أينعم هيتحط عليك من الكل بس الترقية مبتجيش بالساهل.. خليك مطاط دحلاب كده ..
- التطبيل إوعى تنسى!
- خلي كرامتك على جنب.... هو يعني إيه كرامة أصلا؟
- انساها في بيتكم عشان متاخذش كل حاجة على صدرك.. مش ملاحظ إن الناس اللي بتطلع بسرعة الصاروخ في السلم الوظيفي بيكونوا باردين وبيعتبروا أي تهزيق ليهم كأنهم مسمعهوش!! هي حاجة قذرة طبعا محدش يقدر ينكر بس خليك فآكر إن إنت اللي مُصر تترقى مش أنا ...

- طَبِّل كمان وكمان عايز أتوب ..

- مصلحتك أولاً وثانياً وثالثاً لحد مليون...

خليك أنا في كده ومبتفكرش غير في نفسك وحتى لو تطلب الموضوع خزوقة فا
خزوق من تحت لتحت وقدام اللي خزوقته اعمل فيها الملاك البريء أبو قلب
طيب أوي ده... مصلحتك يابا فوق كل شيء ولا مؤاخذه الأهل فوق الجميع.

- ضبط ورقك.. خلي معاك ورق مهم عشان تحط أي حد تحت ضرسك لو فكّر
يعمل معاك السليمة فا انت هوووب دابل كيك تعمل معاه الجلاشة قبل ما يعملها
معاك.. عيش جو مرتضى منصور بسيديهاته.. اتعلم متبقاش خيبة!

- طَبِّل جامد وهات معاك صاجات لو حبيت .. أنا عايز أترقي.. يسعدك...

ايشيبييك... ايشيبييك...

- خلي عندك network وشبكة اتصالات عنكبوتية وعنقودية وحلزونية.. من أول
عامل البوفيه لحد أكبر دماغ في الشركة..

- أنا عارف إن إيدك وجعتك بس استمر في التطيل .. وهات فرقة سعد الصغير
تطبل معاك وانت الكسبان .

- خليك عديم الشخصية...

لو مديرك قال شمس يعني moon قوله الله عليك يا أستاذ... لو قال نكتة بايخة
كرقع من الضحك واتدحرج على الأرض زي الأنوبة ..
- طَبِّل يالا..

طَبِّل يالا ...

- خليك عامل زي عفريت المصباح بالنسبة لمديرك... لو احتاج أي حاجة يلاقيك
دراعه اليمين وفخده الشمال وسمانته لو تطلب الأمر..

تقمص شخصية عبد الغفور البرعي في فرح إبراهيم سردينه لما جاب للحاج سردينه

الشيخة جوه قاعة الأوتيل الخمس نجوم.
- خليك مرمطون.. أنا عارفة إنك اتهدلت معنا جامد من أول الكلام، بس والله
إنت اللي عايز تترقى وهموت عليها!
مديرك لو احتاج يروح المطار الساعة ٤ الفجر وبينه بين المطار ٥ دقائق اتحايل
عليه إنك توصله وقوله ده شرف للعربية وولي جابوا العربية.. خليك ملزق كده هما
بيحبوا التلزيق ..
- طَبِّلْ يالا... ركبك يالا ومبروك يالا... اترقيت يالا!

انستا_زفت "

- الله أخيراً غيرتي الملاية يا نيفين دي كان بقالها قرن!! كنت بخاف أنام
ألاقي صراصير وخنافس نايمين جنبي والله العظيم!!
- الواحد كان يفرد جسمه بس يلاقي غمامة تراب طلعت في وشه تجيب

گرشة نفس يا شيخة !

- بس يا حسام!! إيه الغلاسة دي ويا ريت تبعد رجلك كده شوية..

= ليه بس ده حتى الملاية ريحتها داوني وده مبيحصلش كثير..

- و ثانيًا عايز أفرد جسمي، أنا من الصبح واقف على رجلي وضهري

قفش قفشة سودا !

- يا حسام حاسب بس شوية! صباeck طالع جنب الشنطة اللي بصورها

عشان أنزلها على الانستجرام ..

= انستجرام !!! اللهم طولك يا روح !

- أيوووووه كده... الصورة تجن... اكتب.. بقي # [insta_shopping](#)

♥♥♥♥ # [shopping_mania](#)

= هبة مش صحيح الشنطة دي انتي شاحتها من رنا صاحبك؟!!

هتحموري على الناس وهي مش بتاعتك أصلا؟!!

- متخافش ما أنا عاملة لرنا بلوك عشان متقفشينش..

= لا حقيقي ونعم الصداقة..

بعد ربع ساعة... هبة داخلة بمج شاي سخن وجنبا بسكوت ريحت الزبدة

فيه مفحفة وجايبه آخر الشقة ...

- تسلم إيدك يا بيبو، عرفتي مين إن نفسي في كوباية شاي والله دماغي

هتتفجر...

مراي حبيبي يا اخواتي وكمااان بسكوت بالزبدة..

طول عمرك بتفهميني وعارفة اللي بجه... أحبك وإنتي مهممة بالتفاصيل على

رأي أصالة..

= حساااااااااا!!! أصالة إيه وهبل إيه دلوقتي! ممكن تهدي كده وتشيل إيدك..
استنى بس... سيب الصينية وهات كتاب باولو كويلو اللي جنبك ده....
وشيل رجلك...

- يا دي أم رجلي اللي عايزة تقطعيها لي دي!! أبتها لك يا هبة عشان ترتاحي
بس قوليلي هنا... خير بقي إنتي بتعملي كل ده ليه؟

= إنت بجد مش عارف؟!!! هنزل الصورة على الانستجرام وهكتب it's
me time... # [insta_quality_time](#)

- بس إنتي مفتحتيش صفحة في الكتاب وبقالك ٣ سنين شارياه وولا ليكي
في الشاي... هنمثل!!!

= يووووه، خلاص بقي يا حسام، إيه الغلاسة دي... سيبي براحتي يا
أخي.. سيبي أبقى عميقة شوية!

- اتنيلي!

= بتقول إيه؟

- بقول اتفضلي يا حبيبي.. اتفضلي ابقى عميقة براحتك..

بعدها بأسبوع..

- بيبوووووو بيبوووووو..... جبتك الكحك يا بيبو كل سنة وأنت طيبة يا
حبي، هاتيلنا كوباية نسكافية ندوقلنا كام واحدة كده.

= حساااااااااا!!! إوعى تفتح العلبة!!! إوعى وحياتي عندك!

- ليه بس العلبة منتهية الصلاحية واللا إيه؟ إوعى تكوني عرفتي حد جاله

تسمم من الكحك ده ومخبیه عليا!
= صلاحية وتسمم إيه يا حسام!!
استنى ، سيدها بالشريطة عشان آخذ الصورة وهي شيك كده بس استنى
أحط جنبها فانوس رمضان وأعمل جنبه باي وناولني المسحراتي والطبلة
عشان اكتب # [insta_eid](#) # [insta_ka7k](#)
bye_ramadan #
hubby#togethrt_4ever#

بعدها بيومين

دخل حسام لقي بوكيه ورد جميل محطوط في القازة وجنبه علبة هدايا..

- الله ♥️ افتكرتي عيد ميلادي يا حبيبتى..

- = لا دي هدية إنت جتبهالي عشان عددى على أول يوم شفتني فيه ١٦٨ يوم
بالظبط.

- وهي دي مناسبة؟ طب جبتلك إيه إن شاء الله؟ أحب أعرف؟

- = خاتم ألماظ وخذت فلوسه من القيزا..

- يا لهوووووي ألماظ وقيزا..

يا خراب بيتك يا حسام يا ابن عزيزة!!! يا خراب بيتك!!

- = حاسب شوية يا حسام عشان هصورها واللا أقولك تعالي لبسهولي وناخذ

سيلفي بس اعمل duck face عشان اكتب # # [hubby](#) . [ista_love](#)

.. [love_in_the_air](#) وبوسني في خدي وإحنا مش باصيين للكاميرا..

- لاااااا الهبل ده ميسكتش عليه أكثر من كده...

أنا استحملت كثير أوي أقسم بالله بس كفاية أوي لحد كده!! إنتي تلمي هدومك
وتروحي لبيت أهلك..

= كده يا حسااام طيب..

- وأبو كده والله وأم كده وإخواتها لو حبيتي!

وبعد ما هبة لمت هدومها..

- هبة... استني!

- = لااااا عمري ما هسامحك.. إنت جرحتني وأهنتني ومش أول ما تقولي آسف

هسامحك... انسي!

- لا يا ماما اسف ايه وبتاع ايه!

أنا بس كنت عايزك تبصيلي عشان هصورك من ضهرك بالشنطة وهكتب تحتها

freedooooooooom#insta_free#insta_belsalama#



تطبيق مكتبة كتب مجانية

متوفر على جوجل بلاي

"كيدهن عظيم"

- بسم الله ما شاء الله.. حلوة أوي الصورة دي يا شيرين كنتوا فين؟
- * كنا في إيطاليا، بس كانت سفرية غم وقطران.
- ليه بس كده، ده حتى إيطاليا جميلة..
- * اسكتي مش الباسبورات اتسرفت مننا هناك والسفرية كلها اتضربت وكانوا كام يوم ما يعلم بيهم إلا ربنا.. ده أنا كنت بيعط كل يوم.
- قعدتوا كام يوم هناك؟
- * خمسة وخمسة، قصدي خمس أيام بس قضينا كلهم في المستشفى عشان إبراهيم شال الزايدة واتحجزنا هناك..
- الزايدة؟ مش إبراهيم شالها من قبل ما تتجوزوا بعد حفلة الخطوبة علطول
- * إيه؟ اياه ما هي طلعتله في جنبه الشمال كمان!!
- إزاي يعني؟! هو في حاجة اسمها كده!!
- * اياها طب والله الدكاترة كانت بتضرب كف على كف هناك وكان ناقص يحطوه في المتحف، بس قالوا يمكن من تغيير الجو عشان مش واخذ على السقعة..
- تغيير الجو!!! عامة ألف سلامة بس ابقني اقلبي الشبايبك كويس! بس اللي أعرفه إن الشوبينج هناك حلو اسمع كده..
- * يقرف... صدقيني كل دي إشاعات...
- مشرتش غير قميص يتيم واتضحك عليا في سعره ووقعت عليه طافية السجاير بتاعة إبراهيم واتحرق ورميته من أول لبسة والله!! وجبت فستان لتاليا شبك في

حديد سور ديزني لاند واتنسل كله ومبقتش عارفه أسترها إايه لحد ما نروح!!!
اتفضحنا في إيطاليا وإبراهيم كان هيطلقني هناك..

- هو في ديزني لاند في إيطاليا؟

- * مين قال ديزني لاند!! بقولك سور المستشفى الوغد! ابقى سلكي
ودانك يا علا!

- أنا برضه اللي أسلك وداني! ما علينا، بس هو إبراهيم كان مسموحه
يدخن في المستشفى ازاي؟

- * مستشفى إيه؟ اااه المستشفى... هناك هما فريش مش زي عندنا...

كانت أجازة عُلب، يا رتنا كنا روحنا الساحل بدل الفلوس اللي كعيناها دي كلها...
احكي لي بقي عملتوا إيه في مراسي؟

- مفيش والله، زي كل سنه لا جديد..

- * اللي هو عملتوا إيه يعني؟

- روحنا شاليه ماما وحضرنا حفلة عمرو دياب وخلص كده..

- * ما تحكي عدل!!

مالك بتقطعي معايا كإنك خايفة من عيني لحسدك!! ده أنا بحكيك كل حاجة يا
ناقصة كإنك أختي بالظبط اخص عليكي..

- والله زي ما بقولك كده مفيش أحداث... طب بقولك إيه ما تطلعي الموبايل
تفرجيني كام صورة كده في إيطاليا..

- * كان على عيني... بس الفيلم اتحرق معلش..

- فيلم إيه اللي اتحرق؟! هو انتو مش بتصوروا بموبايلاتكو واللا بالكاميرا
النيكون..

- * لأ إبراهيم نشف دماغو وراسه وألف جزمة نتصور بكاميرا فوجي والفيلم مع إنه
كان كوداك أصلي بس اتحرق وهو بيتحمض وحتى الصور متهنيناش بيها!!
شوفتي حظ البومة اللي أنا فيه!!
- بيتحمض!!! تصدقي إني غلطانة إني بتكلم مع واحدة كدابة زيك من الأول!!! أبو
شكلك يا شيرين أقسم بالله!!! وابقى سلميلي على إبراهيم لما يشيلوله الزايدة للمرة
التالته على التوالي، بس المرة الجاية من زوره بقى عشان متنسيش!

"مكاش عيد ميلاد يعني"

تطبيق مكتبة كتب مجانية
متوفر على جوجل بلاي

* لا هاتيلي costume سبايدر مان... مش هلبس لبسي العادي...
* وعائز ناس تلبس لبس سبايدر مان وبات مان يرقصوا معنا أنا وصحابي..
- وهجيب صوفينار كمان عشان أهالي صحابك يتبسطوا برضه... واللإ إحنا مش قد
المقام..

- بووودي... عايزة أسألك سؤال يا حبيبي...

* قولي يا مامي!

- إنت ابن مين في مصر يا حبيب أمك عشان أجبلك تورتة 5 أدوار كل دور
بشخصية كرتونية، وبدلة رقص سبايدر مان، وأجيب لصحابك هدايا مع إننا
كاعين عليهم دم قلبنا.... ادخل أوضتك واغزي الشيطان وبكرة هعملك تورتة
خبزها بمحسن الكيك بتاع كوكس وهزوقها لك بشكولاتة خام وهتبقى زي الفل...
هعملها لك بوصفة مدام نجلاء الشرشابي والله شكلها كان تحفة وعلى قد الإيد في
الأيام المقندلة دي..

غور من وشي ومفيش هابي بيرز داي ولا زفت... غووووور!!

"بلا هم"

كثير بنختار شغل مرتبه أقل من شغل تاني عشان الناس اللي فيه محترمة وجو
الشغل صحي مفهوش تعب أعصاب...
كثير بنختار نخرج مع شخص واحد أو اتنين بدل شلة كبيرة عشان الناس دي
مريحة ومبيتعبوناش في التعامل معاهم.. ومش بيصغروا دماغهم فا بيوظوا الخروجة
الحلوة على تفاهات.

كثير بنختار نقل لعمارة ثانية ممكن تكون مش أفخم من عمارات ثانية بس عشان
الجيران في حالهم ومبيعملوش مشاكل ...
كثير بنختار الوحدة والغربة عشان نبعد عن حوارات ما بتنتهيش ... وعن مشاكل
ملهاش أول من آخر!

بتيجي على الناس مرحلة بيفاضلوا فيها بين وجع الدماغ وبين أي حاجة ثانية سواء
صحبة ناس أو مكان شغل أو بيت يتعاش فيه، والغريبة إن معظمنا مع نضوجه
الفكري وبجكم خبرات السنين بيرجح كفة البعد عن وجع الدماغ رغم إن في الكفة
الثانية مغريات كثير تزغلل أي عين ...

بييجي علينا وقت ما بننهرش بأي حاجة طالما جابتلنا صداع ووش رغم إن من
كام سنة كانت رقبتنا بتتلوح عليها وممكن نسهر نحلم بيها ...

الموضوع مبقاش مستاهل، الناس اللي هتدوشنا وتدخل حياتنا بعك وخناق
مبقاش ليهم مكان ..

الشغل اللي هيدخلي فلوس أكثر بس فيه قلة قيمة وغلاسة وإهانة يغور في
داهية ..

محدث بقى قادر يحارب في معارك جانبية، كفاية أوي على كل واحد معركته
الشخصية ..

بلا هم !!



تطبيق مكتبة كتب مجانية

متوفر على جوجل بلاي

"إنت فين يا علي... أمك بتدور عليك"

- ألو، سلام عليكم.. منزل الطالب علي محمد إبراهيم؟
= أيوه يا أفندم خير، والله العظيم قلبي كان حاسس 😊 ❖❖ تصدؤ
بالله كنت مستنيك تتصل من الصبح 😊 ❖❖ هااا قولهاالي بقى
😊 ❖❖ ... قولهاالي واطرني...

- حاسس يايه حضرتك، هو أنا فتحت بقي لسه؟ حضرتك تقربله إيه؟
= باباه 😊 ❖❖ ليا الشرف إني أكون باباه يا أفندم، أقسملك بالله
يا أفندم أنا كنت مستني المكاملة دي وحاسس إن علي هيرفع راسي ويطلع
من أوائل الجمهورية.. أنا مبخلتش عليه بأي حاجة وكنت موفرله أحسن
جو للمذاكرة 😊 ❖❖ كنت بجبله لانشون شيكي دودو وحلاوة بار
عشان يصحح ويركز يا أفندم.. حتى المروحة السقف مكنتش بطفيها
عليه وهو نايم عشان يعرف ينام ويركز سعادتك 😊 ❖❖ وكنت
برفص إخوانته في بطنهم لو عملوا دوشة عشان حبيبي يعرف يذاكر.. ده أنا
كنت بديله درسين في كل مادة عشان يفرحني في يوم زي ده..

- حضرتك ممكن تديني فرصة أتكلم 😊 ❖❖ ❖❖
😊 ❖❖ ❖❖

= استنى خد منال أمه نفسها توجهله كلمة، بس ثواني عشان حلفت عليها
بالطلاق تعمل محشي كرنب وبطة وشوربة لسان...

للله وهيبداً العلاج الطبيعي لمدة سنتين والارتجاج هيتعافى منه بس ندعيه كثير ..
ومستر إبراهيم مضى على شيكات على بياض واختفى في ظروف غامضة ولاقوه
بشحت واتجنن ويقول "إنت فين يا علي أمك بتدور عليك" ومحدث عارف مين
علي لحد دلوقتي ..



تطبيق مكتبة كتب مجانية
متوفر على جوجل بلاي

"اعتذار الستات"

- كنت عايزة أقولك حاجة.. أنا آسفة ..
- = خلاص حصل خير يا إسراء.
- بقولك آسفة هو إيه اللي حصل خير؟ أعملك إيه تاني عشان تسامحني؟
- = على فكرة أنا معترضتش أنا بقولك إن خلاص مفيش حاجة ومسامحك.
- أصلا معلش يعني هو إيه الجريمة اللي عملتها عشان اقعد أتذلك كده عشان تسامحني؟
- = هو فين الذل ده؟ إنتي من أول ما قولتي آسفة قولتلك الموضوع خلص !!
- أيوووووه ما هو لولا إن أنا اللي جيتلك ودوست على كرامتي كانت الخناقا هتكبر ومكنتش هتكلمني وكنت هتطنشني وتروح تشتكي لطنط
- ولإخواتك كإني معيشاك في جحيم عشان تصعب عليهم وتنزل لصحابك على القهوة وولا كإني هوا في حياتك.. صح؟!
- = هو مش إنتي اللي غاطانة برضه؟ واللا أنا؟! إنتي هتجنيني؟ غلطتي واعتذرتي وخلص الموضوع... مطلوب مني إيه تاني؟ الموضوع مش محتاج كلام كثير ولا طالب عكنة..
- عكنة؟!!!!! يعني بعد اللي بعمله عشانك ده كله أنا نكدية وبعكن عليك؟ كتر ألف خيرك يا وليد!! مكانش العشم بجد.
- = أومال ده اسمه إيه طيب؟ خط الضحك والفرشة!! اسمها زغزغة؟ مش معقول كل ما نتخانق نقعد في الحوار ده أسبوع لحد ما يخلص.. الموضوع

أبسط من كده..

- قول لنفسك يا أستاذ!! رفقا بالقوارير يا بشمهندس!! ده إنت دشدشت
القارورة!! واللا عشان أنا طيبة!! هي الرجالة كده صنف ملوش أمان!! كلكم
مصطفى أبو حجر.. كلكم!!

- = طيب ممكن أفهم إيه لازمة العياط دلوقتي؟

- عشان جرحتي! كل مرة بحس إني مسواش حاجة عندك.

- = يا بنتي إزاي الكلام ده؟ بطلي هبل!

- لا أنا زعلانة جدا والله..

- = خلاص متزعلش..

- ولا إنت تزعل.. أنا آسفة، بس أنا أصلا معملتلكش أي حاجة تزعل إنت

اللي استفزتي..

- = أنا؟! ده أنا كنت قاعد في حالي وإنتي اللي غلطي فيا!!

- لا إنت نظراتك ليا مستفزة وبتعاملني ببرود بس أنا آسفة بس أقسم بالله

إنت السبب، إنت اللي بتوصلنا لحيغة سد..

- = يوووووووه!! أنا اللي آسف يا ستي!! حقك عليا!!! أنا اللي أستاهل

ضرب الصرمة!! تحبي أوطي أبوس رجلك عشان دماغني صدعت بجد

ونفسي ننهي الحوار الأرف ده!!

- أرف!!!! عامة خلاص متزعلش بس والله إنت السبب..

- = مش زعلان، وأنا اللي ابن ستين كلب والله عندك حق.. خلصنا بقي..

- إنت ليه بتعمل كده؟ وليد مش كل مرة أكلمك متسمعنيش وتنزل

وتسيبني... طبعا ما أصحابك على القهوة هم الصدر الحنين وأنا النكد كله!

وليد.. وليد... رد عليا... إنت زعلان طيب؟ طب متلمش هدومك...

" وشك دبلان في الصورة دي "

وفي ناس بتبّخ السم ده فيس تو فيس أول ما تقابلهم، وولا بيفرق معاهم إذا كان بقالكم شهور واللا حتى سنين متقابلتوش... هيستقبلوك بخصن ساقع متكروت عشان مستعجلين يُخُوا في وشك الكلمتين السم المحشورين في زورهم "والله ما عرفتكيش... مالك عاملة كده ليه!!"

" إتي جراك إيه!! فين مها بتاعة زمان "

"سايية ابنك تخين كده إزاي؟ ابنك مش بيتكلم ليه هو عنده مشكلة واللا تأخر؟ إتي ساكتة عليه كده إزاي"
"بنك طالعة وحاشة كده لمين؟"

وغالبا الناس دي ولا بيفرق معاها لو إنت لوحذك أو مع عيلتك أو في وسط صحابك... هما كده كده مقررين إنهم هيدولك كام جملة في عضمك ومفيش حاجة هتمنعهم عن كده إلا لو لسانهم اتشل بتدابير إلهية!

طيب إيه اللي يخلي ناس تتمزج وتتكيف بتعكير مزاج غيرها!!

وإنهم يرموا لغيرهم كلام يقعدوا يقبلوه في دماغهم طول الليل وينكد عليهم كل ما يفتكروه! ودماغهم تفضل تودي وتجب؟

محدث يقولي إن اللي في قلبهم على لسانهم عشان لو ده اللي في قلبهم فا دي بلوة! كارثة!!

اللي عنده كلمة حلوة يقولها ولو معندكش وحاسس إنك هتتك احتفظ بعكك لنفسك، اللي قلقان على حد هيراعي مشاعره وهو بيسأل عليه مش هيعكن عليه ويتقمص شخصية المحب المهتم!!



- طيب خلاص يا حبيبي كمل نوم
 ? ?

بعد تلت ساعة ...

باب أوضة النوم يخبط ...

* ماما... ماما... ماما... ماما..

- إبييه؟ عايز إبيه؟

* أنا صحيت خلاص..

- إنت إيه يا روح خالتك؟ صحيت؟

* آه خلاص، شبعت نوم... فطريني بقي..

- طب مروحتش المدرسة ليه؟ وفين جو هموت وأناام وجرجرتي ليك عشان

تدخل التواليت!!! وهقع من طولي لو رجلي لمست الأرض وجو تينة الحاجة ده؟


فين كل ده؟ اندثر في تلت ساعة؟ كل ده راح فجأة؟!!!

* شبعت نوم والله

- طب هنام ساعة وأجيلك... متخبطش تاني..

بعد 5 دقائق

تاك تاك تاك... تاك تاك تاك..



هتَمّر الأيام وييجي وقت مش هتلاقوا قدامكوا غير بعض ..
مش هتلاقوا دوشة حواليكو إلا صوت التلفزيون أو الراديو وصوته وهو بيقرأ
الجرنان جنبك.. أو صوت كحة حد فيكو بيصحي كل واحد منكوا مرة من نومه
...

ولادكو كل واحد هيبقى في الموال بتاعه، اللي بقى في بيته واللي مشغول في حياته
و.. واللي مسافر واللي هاجرت مع جوزها..

هتنبصوا حوليكو مش هتلاقوا حد قاعد على الكنبه اللي مكاتش بتكفيكوا كلكوا
وكتنوا بتتخانقوا مين يقعد عليها إتوا واللا الولاد ..
حتى الكرسي بتاعك اللي كانو بيغلسوا عليكي وبيقعدوا مكانك هتلاقه فاضي
وبارد ومستنيكي بالتراب اللي عليه ...

هتتحول نقاشات مذاكرة الولاد وطلبات البيت والمدارس وتجهيز البنات لحوار
بسيط بينكو "اتطمّنتي على الولاد انهارد؟ ابنك طمنك إنه وصل بالسلامة"
وبعدها هتعملوا كوبايتين شاي وتشربوهم سوا .. والدنيا هس هس...
صوت الدوشة والجري والصريخ والضحك هيتقلب لهدوء ساقع مفهوش دفا زحمة
البيت زمان..

هتعدّي أيام محدش هيرن عليكو جرس الباب بعد ما كان قرب يتحرق من كتر
الرن! هتَمّر أيام مش هتلاقوا حد يبسأل عليكم إلا بتليفون وهتلاقه هو اللي
بيناولك الدواء لما تتعي وهي اللي بتحلف عليك إنكو لازم تلبسوا وتنزلو تروحوا
استشارة الدكتور عشان تظمني على صحته ...
لما تقررنا تنزلوا حته هتروحوها سوا..

مش هيبقى فيه صراع إنت مع صحابك وساييني والكلام اللي ياما وجعتوا بيه

دماغ بعض زمان.. إيدك هتسند على إيده وإيده هتسند على إيدك مش مجرد
مسكة إيد من بتوع الخطوبة زمان.. لأ دي مسكة عشم وحب وسند وإقرار
بعشرة سنين خلت كل واحد فيكو مسنود بالقوي على الثاني ..

هتلاقي نقاشكو بقي أهدي ..

كلامكوا بقي واحد ..

رأيك بقي شبه رأيه عشان بالعشرة طبَّعتوا على بعض وحفظتوا ردود أفعال بعض
صم ..

الحب مش هيبقي كلمة بجبك زي زمان.. بقي طبطبة بإيد بتترعش ونظرة تفاهم
من غير كلام.. ودفاع مستميت عن تصرفات بعض مع إن زمان كنتوا بتحاربوا مين
فيكم الصح ومين الغلط ...

هيبجي اليوم اللي هترجعوا فيه لوحدكوا سوا زي اليوم اللي بدأتوا فيه حياتكم سوا،
بس الفرق إن دلوقتي بقيتوا حافظين كرمشة إيد بعض وتجاعيد وش بعض، واللي
بينكم بقي أقوى بكثير من أي حب بدأتوا بيه حياتكم ...



تطبيق مكتبة كتب مجانية

متوفر على جوجل بلاي

"المحوات الفاتنات"

- ماما إزيك يا حبيبتى، وحشاني، بصي جبتك إيه يا ست الحبايب..
- * مممممم، حلو، بس يعني مكنتش عارف تجيب حاجة قماشتها أحسن من ده شوية... الصراحة حاجة عرة!!
- معلش يا ماما، المرة الجاية بقى ...
- * ده فرز تاني؟ جايبة بالجملة صح؟
- لأ طبعًا يا ماما ..
- * أو مال شكله عامل كده ليه؟ داهية يكون غالي!! ده أنا بجيب العباية دي من العتبة بخمسين جنيه ولو قرصت في الفصال هاخدها بعشرين جنيه..
- دي مش عباية يا ماما، ده مونتوو من زارا..
- * مانتوو؟ إنتى خنfan ليه يا حبيبي؟ عندك برد... اسمه بالطوو، وزارا ده بعيد عن العتبة أوي؟
- طبعًا جالك برد عشان الزفتة مراتك مش واخدة بالها من صحتك!!! عملتلك لمون بكمون بزيت زتون؟ تلاقيها كسّلت الباردة دي ما أنا عارفاها ... هي البرنسيسته هتفكر تتعب نفسها عشانك! إنت مش في بالها من أساسه! جاتها القرف..
- المهم عجبك يا ماما؟
- * قماشته مش قد كده، تحسه خيش كده وريحته كارفة على فروة خرفان ... هو غالي البتاع ده؟
- تعيشي وتدوي يا ست الحبايب... عنيا ليكي.

* أدوّب إيه ده جايلي دايب خلقه!! يا ريتك كنت جبتي بدالة إسدال من التوحيد والنور، أو بيجامة قطيفة كنت هفاصل وأجهالك بـ70 جنيه..

الصراحة لون البتاع ده يقرف متزعش مني... هو غالي؟

- خلاص هجبلك اللي إنتي عايزاه يا أمي.. أنا كل فلوسي تحت أمرك..

* فلووووس؟! حوووش يا واد!!! ده إنت تلاقيك جبتي بعد ما جبت للبومة

بتاعتك شيء وشويات... إوعى يا حيلة تكون بتفرتك كل تحويشة عمرك على

هدوم وجزم للمحروسة!!!

* بقولك هوا البانطووو ده غالي؟ يا ريتك كنت ادتني 100 جنيه في إيدي بدال م

أشحتّه لبت عايدة اللي بتنضفلي الشقة... هوا غالي يا واد ما تريح قلبي؟

- ميغلاش عليك يا أمي ...

* اخلص بس، ما أنت طول عمرك خيبة وموكوس ويتضحك عليك عشان كده

منى بنت انشراح لفت عليك وطوتك تحت جناحها... ده إنت أهبل.... قولي

الزفت ده بكام!

- بـ1800 جنيه يا ماما..

* يا نهار أبوك إسود ومطّين!!!!!! إنت حنيت لعلق زمان يا ياسر واللا إيه؟ لا

إنت ابني ولا أعرفك إلا لما ترجّع الزفت ده وتاخذ فلوسك..

- ليه يا ماما بس؟

* متخلنّيش أجيب الشبشب وأناولك بيه.... إنت مكبرتش عليا ...

- طيب ما تعصبّيش نفسك... بكرة هرجعه ...

* النيلة ده مش هيبات في بيتي لحظة!!! قوم رجّعه يا أهبل!!! منها لله منى تلاقي

كل لبسها من ظاظا ده!!! قوم فزّ خد البتاع ده ولمّ نفسك وروح عشان عفاريت

الدنيا بتننطط قدامي..

صبروا كثير وواجهوا الدنيا كلها عشان يتجاوزوا وكانت الإجابة أقصر مما أتخيل
"خلاص كنت جبت جاز.. مبقاش فارق معايا وجوده من عدمه " ..

سألتها عشان أفهم أكثر ... إزاي اللي كان روحها فيه مبقاش فارق معاها!!
في حاجة غريبة مش قادرة أفهمها! ده إنتوا كنتوا بتموتوا في بعض يا بنتي من أولى
جامعة!!

الرد كان ينتقال ببرود وبثبات :
" أنا استحملت كثير أوي من أول يوم عرفته فيه... استحملت اندفاع وقرارات
غلط... ودفعت ثمنها لوحدي ...

استحملت مسئولية المفروض تتقسم على اثنين وقولت يا بت خليكي جدعة
وشيلي, اعتبريه لسه صغير وبكره هيتعلم يشيل المسئولية.. ودفعت الثمن
لوحدي..

بس الثمن دفعته من صحي ونفسي وسنين عمري وهو ولا حاسس بحاجة! ..
جيت على كرامتي وسامحت في نزوات كثير وقولت أهو طيش شباب ومسيره
هيرجع لبيته.. ده حب العمر!! وكالعاده أنا اللي شربت لوحدي!! عياط وزعل
وخسسان وعصبية وبقي الطبيعي إني أستحمل وأعدّي ما أنا ياما عدّيت!!

...
قعدت أرق في جوازنا.. أرق... لحد ما قررت في يوم إني مش هتحرك من مكاني
خلاص ..

بقي في عك محدش بيصلحه ... فالعك بقي بيزيد واتحول لشيء مقزز!
بقي الزعل بيتراكم عشان بطّلت أجري وأصالح حتى لو الغلطة مش مني زي ما

كنت علطول بعمل ...

بقي في جرح عمّال بيكبر لحد لما اتلوث ومبقاش نافع معاه حاجة إلا "البتر" ..

أموت وأسيب الجرح يموتني واللا أبتر الحاجة اللي هتموتني؟

قررت أمشي.. ومحدش مسك فيا عشان أنا اللي كنت علطول بمسك وبحلّق

وبدادي وبطبطب ...

قررت أمشي وعرفت إن ده أحسن قرار أخذته في حياتي لأنني فعلا خلاص
جبت جاز من إني ألصم في علاقة، اللي قدامي ميعملش أي حاجة عشان يحافظ
عليه..

قررت أمشي لأنني لو ممشيتش دلوقتي هعيش وروحي ميتة وإحنا مش بنعيش إلا
مرة واحدة...

بس تعرفي أنا ثابتة ليه دلوقتي؟ عشان عملت كل حاجة ممكن تتعمل واستحملت
حاجات استحالة كنت أتخيل إني هستحملها ولقيت اللي قدامي بايع ومش شاري
فا قررت أمشي وأنا ضميري مرتاح عشان خلاص كفاية أوي لحد كده! ..



تطبيق مكتبة كتب مجانية

متوفر على جوجل بلاي

"بنشترى راجل"

= يا عمي أنا ليا الشرف أطلب إيد بنتك الآنسة دعاء ..
- والله يا ابني إحنا مش هنلاقي أحسن منك ووالدك إنسان محترم أعرفه من زمان
فا إحنا عيلة واحدة من زمان واللا إيه يا أم دعاء؟
* طبعا يا حاج هو في زي دكتور شريف! واللا أخلاق دكتور شريف..
= تسلم يا عمو.. تسلمي يا طنط...

أنا جيت انهارده لوحدي عشان بس الحاج تعبان والمره الحاية يكون معايا إن شاء
الله..

- يا حبيبي ألف سلامة، ده بيتك... إوعى تقول كده.. تنورنا أي وقت.
= تسلم يا عمي.. طيب طلباتكم إيه؟
- طلبات؟ عيب يا شريف!! ده إنت ابني!! إنت مش عارف إنك في معزة طارق
ابني واللا إيه؟

= عارف يا عمي، بس عشان نبقي مرتاحين ويهمني حضرتك تبقى متطمئن على
دعاء..

- يا شريف إحنا بنشترى راجل..
= تسلم يا عمي والله.. حضرتك زي والدي تمام والله..
- إحنا بنشترى راجل يا حبيبي، أنا أهم حاجة عندي بنتي تبقى مع اللي يصونها
ويحافظ عليها وكل الماديات تغور..

= الله يطمئنك يا عمي... وأنا هشيل دعاء في عيني إن شاء الله..

- لا عينك إيه بقى 😊 ❖❖ إيه رأيك نشيلها في شقة في التجمع كده
واللا الرحاب.. عشان مبقاش قلقان عليها..

= حاضر يا عمي.

- بص، هو الأحسن تكون جوه كومباوند عشان أبقى متطمئن أكثر... إنت عارف
القلق اليومين دول واللا إنت رأيك إيه؟

= بس لو كده مش هقدر أجيب إلا شقة صغيرة..

- ولا يهكم يا حبيبي.. ٢٠٠ متر صافي كفاية...

إحنا بنشتري راجل يا شريف والله..

- وبالنسبة للعضش كله عليك وإحنا هنجيب تلت الأجهزة الكهربائية... إنت
هتجيب السفارة والصالون والليفينج وأوضة ماستر بحمام و ٢ أوضة نوم أطفال
وأوضة للدادة..

= طب ليه ٢ أوضة أطفال؟

- عشان لو جبتوا ولد وبنت هتعوزوا أكيد تفصلوا بينهم لما يكبروا..

= بس ما يمكن نجيب ولاد بس أو بنات بس..

- أهى هتبقى أوضة زيادة، أبقى آجي أريِّح فيها أنا وأم دعاء 😊 ❖❖ 😊

❖❖

= وأوضة دادا ليه؟

- يا لهوي!! بنتنا مش واخدة على الشقا يا ابني..

= بس دي كانت لسه بتمسح الصالون وأنا داخل وقاتلي أرفع رجلي عشان تسيق

تحتي!

- أصل الدادة بتاعتنا عندها رباط صليبي فا مريحة شوية..

- وبالنسبة للأجهزة هشارك فيها معاك... إنت عليك الغسالة والمجفف والتكيفات السبليت والتلاجة اللي ليها حنفيه في الباب دي وفرن كهربا وكيكشن ماشين وساندويتش ميكرو وخلاط ومضرب كهربا وبويلر وكوفي ميكرو والحلل والصواني والصيني والبايركس وإحنا هنجيب الشفاشق والكوبايات و٦ معالق و٦ شوك وملهاش لازمة السكاكين... تمام كده؟

=

- وجيب معاك في إيدك البطاطين والإلحفة والملايات والسجاجيد والستائر والنجف والكريستالات، وإحنا هنجيب طقم مشايات الحمام والمطبخ وستارة الحمام... تمام؟

=

- هحتاج تشطيب الشقة يعملها مهندس ديكور تبعك عشان منكلفكش كثير بدل ما نتعاقد مع شركة عشان الشركات حرمية وإنت في مقام طارق ابني..
- الشبكة بقي بتبقى هدية العريس للعروسة فا مش هنتدخل فيها ونقل ذوقنا واللا

إيه يا أم دعاء 😊 ❖ ❖

* طبعًا يا حاج وإنت أبو الذوق كله وشريف زي طارق ابننا يعني..

- بس هقترح عليك جورج الجواهرجي ده العيلة بتتعامل معاه من زمان والخاتم الألمان عنده بـ ٢٠٠ ألف بس..

- وبالنسبة للفرح فا جري العرف إنه على العريس فا مجرد بس نعمله في ريكسوس العلمين وأهو يبقى اسمنا غيرنا جو إحنا والمعازيم وحجزناهم يومين هناك على حسابنا واللا أقولك هيبقى كثير عليك.. وإنت زي طارق ابني...

هنعمله في الفورسيزونز أو ممكن JW MARRIOT عشان مش عايز أتقل عليك

والله.. شوف الأنسب ليك... ويمكن أديك رقم wedding planner شغله هايل

عشان نشوف هنجيب مين مع حماقي لأن دودو بتحب حماقي أوي....

- وطبعًا فستان الفرحة على العريس فا هنجيبه من بره ممكن من باريس..

- والخطوبة هنعملها على الضيق عندنا في البيت عشان دي علينا وهنجيب فيها

ساليون وكيك وتورتاية هنعملها أم دعاء في البيت ودعاء هتاخذ الفستان لفة من

حنان بنت خالتها عشان إنت عارف المصاريف ونجيب فراشة من عند عم إبراهيم

هتبقى حلوة أوي ...

- والله يا شريف أنا قلبي ارتاحك من ساعة ما شوفتك!! إنت متعرفش إنك أعلى

حاجة عندي واللا إيه  ? ? ... نقرا الفاتحة؟

..... =



تطبيق مكتبة كتب مجانية

متوفر على جوجل بلاي

"ما تنام يا عسل منك ليه!"

في أطفال كده سبحان الله من ساعة ما يتولدوا مش نازلين بأوبشن النوم ... مولودين وراسهم ألف جزمة إن مفيش نوم يعني مفيش نوم... كنوع من التعذيب السادي للأم المسكينة ... هي كمان هتنام ده إيه الدلع ده!

فاكرين نفسهم في حفلة ومقضيين حياتهم بمبدأ: "ما تخلي السهرة تحلى"!!!!
مقررين إن كفاية 9 شهور أنتخه ونوم إجباري وحواليهم سائل لزج كده فا حتى مش عارفين يمارسوا موهبة الزن والصريخ والعياط !!!
تلاقي كل الأطفال أول ما بتولد ترضع وتنام وانتي ابنتك على صرخة واحدة سواء مغص أو انتفاخ أو أهو غلاسة كده وغالبًا بتكون أهو غلاسة كده
كأنه كان منقوع جوه الرحم في اسبريسو وقهوة وكابتشينو وشاي ثقيل فا دماغه بقت مصفحة ما بيحواش فيها حاجة ...

ممكن يطبق بالخمسة أيام متواصل ولولا الملامة كان قفلهم أسبوع ...
بيكون راضع ومغير وواحد دوا المغص وعملاله رجليه عجلة عشان الغازات والذي منه وبرضه بيغنت وصاحي ومفجل !!!
تعمليله روتين نوم.... تحميه حمام دافي بمجموعة اللافندر من شاور جل وشامبو وبلسم اللي المفروض ترخي أعصابه وتخليه مدروخ ومفرفر وتطفيه نور الشقة كلها لحد ما تتسرعوا كلكوا.... وبرضه الباشا صاحي
لو نام في سريره... يصحى ..

تغليه بصوت واطي أو تشغيله صوت مياه البحر أو مكنسة من على أليكيشن
تلاقيه مبرألك في الضلمة زي الصقر !!!

نفس هذا الطفل يروح المصيف وينزل البحر 8 ساعات والموج يلسع في ضهره
والرملة تشويبه جلده وتيجي تروحه على العشا عشان يريح يقلبها لك مناخة عشان
عايز ينام وهو بيعوم

ونفس الطفل ده لو نام 10 دقائق وصحي تلاقيه فوّق كانه نام 5 ساعات متواصل،
ويبدأ العفرتة من أول وجديد حتى لو الساعة 3 الفجر ...
الطفل ده لو نام من نفسه مرة كل 8000 مرة كده بتدخل تظمن على نَفْسِه لأنك
مش مصدق إنه نام زي ما كل العيال بتنام !!

سؤال بجد... ما بتناموش ليه؟

أنا من المرحلة السنية اللي أنا فيها دي بقولكوا إن بكره هتعضوا الأرض من الندم
على كل لحظة اتمرقتوا فيها وفضلتوا صاحيين ...



تطبيق مكتبة كتب مجانية

متوفر على جوجل بلاي

"رسالة لأمي"

كبرت يا أمي وسيت حزنك واتجوزت..
كبرت وبقيت مسئولة عن بيت وراجل وبايبي جاي في السكة..
تعبت أوي يا أمي طول الحمل.. بس مكنتش بقولك عشان ما تقلقش.. عارفاكي
بتقلقي من أقل حاجة...
عرفت دلوقتي يعني إيه لما قولتيلي إنتي حنة مني.. لأن دلوقتي في جوايا حنة مني..
كبرت يا أمي وبقيت مسئولة عن إنسان صغير.. معرفش عنه أي حاجة غير إنه
ابني..

اتعلمت أسكته وأدلهه وأنيه وأنا لحد دلوقتي معرفش اتعلمت كده إزاي..
كبرت يا أمي وعرفت يعني إيه جواز واحترام شريك حياة ويعني إيه نكون سوا
على المرة قبل الحلوة..
كبرت يا أمي وسهرت زيك وتعبت زيك وقلبي وجعني على تعب ولادي زيك..
كبرت وبقيت أقلق لو جوزي ما ردش عليا أو اتأخر عليا زي ما كنتي بتقلقي على
بابا بالظبط لما يغيب..

كبرت وعرفت إن خوفك علينا ما كنش يا يدك..
كبرت يا أمي واتعلمت أربي..
بقيت أنا اللي بطبطب يا ماما.. مش بيتطبطب عليا..
وأنا اللي بدلع يا أمي.. مش بتدلع..
وأنا اللي بضحك حتى لو زعلانة عشان المركب تمشي..
كبرت يا أمي مع إني طول عمري كنت الدلوعة اللي بتأخدوا بالكوا منها.. مش

بتأخذ بالها من حد ..

كبرت وكل ده اتغير يا أمي ..

بقيت أنا أساس البيت.. أنا اللي أعمله حس ..

كبرت وعرفت يعني إيه أشيل المسؤولية ..

كبرت وعرفت ليه الآاه بتاعتي كانت ما بتنميكيش !

وليه لما كنت بتعب كان البيت كله بينام وإنتي اللي بتفضلي سهرانة جنبي لحد ما
أبقى كويسة!

كبرت يا أمي ووحشني أرجع صغيرة تاني.. وأترمي في حضنك تاني ..

وأسيب كل مسؤولياتي ورا ضهري وأرجع صغيرة تاني أحط راسي على رجلك
وتلعبيلي في شعري لحد ما أنام ..

كبرت يا أمي بس عمري ما هكبر على حضنك، وعمري ما هكبر على دلحك..
هفضل في نظرك البنوتة الصغيرة أم ضفاير..

اللي مهما كبرت هتفضل عايزاكي تطبطبي عليها وتقوليلها هتفضلي بنوتي الصغيرة ..

كبرت يا أمي وبقيت شبهك وكل يوم بيعدي بكون شبهك أكثر وأكثر ودي الحاجة
الوحيدة اللي مفرحاني ..

إني شبهك ..



تطبيق مكتبة كتب مجانية

متوفر على جوجل بلاي

انتبه من فضلك.. الصداقة ترجع إلى الخلف

قد إيه اتمنيت وجود جهاز إنذار زي إنذار العربية كمؤشر تحذيري على وجود كارثة في صداقاتنا ..

كان نفسي يبقى فيه أمارات أشوفها بعيني وقلبي يصدقها إن فعلا اللي بينا مكانش صداقة وكان وهم حلمت إنه يتحول لصداقة من النوع اللي بنقراه في الكتب واللي كل بوستس الفيس بوك هريانا بيه ليل نهار !

أنا مش هكدب لو قولت إن مشكلتي في الصداقة إن سقف طموحي بيكون عالي أوي بس والله ما بيكون عالي من فراغ ..

أنا لما بصاحب حد يا بيكون صاحبي أوي يعني "صديق" يا بيكون إنسان عابر في حياتي وبيكون واضح إن عمرنا ما هنقرب لبعض سواء ده قراري الشخصي لأسباب خاصة أو قرارنا سوا اللي بننفذه من غير ما نشرحه ..

مش بعرف أخلي حد في المنطقة الرمادي لفترة طويلة... مع الأيام يا بيكون صديق يا بيرجع لخانة "أهي معرفة والسلام".

الصداقة عندي يعني تتسند على بعض.. نخاف على بعض.. منستناش حد فينا يقول للتاني إنه محتاجه..

بنقف في ظهر بعض بدون مقدمات..

الصداقة عندي أغلبها مش قائم على مكالمات يومية ورغي متواصل، بالعكس قائم على عشم جه من مواقف بجد اتخطيت فيها وعرفت مين شاريني ومين عارفني لسبب ولفترة مؤقتة وخلص ..

عيننا بقي إن ساعات بنقرأ الناس غلط.. بنتسرع وإحنا بنترمي في حضن الناس
اللي بتدخل حياتنا جديد!

في شخصيات دخلتهم حياتنا بتكون قوية ومُبهرَة في كل تفاصيلها وتشد أي حد فا
تلاقي العلاقة تقوى وتقوى وتأخذ قفزات سريعة تفكر إنها بتطمئنك إنك مع
الصديق الصح، ولكن هووووب فجأة بتلاقي تحول مش مفهوم وتصرفات غير
متوقعة كأنك بتتعرف على شخص تاني !! وعلاقتكم تنتهي عند أقرب ملف وتتدمر
عند أبسط خلاف!

مقدرش ألوم الطرف الآخر في اللي بنوصله من تراجع العلاقة لأن في جزء كبير
من الغلط بيكون علينا..

إننا انجرفنا... مشينا يا حساسنا أوي فا نطينا مراحل كثير بخطوات سريعة جدا
وبينا عليها قصة صداقة وردية من نسج أفكارنا وعشنا جوه القصة دي مع نفسنا!
انتبه.. الصداقة مهما كانت قوية ومدتها سنين وسنين لازم هنقابل فيها مطبات
وساعات هنقع فيها في حفر وبير غويط بس هنتلاقي في مرحلة إنك إنت وصديقك
بتشدوا بعض لحظة الجد وبتنقدوا صداقتكو وبتكمل أقوى من الأول..
لكن في صداقات زائفة بتخدعك بجلاوتها في الأول بس أول ما بتخطوا في مطب
بتلاقوا صواميل الصداقة المزيفة دي كلها بتخلع وبتأخذكوا إنتوا الاتنين على الأرض
بعزم ربنا ما إداها ... وساعات بتنتهي نهايات مأساوية بتوجع أوي وجرحها يفضل
معانا فترة طويلة!

انتبه فا أشباه الصداقات لازم بترجع إلى الخلف، وللأسف لما بترجع بتخطنا في
حاجة بتوجعنا من جوه لفترة طويلة ومش كل الناس بتقدر تتعافى من أعراض

"افهموها بقى"

طب نفهمها لكو إزاي؟ الستات مش محتاجين الإجابات العقلانية والتفسيرات العلمية لما تيجي تشتكيك من حاجة على طول الخط ..
ما بنقاش عا طول عايزين نسمع كمية الأسئلة بتاعة حصل إزاي؟ وفين؟ وإمتي؟
لأ.. حددي إمتي بالضبط؟ وكنتي مش مركزة ليه؟ وإزاي ما اتصرفتيش أحسن
من كده؟ وتفتكري لو كنت مكانك كنت هتصرف نفس التصرف ده؟؟!! طب

لما تهدي نتكلم !!

الستات لما بتشتكي مش عايزة تدخل في دوامة الاستجواب ودائرة السين سؤال جيم جواب المفرغة دي، بس بتبقى محتاجة حاجات تاني معاها ..

لو غلطت هي عارفة إنها غلطت ومش مستنياك تكمل عليها خصوصًا لو حاجة غصب عنها أو مش قصدها وهي اعترفت بكده ..

إحنا مش بنشغل العقل بنسبة 90% زيكوا.. ربنا ما خلقناش كده بس خلقك دماغك تكون كبيرة وعاطفتك أقل عشان تقدر تقويها لما تضعف بس ما تجيش عليها زي ما جت عليها الظروف ..

لما بنيجي نحكي أو نشكي مش مستنين أسئلة علل وبم تفسر وجو المفتش كرومبو ..

بنستنى طبطبة.. حضن.. ابتسامة صغيرة معاها كلمة فداكي أو معلش.. مش عايزين أكثر من كده.. وبعدها نحلل براحتنا ونشوف المشكلة فين ونعالجها .. عايزين نهدي الأول وبعدين نجابوب على شألة الأسئلة اللي بتسألوها... عشان نعرف نجابوب صح وناخد درجة عدلة ..

إحنا مش بنعرف نحلل كل حاجة ونشوف إيه النتائج المترتبة عليها كمان 5 سنين هتكون إيه ..

الراجل بيتكلم لو عايز إجابة وحل بس لأن ده تكوينهم والستات بتتكلم لو عايزه مع الحل اهتمام أو حد يطمئنهم لأن ده تكويننا ..

ساعات كتير الزوج يقول لمراته طب إنتي بتحكي لي له دلوقتي ؟

هي بتحكي للمشاركة.. بتحكي عشان مش بتحب تحس إنها لوحدتها ..

ممكن جدا تكون مش عايزة حل أو إجابة ..

هي بس عايزة تحس إنك جنبها ومعها مش عشان تجاوب على سؤال كانت فين
دماغك ساعتها؟ وبدال ما إنتي كويسة طب عايزه إيه دلوقتي؟ طب أنا المطلوب
مني إيه؟

المطلوب مشاركة وتفاعل وطبطقة إن أمكن من غير بحر الأسئلة والاستجابات
والنتائج المترتبة.. بس كده..



تطبيق مكتبة كتب مجانية
متوفر على جوجل بلاي

موبايل الحاجة ...

موبايل ماما بالنسبالي دليل حيّ إن لسه في بركات وظواهر خارقة لسه بتحصل في الحياة مش كلام ويس ..
حاجة كده في مستوى قصص ما وراء الطبيعة ولغز محير أكثر من قصص ما وراء الطبيعة!

معرفش إزاي موبايلها علطول فيه رصيد...

طب أقسمك بالله علطول فيه رصيد ورصيد محترم كمان يعني ممكن أبيع موبايلي الجديد بكرتوته عشان أجيب الفلوس اللي أعرف أشحن بيها زيها ...
عمري ما اتكلمت إلا لما تجيلي رسالة إن الرصيد المتبقي رقم وجنبه صفرين!!! أنا بقى مبشوفش غير الصفرين دول في رصيدي وعمري ما سمعت رسالة مسجلة قد ما سمعت "عفوًا لقد نفذ رصيديكم"!!! أنا ٢٧ يوم في الشهر بكون سالف على النوتة أصلًا!!!

علطول موبايلها مشحون!! ودي حاجة لا يقبل تصديقها أي عقل بشري!!
عملتها إزاي دي معرفش؟ الحاجة طلعت أروبة جدا أقسم بالله!! في أي وقت تمسك الموبايل تلاقيه ١٠٠٪ ده إيه السيطرة والجبروت ده!!! والأعجب إنه بيتشحن مرة الصبح وإن جدع يخلص شحن قبل ما ماما تنام!
إنت حتى لو مسكته ساعة وهريته تليفونات و فُرجة على فيديوهات هتلاقيه لسه ١٠٠٪ بمنتهى الوقاحة!! أعتقد إنه بيخاف من أمي لحسن تمسكه الشبشب زينا!!
ده أنا موبايلي بيبقى بيرضع من الشاحن طول اليوم ومبيكملش ال-٢٥٪ ويبقى

مشيلهاني جميلة أصلاً إنه يبشحن يعني وكده!!! وعمري ما شوفته ١٠٠٪ إلا أول يومين اشترتهم فيه !!!

عندها في الجاليري صورة لأي مناسبة قد تخطر أو لا تخطر على بالك.. "عيد فطر، عيد أضحى، عيد غطاس، حد الزعف، طهور، سبوع، ورد، جناين، عصافير، أطفال، صور لكل أفراد العيلة بكل مراحلهم العمرية، ممثلين، ممثلات، كل صور صباح الخير ومساء الخير و٨ ألبومات لوحدهم صور لجمعة مباركة "صور للسقف والمروحة وصباح رجلي وفانلة أبويا بالهبل مصورا هم بالغلط على تليفونها! موبايلها محدش يقدر يفك شفرة الأسماء بتاعة الكونتاكس إلا هي ودي مش نصاحة خالص، دي جت معاها كده بس مش أكثر.. هتلاقي "محمد أ دي اختصار محمد أخويا مثلا.... نوال م يعني نوال مكتب "معرفش بتبقى مكسلة تكمل الاسم للآخر ليه !!

موبايل ماما لا هتلاقي فيه خدشة وهتلاقي السكرين بتاعته بتلمع كأنها لسه شارياه حالاً وأعتقد إنها بتلمعه بجلانس وبليدج... ولما أم حمادة بتيجي تنضف معاها الشقة بتخليها تاخده فومين !

سبحان الله مهما يقع ميجرالوش حاجة وإحنا موبايلاتنا لو عطسنا في وشها تجيب الإسكرين نصين!! معرفش بتبقى قارية عليه تعويذة واللإ إحنا اللي فلوسنا حرام الصراحة ..

أمي تليفونها لما بيرن بتقولي مين بيتكلم قبل ما تبص على الشاشة وأعتقد إنها مخاوية مجموعة جن صغنن حديثي التخرج شغال في true caller فا بيوشوشها مين بيتصل قبل ما تبص على الموبايل!! لأن اللي بيحصل ده مش طبيعي!! دي بتقولي قومي هاتي الموبايل خالتك هدى بتتصل!!! هو في كده !!

متواصل في الودان أو طلبات بلا توقف ...
عشان نشيل الصدا على المعلومات اللي ساحت من القعدة ..
عشان نقدر نسد احتياجات صعب أوي تتحقق بمرتب الزوج بس في الزمن ده ...
إحنا بنزل الشغل عشان نشرب كوباية النسكافية سخنة مش متلجة ..
عشان نتكلم مع ناس من سننا، نرد عليهم ويردوا علينا مش حديث من طرف
واحد.. كلامه كله "نووووو... أمبوووو... كخ..... ماممم " ..
بنزل عشان نجيب لولادنا كل حاجة نفسهم فيها قبل ما نفكر نجيلنا بلوزة أو
شوز ...

إحنا بنزل الشغل عشان نفصل منهم شوية ونعرف نرجع نكمل معاهم ثاني، الحوار
كله إننا من كتر تعب الأمومة اللي هي طبعا نعمة ما بعدها نعمة. ساعات بننسى
ناخد ولو نص ساعة بريك لنفسنا ...

لو شفت أم نزلت ولادها حضانة وراحت الشغل فا ده مش معناه إن قلبها
قاسي... أو إنها مهملة! أبدأ... ساعات لزقتنا فيهم علطول بتخلينا عصبيين وأعصابنا
محتاجة راحة، حتى لو الراحة دي كانت كام ساعة شغل مش استجمام في سبا
وچاكوزي

في أمهات معندهاش أوبشن إنها متنزلش الشغل، خصوصًا بعد ما كل حاجة غليت
والحياة بقت صعبة...

في أمهات مش بتندلع وبتشيل الهم مضاعف عشان هي بين نارين... نار إنها تقعد
بس هتتأثر ماديا ونار إنها تنزل وتسيد حضن ولادها ...
محدث يعلم ظروف كل واحد وكل واحد أدري بحاله ...
ليه ما بنتقبلش إن أم تقول أنا تعبانة... مرهقة ...

وبنعلقلها المشائق على كلمتها كإنها فجرت !!!! وكأنها مش مقدره النعمة اللي في إيدها!

ويبقى ردنا الغشيم بتاع "ما كل الأمهات بتعمل كده" سابق تفكيرنا !!!!!
الأمومة لو بتتعمل على حق عمرها ما هتكون سهلة ...
في ناس بتخلف وترمي ولا شاغلهم تربية ولا حاجة...
دول اللي مبيتعبوش لكن غير كده فالأمومة أشق مهمة في الكون.... وجزاؤها الجنة
.....

في ستات القعدة في البيت بعد الولادة مع اكتئاب ما بعد الولادة بتخليهم عايشين
أيام صعبة جدا ومجتمعنا بيسميا دلع ...
الحاجة الوحيدة اللي بتحسنهم النزول والشغل ...
فالما بنقول عايزين نفصل مش معناه إننا بنتبطر على النعمة زي ما كتير يقولك ما
تحمدوا ربنا على النعمة اللي إنتوا فيها!! مين قالكوا إننا مش مقدرين النعمة!!! ليه
تحكموا من الأساس؟ ... ده ظلم ...
إحنا بنفصل عشان نقدر نواصل مهمتنا كأم بشكل سوي ومش من حق أي حد
يتهم حد بحاجة لمجرد نظرة سطحية قرر يصدقها مع نفسه ...
بلاش تحكموا على حد الله يباركلكوا، ركزوا في حياتكوا أولى ...
كل واحد قصته غير الثاني ...
كل واحد ظروفه مختلفة ...
مفيش حاجة اسمها وجه نظري صح وليذهب الآخرون إلى الجحيم !!!

تطبيق مكتبة كتب مجانية
متوفر على جوجل بلاي

"أنا جالي عريس... كلايكت عاشر مرة"

- خير يا سمر.. جيباني على ملا وشي ليه؟ اتصلتي بيا فوق الخمسين مرة عشان
أنزل أقابلك حالاً..

خير بقى إيه الموضوع اللي يستاهل كل الزن ده، أنا كنت هرمي الأيفون من
الدور السابع من كتر الزهق والله وإتي عارفة كويس غلاوة الأيفون بالنسبالي!
= طول عمرك على قلبك مراوح!!

طبعاً ما أنا الكلبة اللي سايبها تهووو وبتطلع عندها لحد ما ترد عليها!! إنت ليه
بتعاملني كإني دالقة نفسي عليك وعمرك ما حسيت بيا ...
- يوووووه هو الموال ده مش حفظناه بقى، ومش قولنا نطل نعمة كلبة والهبل ده.
غلط يا سمر...

ميصحش تقولي على نفسك كده... إنتي جميلة يا ماما!! هو في كلبة بتحط كمية
الميك آب المبالغ فيها دي!!! ده إنتي صارفة ومكلفة! ادخلي في الموضوع بقى عشان
حقيقي زهقت..

= و كمان بتستظرف.. عامة أنا جيت أبلغك إن جالي عريس إمبراح..
- وإيه الجديد؟ ما الخبر ده بتصبحيني بيه وبتسبني بيه بقالك سنتين يا سمورتي؟!
إنتي مش ملاحظة إن بقى بيجيلك اتنين في اليوم!! وكل يوم؟ يعني واحد الصبح
وواحد بالليل!! ده إنتي ولا الأتي بيوتيك يا سمر والله... محسساني إن شباب
مصر مش لاقين واحدة يخطبوها إلا إنتي؟ طب باصي لصحباتك شوية مش

كده!!!

- = إنت مُصر تستظرف, وكمآن بتستقل بيا!!!

طبعا ما أنا اللي رخصت نفسي معاك!! عامة العريس المرة دي ميترفضش!! باي
قالي مش هنرفضه..

- بغض النظر عن كلمة باي اللي بتقوليا على عم جلال المنجد، بس ها كملي!
= كله مميزات الصراحة.

- عظيم.

- =.. وسيم شبه توم كروز في عز شبابه أيام mission impossible
الجزء الأول.. وعنده شقة في كومباوند في التجمع وهياخد شقة في العاصمة
الإدارية.. بيحضر الدكتوراه في هارڤرد وهيشغل في ناسا أول ما يخلص
وعنده 5 ملايين دولار في البنك... وجايب عربية رانجلر ومقطوع من شجرة
وميت في دباديبي..

- ميت في دباديب مين يا عنيا؟ هو أصلاً لحق يشوفك!! ده لو كان
الفنان مصطفى قمر بذات نفسه فا مش هيلحق يدوب في دباديبك بالسرعة
دي!

- هو اسمه إيه؟

= اتريق براحتك وعايز تصدق صدق مش عايز إنت حر!

- طيب هو اسمه إيه؟

= فادي..

- اسم جميل... طيب أكيد معاكي نمرته صح؟

= آه ليه؟

- طيب إتي لسه بتحبيني يا سمس؟
- = - طبعًا يا حبيبي أومال أنا جبالك جري ليه!! إنت عندك شك... اخص عليك!
- طب وحياة حبك ليا تكلميلي فادي باشا يشوفلي أي شغلانة عندكوا لما تتجوزوا..
- أنا ممكن أسوقلكوا العربية الرانجلر وانتو تقعدوا ورا تحبوا في بعض براحتكو! أنا أجمد عربية ركبها كانت ١٣٢ وأبويا كان بيعلقني لما بسوقها..
- = - إنت لسه بتستظرف يا رامي؟ طب والحب اللي بيننا؟
- حب إيه يا ماما!! ده واخذ في العاصمة الإدارية يا حبيبي إتي مش مدركة هو دافع كام..
- = - طب ووعدك ليا؟
- تبقي كلبة يا سمر زي ما قولتي من شوية لو شارية وعودي ومش مالي عينك الخمسة ملايين دولار!! ده إتي بتتشعطي في الميكروباص وبترقصي عشرة بلدي لما بتركي العربية المكيفة في المترو!! ويا ما اتحرشوا بيكي وإنتي راكبة عربية الرجالة!! أقسم بالله يا سمر لو ما تجوزتيه لهروح آخذك من إيدك وإبقي أنا الشاهد على جوازكو..
- عشان تعرفي قد إيه أنا همي على مصلحتك..
- = - إنت معندكش دم يا رامي..
- لا والله، إتي زي أختي ويهمني مصلحتك يا سمر، بس طلب أخير لو في يوم كنتي حبتيني بجد..
- = خلاص بقيت زي أختك؟

- آه وتحرمي عليا كمان.. بصي أنا نفسي أقولك حاجة بس مكسوف..
- = قول يا حبيبي، أنا كنت عارفة إنك عايزني أستناك وأصبر عليك شوية
لحد ما تبقى جدير بيا وتتقدملي..
- تستني مين وجدير بيكي إيه بس؟ كفاية شغل مسلسلات تركي بقي! ده
أنا محتاج سنين ضوئية يا ماما عشان أجبلك شقة 80 متر في الإسكان
الشعبي!!!
- أنا ليا طلب بجد... وحياة أمك يا شيخة، وحياة الحاجة "نحمده طرشي"
لو البروفيسور رامي مكانش محتاجني في شغلانة وعنده أخت تباصيهالي
وأهو نبقي عيلة واحدة وتبقي تحت عيني لما توحشيني ونعيش مسلسل
العشق الممنوع وكده بدل ما التركي لاحسلك دماغك كده..
- = إنت واطي وسقطت من نظري على فكرة..
- أنا عارف يا روجي بس إوعي تنسي اللي قولتلك عليه وأرجوكي بلاش
ترنيلي على موبايلي تاني عشان مقدرش أخون الأمانة.. إنتي مبقتيش بتاعتي
يا بنتي!! أنا هاجي على قلبي في سبيل سعادتك يا سمر..
- = - قد إيه إنت حقير..
- وقد إيه إنتي كدابة... اجري يا بت من هنا! اجرررري!



تطبيق مكتبة كتب مجانية

متوفر على جوجل بلاي

"لغز الريموت كنترول"

مش قادرة أفهم إيه سر حب امتلاك الراجل المصري للريموت كنترول !
الموضوع فيه إنَّ!! فيه لغز ولا لغز مثلث برمودا!

من أول ما الراجل يدخل برجله من باب الشقة تلاقيه حاضن الريموت وناقص
يلفه بجنازير حديد لحسن مراته تتجنن في عقلها وتمسكه وممكن يفكر يكهربه عشان
محدث من الولاد يقلب على كرتون ...
والغريبة إنه بيقلب في القنوات ويقلب كإن حد بيجري وراه وولا بيتفرج على
أي حاجة !!

بس الأكيد إنه هيسيب التلفزيون شغال على أي قناة تنتهي بمقطع سبورت حتى
لو مش يبصلها بس أهى عاملة حس كخلفية صوتية لحياتنا !!! ومعرفش ليه صوت
كابتن مدحت شلبي مع إنه بيستفز كل أفراد الأسرة من كبيرها لصغيرها إلا أن أي
قناة هو طالع عليها لازم متغيرش !!

ولازم مرتضى منصور لو ظهر أو صوته طلع نوقف القناة!

فا مراته لما بتزهق وعنيها بتوجعها من التقليل بتقوله هات أجيب فيلم واللا
مسلسل بدل ما أنت ولا بتتفرج ولا بتتطل حتى على القناة بطرف عينك! يقولها
لأ!! هي حبكت !! ما أنا سايبهولكو طول اليوم, وينسى إن مراته بتشتغل زيه زيا
أو مبتفتحوش إلا وقت ما بيرجع عشان مبتكونش فاضية قبلها... !

ومعرفش برضه ليه الراجل بيركه ٦٠ عفريت لما مراته تجيب القناة على cbc سفرة

واللا فتايت!! تلاقيه بيتنطط زي الكورة الشراب!! ما لك يا بابا؟ متعفرت ليه؟
يقولك ما هي بتتفرج وآخرها بتطبخ فاصوليا!! وهو انهارده ضارب كوردن بلو
وامبارح نجرسكو وعرق فلتو ومراته منغناه!!
اللي فهمته إن الراجل بدل موجود يبقى الريموت لازم يكون في قبضة يده "على
رأي محمد هنيدي في عفروتو" حتى لو كان هيشغل التلفزيون على قناة لسه
مفتحتش بس أهو غلاسة كده وخلص.

"مرض العصر"

بنت عندها 18 سنة كانت بتتكلم معايا وطلبت مني أوصلكم حكايتها ...
أرجوكم قولي لماما وبابا يسبوا الموبايل .
أنا زهقت واتخنقت ..
وكرهت اليوم اللي البتاع ده دخل حياتنا!!
بابا وماما يقعدوا معانا في البيت بس مش سامعينا ..
بيتغدوا معانا وأكلهم بيبرد عشان بيردوا على إيميلات أو على صحابهم في جروب
هما عاملينه للشغل أو جروب من أيام الكلية!!!!
بيخرجونا في أحلى حتت بس وشهم مش يبص علينا ولا ينطقوا معانا كلمة ..
مشتركيلنا في أغلى نادي بس عمرهم ما شافونا في تدريب عشان وشهم في
الموبايل!!

ماما وبابا بيرجعوا من الشغل يفتحوا اللاب توب والآي بادز وبعدها الموبايلات
لحد ما ننام ..

محدث بقى بيرد عليا وأنا بقولهم تصبحوا على خير إلا مرة كل عشر مرات !!!
بقوا بيفتكروا عيد ميلادنا من Facebook events مش أكثر وبدال ما كنا
بنحتفل زمان، بقوا بيكتبولي على الووال happy birthday!!!! ويبقى كويس أوي
لو افتكروا يكلموني يقولولي عشان دايم مشغولين !!!

من كام سنة ماما كانت لازم تسألني عملت إيه في يومي، دلوقتي ولا بتسأل..
علطول بتكلم صحابها يا ماسنجر يا كool ..
كانت بتسألني مين صحباتك وبتحبي إيه وإيه بيضايقك، دلوقتي كل ما أكلهم
يقولولي بعدين.. ومش بيصولي وهما بيقلوها حتى !!!..
بابا بقى يقول لأخويا ابعثلي اللوكيشن اللي إنت فيه عشان يعرف هو فين ويفضل
بال-10 ساعات ما يعرفش عنه حاجة !!
هو كده يعني متظمن عليه ؟ !!

أنا لما ببقى عايزة ماما وبابا يردوا عليا بكتبلهم على الواتس آب !!
كل كلامهم عني على البروفايل بتاعهم وصورنا سوا تخلي الناس تقول إننا عيلة
متناسكة ومترابطة مع إننا أكثر عيلة مفككة في الدنيا.. عيلة ما تعرفش أي حاجة
عن بعض ولا عايزة تعرف ...

كل اللي بيجمعنا صورة وتاج وكومنت.. أكثر من كده مفيش !!!
أنا نفسي أكر كل الموبايلات وال- ipads اللي في بيتنا واللي في كل بيت !!!

تطبيق مكتبة كتب مجانية

متوفر على جوجل بلاي

بابا بيقولي إنتي بقيتي في سنة كام وبيسأل بجد مش يهزر ...
أخويا بقى يرجع وش الفجر وعادي ..
ما بقاش شاطر زي زمان وعادي ...!!!
محدث يعرف بيروح فين ومع مين وعادي؟!!!
مصاريفه بالهبل ومحدث مهتم يعرف بيودي الفلوس فين !!! وبرضه عادي!
بابا وماما ما بقوش يعرفوا عننا حاجة عشان حته حديد في إيدهم !!!
بابا وماما بقى أهم حاجة عندهم دلوقتي إن الموبايلات تكون في الشاحن ويصحوا
يلاقوها full غير كده كل حاجة عادي ومش مهمة !!!
حتى إحنا ...!!!
يا ريتهم ما جابوا سمات فونز!! يا ريتهم ..



تطبيق مكتبة كتب مجانية
متوفر على جوجل بلاي

"مختلفين ولكن...."

في أي خلاف بين الزوج وزوجته تلاقيه يقولها وحواجبه 111 ووشه كله حزن و
أسى: "إنتي مش ملاحظة إننا مختلفين في كل حاجة" ويتنهدوا وييصوا لبعض
بصات كلها شجن، وكل واحد يروح يتزوي في حته!! ويقعد يقلب الجملة دي في
دماغه ليل ونهار!!

"مختلفين في كل حاجة" اللي اتهمت بيها زوجتك هي أهم سبب خلاك تتجوزها..
ومعروف للجميع إن الأقطاب المتشابهة تتنافر ..
الواحد لو هيتجوز نسخة ثانية منه فإيه الإضافة؟
لو هيتجوز توأمه طب كده استفاد إيه؟

طب بدل إنتو مختلفين أوي كده إزاي اتشدت ليها قبل الجواز وكنت بتتمنى الأيام
تعدي عشان تكونوا سوا؟!
إيه الحلو إنك تتجوز حد شبيهك في كل تفاصيلك!!؟

يبحب نفس اللي بتحبه وبياكل نفس اللي بتاكله وبيكره نفس اللي بتكرهه بالمللي!
هتتحس بالتجديد والتغيير إمتى وإزاي؟

هتتحس إن في حس عايش معاك إزاي لو كنتو كوبي بيست من بعض؟
اللي بيشدنا للآخر إنه مطرّع فإ انبرنا بالطرّعة دي لأنها جديدة علينا ...
إنه دمه خفيف وبياكل الجو ...

إنه حنين اوي وإحنا نفسنا في حد كده ..

إنه بيكمل كل اللي ناقصنا مش بيكرر نفس اللي جوانا بالحذافير!!

الاختلاف أهم أسباب الانجذاب وإن الحياة الزوجية يبقى لها طعم وفيها حياة
و شد وجذب وشطة تشعل الحب شوية ...
والجميل بقى إنكوا تجتمعوا في كام نقطة تحسوا فيها إنكم مشتركين في حاجات سوا ...
اختلافكو مش عيب... اختلافكو ده هو المغناطيس اللي خلى قلوبكو تتحرك
لحد ما توصل وتعشق في بعض..

"هو إنتي بتعملي إيه طول اليوم أصلا؟"

لو مش عارف مراتك بتعمل إيه طول اليوم وعندك أطفال، كفاية إني أقولك إنها
بتستحمل #الزن
هقولك يعني إيه زن الأطفال لأنك كراجل مش بتعامل معاه إلا ساعتين في اليوم
تقريبا، وغير كده في شغلك، يا نايم، يا مش عايز حد يزعجك، فا خارج مع صحابك
..
الزن: هي ترددات صوتية بموجات صوتية مختلفة من أول الهمس البسيط المتكرر
بماما ماما ماما ماما اللي بتحس فيه إن لابسك عفريت وعمال يزن في ودنك لحد ما
بنوصل للصريخ الحيّاني على أتفه الأسباب ..
أسباب الزن بقى :
- بيزن عشان مش بيعرف يطير.

- بيزن عشان سبايدر مان مش بييجي يلعب معاه بلعبه.
- بيزن عشان افكر إنك مجتيلوش كاندي من ٨ شهور فا الذكرى نقحت عليه دلوقتي.
- بيزن عشان أخوه لمس كوبايته بالغلط.
- يلعب فا بيسلي نفسه بالزن.
- زهق من اللعب فا بيزود زهقه بالزن.
- عايزك تلعب معاه فا بيزن.
- مش عاجبه لعبك عشان مش بتمشي ع الحيط فا بيزن.
- عايز ياكل.
- مش عايز ياكل.
- حران فا بيزن عشان تحميه مثلا.
- بردان ف بيزن عشان تلبسيه بيجاما بتاعة باباه.
- عايز أخته تلعب معاه.
- مش طايق أخته تلعب معاه.
- عايز يخرج أو يتفرج على كرتون حافظ حلقاته صم.
- عايز يكدر.
- شايفك هترتاحي فا اتكدر فا بيزن.
- مش عارف هو عايز إيه فا بيزن.
- تعب من الزن فا بيزن.. معروفة يعني.
- بيزن عشان بيتخانق على فتفوته على الأرض مع أخوه.
- بيزن عشان دخلتي التواليت وسبتيه!! إنتي اتجننتي باين.

الزن ال- mono tone المستمر بلا توقف ممكن يخليكي تنتحري وترمي نفسك من الدور العشرين واتي ضميرك مرتاح لأن خلايا مخك فقدت القدرة على السيطرة وبقيتي كائن غير سوي نفسيًا ...

مدة الزن بتتراوح من ١٠ ل- ١٢ ساعة يتخللهم عياط أو برطمة بدون مبرر، بس الحاجة الوحيدة اللي ممكن تديكي أمل إنهم يبطلوا زن وهما نايمين ...
عشان تقفل الموضوع ده مش بطر على النعمة، بس فعلا لازم الأبهات يحترموا تعب الأمهات خصوصا في تحملهم الزن اللي بيكون بره البيت وجوه البيت وفي النادي والمطعم وعند تيته والصحاب ...
والزن بيحلى أوي لو بتتكلمي في الموبايل في حاجة مهمة أو بتحاسبي أو بتحاولي تفكري حاجة ..

لازم نحترم ضغط الأم وإرهاقها من كتر الزن والطلبات ..
حضرتك لو عميل عندك زن عليك مرتين في اتصال ممكن بتقفل موبايلك من الزهق والتوتر وغالبا بيكون الموقف ده قفلك يومك فابجد مراتك بتعمل كثير ومستحيلة كثير أوي... خليك سند ليها عشان متنطش من البلكوثة والابتسامة باطة من وشها ..



تطبيق مكتبة كتب مجانية
متوفر على جوجل بلاي

"فاكر؟"

فاكر لما كنت بتشتكي منهم زمان ..
إنهم دايمًا يسألوك ودايمًا بيقوموك ولما تميل يعدلوك ..
مكونتش فاهم ليه مش سايينك براحتك ..
نفسك تكبر انهارده قبل بـكره وتتصرف لوحدك ..
نفسك تتخرج عشان يدولك مساحتك ..
فاكر ..

لما كنت بتزعل لما يحددولك معاد للرجوع..
وتتكدر لما كانوا بيقلقوا لو اتأخرت ...
تستغرب ليه هما مزودينها.. ليه ملعبكينها !!
ليه بيهزقوك لما بتقل موبايلك ..
ليه مصممين يخنقوك ..
ليه مصريين يجرجوك !!
فرقت إيه 12 من 2 من 4 من إنك تبات بره، ما إنت خلاص كبرت !!
كانوا فاكرينك عقلت !!
عشان كده مش هيسيبوك !!
فاكر ..

لما كنت ترجع تلاقي البيت كله نايم ما عدا هما،
أبوك واقف في الشباك عنيه جاية آخر الشارع.. ماسك موبايله بكل قوة ..

وأأمك بتدعي ترجع بالسلامة وتسمع أبوك بيقول خلاص رجع ما تخشي جوه ..
أول ما بتخبط عليهم، بتشوف وشوشهم صفرا من القلق ..
وأبوك وأأمك جسمهم داب في العرق !!
مع إنكوا في عز البرد وكل ده كان م القلق !!
فاكر ..

لما كنت بتشتكي إنهم عايزينك تذاكر وتبقى أحسن واحد ..
بابا يسمعك وماما تراجعك ويقولك لازم تبقى أشطر واحد ..
حل المعاصر .. حل سلاح التلميذ مرة واتنين ..
تستغرب إنهم زعلوا إنك الثاني على المدرسة !!!
أول ما تفرقش من ثاني من خامس !! هو إنت داخل هندسة !!!
زعلاين إنك نقصت في العربي درجة ..
كنت شايفهم بيخنقوك ..
بيكلكعوها... بيحبكوها ..
وأديك دخلت هندسة !!
وطلعت أول مدرسة ..
عرفت ليه؟

فاكر ..
لما كنت صغير وتعيط على كل حاجة ..
مكانوش بيلبوا كل طلباتك، مع إنك إنت أعلى حاجة ..
دى مش غلاسة منهم ..
ده مكانش بخل منهم !!

لكن عشان تطلع راجل عارف قيمة القرش ..
تعرف قيمة الحاجة عشان في حاجات ما بتتشحش .
لولا كده كنت هتتعب أوي في الدنيا ..
وهتتعب كل حد جنبك ..
وهما مش عايزين يتعبوك ..
كان نفسهم يريحوك ...
فاكر ..

لما كبرت، باباك كان محدلك مصروف ..
كان خوف عليك من نفسك مش ع الألوف ..
الفلوس بتروح وتيجي بس أنت ما تتعوضش ..
كان لازم يخليك بغيرك ما تتأثرش ..
وعينك تبقي مليانة ..
متبقاش فارغة ما تقدرش !!
فاكر ..

لما كان بيعرف مين صحابك وبتروحوها فين ..
ويتصاحب عليهم عشانك أنت ..
عشان تحس إنه صاحبك زيهم ...
وإنه واحد منهم ..
هو أنت فاكر إنه مبسوط أوي بالقعدة وسطكوا !!
ده قاعد معاكوا ويضحك معاكوا مع إنه مش من سنكوا ..
لولا سؤاله واهتمامه كان ممكن تعرف ناس شمال،

دلوقتي هو عارف إنه ربي وتعب وقاعد مرتاح البال !

فاكر ..

لما كنت تغلط غلطة ويخاصمك ويقوم من على الأكل ..

بس مواردك الباب عشان نفسه تيجي تنكشه بكلمة عشان تروقوا ثاني ..

فاكر ..

لما ضربك .. ضربك من ورا قلبه ..

ضربك وقفل عليه الأوضه عشان ما تشفش دمعة نزلت لما قلبه لما قلبه .. اتوجع

عليك ..

غصب عنه كل ده من حبه ليك .. خايف عليك ..

فاكر حضنه لما تنجح .. لما تعلا ..

فاكر حضنه لما تزعل ..

فاكر حضنه يوم ما كل الناس سابوك وانشغلوا عنك ..

فاكر حضنه لما كله إداك صابونة ..

فاكر حضنه لما قلبك اتكسر ..

لما م الحنقة اتعصر ..

هو بس اللي كان معاك ..

هي بس اللي كانت جنبك ..

هي بس اللي كانت عارفة إنك حبيت زميلتك ..

هي أكثر واحدة بتحس بيك بس استنتك لحد ما تيجي تقولها .. تحكيها وتاخذ

رأيها ..

هي بس اللي كانت بتدافع عنك من وراك وعارفة إنك غلطان بس إنت حته منها ..

وقدامك تخاصمك عشان يتصلح حالك وعمرك ما تعصي أمرها ..
هي بس اللي بتدعيك في كل صلاة قبل ما تدعي لنفسها ..
هي اللي لو تعبانة وإنت نفسك في حاجة هتقوم تعملها لك .. وهي مبسوسة وسعيدة ..

هي اللي سهرت وطببت وكبرت ودلعت وشدت عليك في زعلها ورجعت
بسرعة شدتك لحضنها .. عشان إنت حته منها ...

كل ده مكانش غلاسة ..

مكانش تحكم ..

مكانش أي حاجة ... غير إنه حب عرفت قيمته لما كبرت ..

عرفت قيمته لما شقيت طريقك لوحدك ..

عرفت قيمته لما ربنا رزقك بعيال ..

هتخاف عليهم زي ما أهلك خافوا عليك ..

وبرضه لما يكبروا هيفهموا وهيقدرُوا

وهيعرفوا إن ده مكانش تحكم مكانش مراقبة ...

مكانش أي حاجة غير حب ملوش بديل ..

ده حب اتخلق عشانك تفصيل

" وقل ربي ارحمها كما ربياني صغيرا "

"التيشر خط أحمر"

تطبيق مكتبة كتب مجانية

متوفر على جوجل بلاي

- آسر حبيب قلبي... هات شنتطك عشان هذاكر "توب علينا يا رب "

*
🤔 🤔 🤔 🤔 🤔 🤔 🤔

- ياللا يا سكر إنت ده إيه؟

* alligator

- طيب ينفع برضه تكون crocodile صح؟

* لا يا ماما... التيتشر قالت alligator

- بس يا حبيبي هما حاطين حرف ال- c يبقى crocodile...

* لا التيتشر قالت alligator.. أكيد الكتاب غلط ...

- يا ضنايا الاتنين صح أقسملك بالله العظيم... معلش المرة دي خلي التمساح الرذل

ده يبقى اسمه crocodile... معلش... امسحها فيا ..

* لا اسمه alligator.. التيتشر قالت كده.

- طيب إزاي هتكتبها تبدأ بال- c ؟

* هتصرف.. التيتشر قالت كده..

- طيب قولي يا حبيبي 5 how to make ؟

* plus 2 3

- ويمكن إيه كمان؟

* هو كده حلو... التيتشر قالت كده ...

- طيب مش ممكن 4 بلس 1؟

* لا مش ممكن... التيتشر قالت 3 بلس 2 ...

- يا حبيبي التيتشر أكيد قالتلكوا 3 بلس 2 ..

* لأ مقاتلش.... قالت 2 بلس 3..... مش 3 بلس 2.... أنا اللي عارف هي قالت

إيه بالظبط..

- استغفر الله العظيم يارب... ما هما هما يا ابني!!! ما تشلينش بقي !!!

* بس التيتشر مقالتش كده

- رحمتك يا رب.... طيب بص أنا بدأت أفقد أعصابي وأرجوك ما توترنيش أكثر

من كده

- يلا اكتب ال- date وبعدها your name

* لا التيتشر قالت ال- name الأول ...

- لا قالت ال- date الأول... طول عمرك بتكتبه الأول.

* لا التيتشر قالت أول أول أول إمبراح ال- date الأول ..

- طيب قولي البطاطس تعتبر vegetables واللا fruits

* لا دي ولا دي... التيتشر قالت veggies

- ما vegetables هي veggies ...

* لأ التيتشر قالت veggies ... مفيش حاجة اسمها vegetables

- طيب خلاص كفاية مذاكرة عشان حضرتك رفعتلي الضغط وكرهتني في التيتشر

مع إني بحب الست دي وبحترمها... قوم هات ال- water bottle...

* غلط... التيتشر قالت اسمها water flask

- إن جيت للحق اسمها زمزمية.

* إيه؟ هي water flask بس... التيتشر قالت كده.

- يعني ماما كل كلامها غلط يا أسر؟

* بدال التيتشر مقالتش كده يبقى غلط

- طيب بقولك هي التيتشر بتقولك الشبشب بتاع الحمام اسمه إيه؟

* مقالتش هسألها بكرة.

- = ب-850 جنيه يا فندم.
- حضرتك بتكلمني أنا؟
- والا بتحاسب اللي قدامي والا متعود تكلم نفسك فا بتعمل حاجات.
منتال كده في دماغك ده؟
- = لا بلكم حضرتك يا فندم.
- بس أنا سألت على جاكيت واحد مش ٤ ممكن تتأكد تاني..
- = 850 يا فندم..
- طب ممكن أعرف ليه؟ ده بتاع حته طفل ولا يسوى أساسًا !!
- = حضرتك ده إيطالي، ومتبطن من جوه بصوف مستخلص من أغنام المارينو عشان صوفها طري جدا، وطبيعي وبيتلبس على الوشين.
- طيب مين قالك إني عايزه إيطالي!! شجع بلدك يا عم!!
- ومارينو إيه وبورتو سخنة إيه!!! أنا عايز جاكيت مصري حنين إن شالله تكون متبنة بفروة خروف بلدي لسه متسلخش!! هو إحنا عايشين في الإسكيمو!! ومش عايزه بوشين أنا!! كفاية المدام عندي بوشين مش هتبقى هي والجاكيت !!
- = حضرتك ده اللي عندنا، ممكن تروح التوحيد والنور هتلاقي طلبك..
- إنت فاكِر يعني لما هتقولي كده هقولك لأ خلاص أنا شاب لارچ وفيس وهشترية!! طب عليا الطلاق وأنا هموت وأطلقها أصلا مش هجيبه...
- قولي أقرب فرع للتوحيد والنور، والا أقولك أنا هطلعه على جوجل مابس.. هو أنا هغلب وخليك إنت ف- فرو التعالب وجلد التاسيح وضوافر الخرايت!! أما محل مبالغ فيه صحيح!!!

في التوحيد والنور ...

- حضرتك الجايت ده بكام؟

- = ب- ٣٠٠ يا فندم ومتبطن بفرو وبيتلبس على الوشين ومعاه زعبوط هدية منه فيه..

- تسمحلي أبوسك؟

- = احترم نفسك يا أستاذ، إحنا محل محترم، حضرتك فاكروني شمال من بتوع الرينبو

- لا والله ما أقصد القذارة اللي جت في بالك، قصدي إني سعيد جدا، بس أحب أعرف نوع الفرو إيه؟

- = فرو معيز أعتقد..

- بس المعيز ملهاش فرو على ما أتذكر..

- = معرفش بقي..

حضرتك هتاخده واللا جاي تقلب فيه وتمشي، ده عليه طلب عالي جدا ويا

تلحقه يا متلحقوش..

- لا ملحقوش إيبويه ده أنا قتيك هنا.. وممكن أقتلك المدام لو تحب لأني أساسًا

هموت وأقتلها..

- = حضرتك عايز مقاس إيه؟

- مقاس ١٢..

- = هو ابن حضرتك كام سنة؟

- ٦ سنين، بس يا دويك عشان يكفيه ٦ سنين لقدام كده أنا هجيب منين يعني؟

- = عين العقل يا أستاذ، كده حضرتك بتفكر صح.. تحب ألفهولك واللا هتاخده في كيس عادي.

- في كيس عادي، بس متنساش تديني اللية مع الفروة هع هع هع هع هع،
ومتنساش الممبار عشان بجه هع هع هع هع هع..
- = اتكل على الله يا فندم.. كفاية أوي لحد كده.. اتفضل اللية أهى، قصدي
الجاكيت أهو..



لا تقولولي نكد ستات ولا بوز ستات.. أصلكوا مشوفتوش بوز العيال ونكدهم لما

بنقرر بغبائنا نؤديهم الملاهي !!!
هو ضحككم المأساة من موقف بسيط ياما حصل معانا ...

المشهد:

حضرتك بتكون مخرّج ولادك في ماچيك بلانيت اللي بسمّيه "البلاعة" لإن الكارت الملبوس اللي بتشحنه عشان تلعب بيه مها شحنته بيخلص في ٥ دقائق!! أراهنك إنك لو بعت شقتك اللي في التجمع وحتيت فلوسها في أم الكارت ده مش هيقعد معاك ساعة على بعض !!!

حضرتك بتدخل نافش ريشك وماسك إيد ولادك وكلك فخر إنك شاحنهم الكارت ب-١٠٠ جنيه وفاكر إنهم هينغنغوك لحد ما العيال تفيص منك وتجرجرهم على سرايرهم وعلامات النصر باظة من وشك، ولكن الحقيقة المرة إن الكارت ده بيخلص في ٣ لعبات أو ٤ بالكثير وغالبا مش هتحس بيهم لأن ولادك بيختاروا أتفه اللعب أو لعبة المشبك اللي المفروض توجّهه على دبايدب وتكسب تيكيتس كتير وده طبعا عمره ما بيحصل فا بتعيط على فلوسك اللي راحت على لعبة حقيرة زي دي وبتعيط على عياط عيالك اللي اتعشموا إنهم هياخدوا ٥٠٠ تيكيت من اللي ماسكهم الدبدوب ده

هتلاقي قدامك حل من الاتنين...

إنك تروح تشحن الكارت الملعون ده ب-١٠٠ جنيه تاني أووووو إنك تكون راجل ليك كلمتك وهيبنتك فاهتروح تشحن أم الكارت ده ب-٢٠٠ جنيه عشان تقطع الشورت في البيسين على رأي اللمبي !!!

عدّ بقى يا معلم من ١ ل-١٠ هتلاقي عيالك مرميين ومترمغين على الأرض كلايكت تاني مرة وواحد من ولادك من كتر اندماجه في العياط بدأ يجيب اللي في

بطنه وكل ده عشان الكارت ابن المتعفرتة ده خلص برضه وهما ملحقوش يلعبوا
بنكلة حاجة !!

فا حضرتك هتبص في محفظتك هتلاقي مفيش إلا البطاقة و ٢ جنيه فكة فا
هتحلف إن خلاص كفاية أوي لحد كده وهتقسملهم إن بابي معاه فلوس بس
قرر إن خلاص كفاية كده... مع إنك كنت هتدفع لو معاك وكان ممكن تبيع طحالك
عشان ميلموش عليك الملاهي ويجرّسوك زي ما عملوا ...
فتكتشف بعد مرور ساعة إن سعادتك فرتكت 400 جنيه والعيال عينيها مبقللة
من العياط ولا كإنهم كانوا بيتعذبوا جوه ومفرهدين من كتر العياط واتفضحت
فضيحة المتطاهر في الملاهي وشكرًا !!!



تطبيق مكتبة كتب مجانية
متوفر على جوجل بلاي

"آداب زيارة اللي لسه والدة ..."

- ما تتقلوش في الزيارة... خليكي خفيفة... ليه تروحي لواحدة لسه والدة سيزيرين والجرح مبهدها وتقعدي عندها ساعتين تلاتة وهي لسه مفاقتش من البنج؟ أو واحدة قعدت تولد طبيعي طول اليوم وتقعدي تربّي عندها طول اليوم!!!
- لو بتزوري اللي والدة في بيتها وحستها تعبانه وعايزة تنام.. استأذني وامشي.. سيديها تريح... مش لازم اللزقة أم غرا ...
- بلاش تاخدي ولادك وصحاب ولادك... هي مش رحلة يا حبيتي... خليكي خفيفا ومش هقولها تاني ...
- بلاش جملة "بطلي دلح" أو أومال هتعملي إيه لو عندك 5 عيال ... ماشي ..
- بلاش استظراف وشغل اللطافة بتاع هو إنتي لسه في التاسع واللا نسيوا البيبي في بطنك!!! بطن الولادة ما بتنزلش في 24 ساعة يا لذيدة يا برطمان العسل يا معجون النوتيليا يا سكر إنتي ...
- جو "هو إنتي لسه شوقتي حاجة" و"ده إنت هتنتسي اليوم اللي كنتي بتنامي فيه" وهتنتقي قد الدبة القطبية في موسم الشتا.... كل دي قلة ذوق ..
- سيبوا موضوع الرضاعة والأكل ده على جنب أحسن... بلاش حرام عليك رضيعه.. اتقي الله كرعيه.... إنتي سايباه جعان ليه... لو عندك نصيحة قولها بشكل حلو ما يضايقش .
- التدخل ال-over في تفاصيل البيبي مش حلو خصوصًا لو علاقتك بالأم سطحية... بلاش انتقادات... ممكن تنصحتها بطريقة ما تحسسيهاش بيها إنها حمارة ...

- "يااااا ايه الوحاشة دي ؟ !!"

هو طالع أسمر لمين ؟ !!

إنتي حلوة هو طالع شبه مين.. عوضها في البيبي الجاي !!!!

تعوضها إزاي يا حيلتها؟! واللا أقولك هنروح نبدلها بهاربر بنت ديفيد بيكهام

وهنرجعلك هوا !!!!

- بلاش تخلي مروان ابنك ييوس البيبي اللي لسه مكملش 3 ساعات من بقة الله

يباركلك ولا يشده من دراعه وتضحكي ضحكة بلهاء وتقولي أصله بيحب الأطفال

!!!

خلي مروان يرمط أخته وقوليله يسيب اللحمه الحمرا دي في حالها .

- بلاش استظراف في موضوع الاسم ...

سميته كده ليه ؟ !

حرام عليكوا اسمها !!

الكلام ده كله تزلطيه وتقفلي بقك ومنتقولي هوش... قولي اللهم بارك وخلص ..

- هو ماله البيبي صغير كده ليه ...

ماله أصفر كده ليه ...

هو مش ملاحظ ليه ...

هو أقرع ليه ...

التساؤلات دي إن دلت فتدل على معيار عالي من الجليطة تفوق كل التوقعات ...

- متقارنيش البيبي بأخوه أو أخته... كلهم ولادها يا فالحة ومش هتطبق عليهم كلمة

رخمة ...

قولي اللهم بارك برضه وأقسملك بالله مش هتتسخطي سحلية لو دعيتي للبيبي

وقولتي للأم كلام حلو ..

"ازواجية"

ييعجبنا الأجانب اللي بيتجوزوا بعض حتى لو حد فيهم عنده إعاقة ونعمل شير لصورهم ونكتب هو ده الحب وأووو ماي جاد وأنا نفسي أتجوز حد يجبني كده... لكن قليل أوي فينا اللي يقبل يتجوز واحد بيعرج سنة أو واحدة عندها مشكلة صحية بسيطة جدًا ..

يعجبنا الناس اللي بتتجوز بدبلتين وبس ويعملوا كتب كتبهم في جامع ويروحوا ونعمل شير لبوست عنوانه مفيش أحلى من البساطة وهيبييح وهالالالاح.. مع إننا بنتشرط على بعض في الجواز شبكة سوليتير وفرح في فندق فايف ستارز وفستان بشيء وشويات.. وشقة في المكان الفلاني وعفش بالشيء الفلاني.. يعجبنا الناس اللي بدأوا حياتهم من الصفر وكافحوا سوا واترمطوا عقبال ما وصلوا للي عايزينه ونقول اللهم ارزقنا حب كده وحياة كده مع إن لو اتقدم لمعظمنا شاب هيبدأ لسه من أول المشوار بيترفض منك قبل ما يترفض من أهلك إلا لو كنتي بتحبيه وغالبا الأهل بيرفضوه برضه عشان مش هيقدر يعيشك في نفس مستواكي.. ف المصير واحد !!..

تعجبنا قصص المآسي والناس اللي عانت وسفت التراب لحد ما وصلت لكل لو قابلتنا مشكلة بسيطة نقلب الدنيا ..

نعمل شير لقصص مرض أطفال وثقة أهلهم في الله عز وجل وتناثر قوي بس لو جه لولادنا دور برد على ترجيع بنقلب الدنيا ونصور الولد وهو مفرهد ونكتب أستغفر الله العظيم إننا جبنا آخرنا رغم النعم اللي مغرقانا... وليه يا رب بيتعمل فينا

"الوش الثاني"

مهما حاولتوا تعرفوا بعض في الخطوبة، في حاجات عمرها ما هتبان إلا بعد ما باب واحد يتقفل عليكم ...

في تفاصيل استحالة هتعرفوها إلا بعد أول اختلاف حقيقي في وجهات النظر بينكم وإنتوا الاتنين قدام بعض ووشكم في وش بعض، يعني مينفعش حد ينهي مكاملة ببساطة زي أيام الخطوبة عشان ياخذ هدنة من الطرف الثاني أو لحد ما يهدى ويخبي انفعالاته وعصبيته ...

في وش مستخبي عمر ما حد فيكو كشفه قدام الثاني..

وفي جوانب من الشخصية مش هتبان إلا وإنتوا شايفين بعض في أسوأ حالتكم "إنتوا مكتئبين أو ملكوش نفس لأي حاجة" .. أو وإنتوا لسه صاحيين من النوم وعندكم أرق طول الليل فا مش طايقين دبّان ووشكم ! أو وإنتوا عندكوا مشاكل وقر في الشغل.

في حتت متدارية مش بتبان إلا مع العشرة، مع وجودكم سوا في كل الحالات ..
مهما حاولتوا تفحصوا شخصية بعض في الخطوبة وتعملوا ناصحين وواخين بالكم من التفاصيل هيتبقى جزء خفي من شخصية كل واحد فيكم استحالة هتبان إلا وإنتوا عايشين تحت سقف واحد.. بعد ما اتشالت كل الوشوش اللي كنا بنلبسها طول الخطوبة عشان ميبانش مننا إلا الحطة الحلوة وبس ..

متخصّوش لو لقيتوا جوانب جديدة في حياة اللي اتجوزتوه لإن ده الطبيعي، وزى ما إنت بتكتشف فا الطرف الثاني هو كمان بيكتشف بس كل اللي بندعيه إن يا

رب اللي نكتشفه يبقى حاجات ينفع نتعامل معاها مش عيوب تقتل أي علاقة وتدمر أي بيت..

بستغرب لما الناس تتفاجئ بحاجات منطقية جدا لمجرد إنهم سلموا دماغهم لبوستات الفيس بوك غير الواقعية اللي بتسلط الضوء على حاجات حاملة بزيادة فا تخلي الناس تتهرب من الواقع و تترعب لما تعيشه..

كلامي ده مش عشان يخوفكوا، الكلام ده طبيعي جدا وعادي جدا، بس لازم يتقال في زمن الفيس بوك بقي لاحس دماغ ولاد وبنات لسه في أول حياتهم ويبجروا ورا علاقات وهمية مفيهاش إلا حب وغرام 24 ساعة يا إما تبقى علاقة فاشلة عايزين يتخلصوا منها، فوجب التنبيه.

"الزعرورة"

الأمهات اللي عندهم بنات صغنة سنهم من 9 شهور لسنتين وشوية كده.. ركزوا معايا دقيقتين بس ..

أرجوكوا ما تردوش على السؤال العقيم بتاع هو إتي مش ملبسة بنتك توكة ليه ؟ الطقم ده ناقصه توكة فوشيا.. أو مال إتي كتي هتموتي على خلفه البنات ليه وإتي مش ملبساها توكة ؟

وما تردوش برضه على سؤال ليه مش جايبالها الباليرينا الرهيبة دي وليه مش ملبساها شوز بينك ليه على الفستان ده ؟ إتي غريبة أوي ..

إنتي سايبها حافية كده إزاي وليه؟ بقي بعد الفستان ده سايبها حافية كده!!!!
ووشها كله أرف وشغالة مصمصة!!!!

وبعد يومين برضه أول ما تشوف خلقتك تقولك إنتي سايبه شعر بنتك من غير
توكة برضه؟! !!

اللي هو سابت جمال فستان بنتك والتسريحة بتاعتها واللا ألوان التي شيرت اللي
تجنن وفيها ورد يهبل وجوب جينز تتاكل أكل وكل مرة تنكد عليكي بأم التوكة وأم
الجزمة!!!

بصوا يا قطايط أمهات البنات عندهم توك تملأ بيها محلات إكسيوريز من
الأرض للسقف وكل الألوان والدرجات.. بس المشكلة إن عند عمر السنة وإنتي
طالعة بنتك بتحس بالاستقلالية فأول حاجة بتعملها تشمشم على التوكة اللي
إنتي حطيتها لها بسرعة الصاروخ وترميها بطول ذراعها على الأرض...
وابقي قابليني لو لقيتها.. أو حتى لمحتها آخر مرة كانت لبسها إمتي وفين..
أنا بنتي لو حسست مجرد إحساس إني ببص لشعرها بتبدأ تنكشه بحثًا عن التوكة
الملعونة..
أقولكوا إيه تاني..

ياما خرجنا بتوك من كليز وضاعت بعد 5 دقائق وإحنا في العربية أصلاً.. وفص
ملح وداب..

وبالنسبة للشوزات والباليرينات فا جربي لبسها لبنوتة بيبي وشوفي سرعة قلعتها
والسرعة اللي بتبقى فيها دايركت على البق واسمعي أحلى صوت مصمصة!!!
ولو طلعتها من بقها هتلم عليكي خلق الله.
عشان كده استعوضنا ربنا وبقينا نلبسهم شرابات شيك لحد ما يبدأوا يمشوا..

بدل ما نروح كل مرة بفردة وفردة ..

ولمعلوماتك اللي بتموت على خلفه بنات مش عشان التوك وبس لأ عشان الدلع
والنكش والحنية اللي فيهم والفساتين الحلوة والألوان اللي تفتح النفس .
ولو على التوك إدينا محوشينهم وهنزل بيهم مرة واحدة لما يعقلوا شوية بس فككوا
من جو إنكوا تحسسوا الأم إنها مستخسرة تصرف على بنتها عشان حنة توكة لا
راحت ولا جت! حتى العيال الصغيرة مش قادرين تسيبوهم في حالهم يا جدعان!



تطبيق مكتبة كتب مجانية
متوفر على جوجل بلاي

"حسن الظن"

كل الناس بتخاف وتقلق عشان بيحصل تقليص للعمالة في الشركة وإنت تتوكل على ربنا وعارف إنه الرزاق وإن رزقك محدش هياخده غيرك... فا تكمل فيها وتترقى كمان رغم الظروف المحبطة اللي عشتها ...

معاكش فلوس... بس بتوسّع على غيرك وبتكرمه بالقليل اللي معاك عشان واثق إن ربنا هيزيدك من فضله... وتلاقي ربنا فتحلك أبواب رزق مكنتش مرتبها أصلاً ... يجيلك مرض.. وتاخذ أدويةك وتتوكل على الله وتعرف إن كل قضاء الله خير.. صحتك تتحسن ووشك يورّد وحالك يتبدّل

واحد يلاقي دلالات الأورام عالية بس بياخد علاجه ونفسه راضية ورامي حموله على ربنا وعارف إن الشافي هو الله وحده وواثق من ده... تلاقي حالته اتحسن وتقايرت على الشفاء التام ...

تقعد كذا سنة من غير ذرية... تروح لدكاترة وإنت عندك يقين إن ربنا قادر على كل شيء وتدعيه يقّر عينك بحة عيل.. تلاقي مراتك حامل في توأم وبعدها تحمل ثاني من غير علاج ولا حقن ولا أي حاجة ...

يقولوك الامتحان ده استحالة تعدييه.. وكان غيرك أشطر... تذاكر وتتعب وتتوكل على ربنا وأنت عارف إن ربنا مش هيضيع تعبك... وتاخذ الماجستير والدكتوراه

حد غيرك ياخذ مكان كان نفسك تشتغل فيه.... تعرف إن ده الخير وإن ربنا خير
بمجهودك وتعبك وسهرك فاجتهدك فرصة أحسن 100 مرة من اللي كنت هتموت
عليها وتعرف بمرور الوقت إن المكان الأولاني مكاش خير ليك ...

وعلى العكس... مفيش حد تلاقيه بيتوقع الفشل أو الخراب أو إنه مهما حصل فخاله
هيفضل زي ما هو، إلا لما تلاقي حالة كل يوم أوحش من اللي قبله ونفسيته زي
الزفت وعيشته بقت سواد في سواد ...

مفيش حد اتوكل على ربنا وما اتفاجئش بعظمة عطاء الله وكرمه ...
مفيش حد رمى حموله على ربنا بعد ما يعمل اللي عليه وياخذ بالأسباب إلا وربنا
بيراضيه بجمال قدره ...

مفيش حد بيرضى إلا وكان جزاؤه أجمل مما يتوقع ..
قال رسول الله - صلى الله عليه وسلم -: يقول الله تعالى: (أنا عند ظن عبدي بي،
وأنا معه إذا ذكرني، فإن ذكرني في نفسه ذكرته في نفسي، وإن ذكرني في ملأ ذكرته
في ملأ خير منهم، وإن تقرب إليّ بشبر تقربت إليه ذراعاً، وإن تقرب إلي ذراعاً
تقربت إليه باعاً، وإن أتاني يمشي أتيته هرولة) رواه البخاري ومسلم..



تطبيق مكتبة كتب مجانية

متوفر على جوجل بلاي

"مدرز داي"

- بابي... عايز ..




* وحياه أمك الغالية اللي بتحرق صينية البطاطس جوا دي ما أنت مكمل،
والمصحف ما معايا... أنا بقيت شبه المواطن المطحون في فلاش حرام
عليك..

- لآ يا بابا دي حاجة بسيطة.. والله بسيطة..

* كل مرة بتقولي كده يا ابن اللعيبة وبتدبس في أوفات ..

- عايز ...

* بص بلاش كلمة عايز، خش في الطلب علطول وحياء أمك اللي مصممة

تقفل الشفاط وعايزة تموتنا مخنوقين ما إنت مكمل.. "   

- Mothers day ya pappy

* أيوه؟ أعمل إيه؟ أنا لا رضعتك ولا كرعتك، اشكر الست اللي هتولع في

نفسها جوه فداء صينية البطاطس!! اتقي الله فينا يا منى هنموت منك،

افتحي أم الشفاط..      

- لآ أنا عايز أجيب هدايا للتيتشر كلهم عشان المازرز داي..

* والله لفتة حلوة منك، ده إنتوا قطعتمهم خلف من غباوتكوا.. خلينا بكرة

نجيب وردة لكل تيتشر.. الورد جميل جمبييل الورد.

- ورد إيه يا بابي!! إحنا هنروح كارفور..

= كده يا أحمد بعد العشرة دي كلها مستخسر فيا طقم الحلل السيراميك ونازل

تجيبه للتيتشرز والمصحف ما أنا قعدالكو في البيت

📖?📖?📖?📖?📖?📖?📖?📖?📖?📖?

- خلاص يا منى كنا بنهزر يا قلبي ده أنا كنت نازل أجبلك الخاتم اللي كان نفسك

فيه، روجي كمي حرق الشقة عقبال ما نيحي يا ست الكل..



= ربنا يخليك ليا يا حبيبي وهات معاك هديه حلوة لماما حبيبتك في إيدك و لو

جبت طقم كوبايات الخشاف ابعتلي ورقتي على بيت بابا...

ثم نزل أحمد وميزو، وميزو أكل علقه موت في العربية عشان مرتب الشهر الجاي

كله اتفرتك بسبب أم المازرز داي ده، وأحمد أصر يرجع بطقم الخشاف لحماته

والمدام دلوقتي بقالها شهرين غضبانه عند أبوها ... وهذا المطلوب إثباته..



تطبيق مكتبة كتب مجانية

متوفر على جوجل بلاي

"محدث عاجبه حاله"

في مقولة أجنبية شهيرة بتقول: " The things we take for granted
" someone else is praying for

بمعنى إن النعم اللي في إيدينا واعتبرنا وجودها عادي وطبيعي في حياتنا، في ناس
غيرنا بتصلي وبتدعي ربنا عشان يبقى عندها زيها أو حتى جزء منها!

ساعات بنتعامل مع النعم على إنها أمر واقع وأقل حاجة ممكن نحصل عليها مع إنها
ممكن تروح منا في غمضة عين!

بنسى إن مفيش حاجة بتبقى على حالها! وإن مفيش قواعد للعبة الحياة!

في لحظة ممكن صحتك تروح منك بدون سبب وتتلطم بين المستشفيات!

وولادك اللي شايفهم حاجة عادية أوي في حياتك ممكن تُبتلى فيهم ويتحرق قلبك
عليهم، لولا ستر ربنا ولطفه بينا!

وإن شغلك اللي مش طايقه وبتشتم فيه كل يوم صبح وليل ممكن متطولوش تاني
وتتعد عاطل في البيت مش لاقى أي وظيفة تفتح بيها بيتك وتكفيك إنت وأهلك
عيش حاف!

وبيتك وعريبتك اللي بتتكسف منهم وقران منهم ممكن يروحوا منك وبتنسى إن في
غيرك ملايين عايشين في الشارع وبموتوا من برد الشتا وصهد الصيف!

سمة العصر دلوقتي نكران النعمة! انعدام الحمد!
كثر الشكوى والنواح وعدم الرضا بأي حاجة!
كل اللي حولينا بما فيهم إحنا بننسى كثير أوي نشكر ربنا على نعمه اللي مغرقانا
وكثير مننا ولا بيحس بيها ولا يستشعر قيمتها إلا لما تروح منه ويتقطع قلبه عليها!
من كان في نعمة ولم يشكر, خرج منها ولم يشعر!
استشعروا قيمة النعم قبل زوالها عشان الندم يبقى ساعتها شعور لا يُحتمل!

"ناس مقررة متريحناش"

أوحش ناس وأكثر ناس متعبة .. اللي متفهملمش حاجة..
اللي قلبك مش مطاوعك تقول عليهم best friend واللا مجرد ناس بتعدي في
مراحل حياتنا..
اللي مواقفهم معانا مش ثابتة..
ساعات تلاقي جدعنة وشهامة وقلب خايف عليك وساعات تلاقي حركات واطية
بدون مبرر ويتعاملوا إنك ولا فارق معاهم أساسًا..
بتبقى مش عارف هما بيحبوك واللا يمثلوا عليك عشان مصلحتهم...
مش عارف عايزينلك الخير واللا عاملين إنهم عايزينلك الخير بس مستكترينه

عليك ...

مش عارف لو احتجتهم هتلاقهم واللا ساعة الجد هيختفوا في ظروف غامضة..
اللي ضحكتم معاك لا هي من القلب أوي ولا هي صفرا ...

بتبقى مش عارف هيسندوك لما تقع واللا هيعملوا نفسهم مش شايفينك فا
هيدويوا عليك ويقولوك بمنتهى الاستفزاز "معلش.. مكناش واخدين بالننا!".

في ناس بيدخلوا حياتنا وبنحترار فيهم ومبنعرفش نحدد هما إيه بالنسبالنا ولا إحنا
بالنسبالهم إيه، بس غالبًا بيقعدوا كده فترة وبيتكلوا على الله ..
بنبقى طول الوقت مش عارفين ناخذ قرار، نكمل معاهم واللا نقطع عشان الدنيا
منغمشة قدامنا بس هما فجأة بيقرروا يختفوا زي ما ظهورلنا من العدم!!
الناس دول مش هيعمروا كثير لأن اللي بيحبك مش هيجيرك معاه.. هيريح
قلبك..

اللي بيحبك كل مواقفه وتصرفاته هتقول إنه بيحبك حتى ملامح وشه هتقولهاالك
... اللي بيحبك ومقرر يبقى معاك حبه هيكون واضحك زي الشمس مفهوش
احتمالات..



تطبيق مكتبة كتيبات مجانية
"نصائح لتقديم المدارس"

متوفر على جوجل بلاي

لازم ابنك / بنتك اللي عندهم 3 سنين يكونوا على إمام بحاجات بسيطة جدًا
عشان المدرسة تتواضع وتتنازل وتقبلهم... خد عندك:

..Alphabets -

..Rhymes of Alphabets -

يعني الأغاني اللي المفروض يحفظها في الكي جي بس هما عايزينه جاي حافظها صم..

- كلمات بالإنجليش لا تقل عن 200 كلمة.. ويكون بيعرف يكوّن جمل من 8
كلمات على الأقل!! وياخد ويدي مع التيتشر بنفس مستوى الإينجليش بتاعها!!

- الأكسنت تكون فوق الفظيعة.. المدرسة لسه هتصحح وتعلم أكسنت!! محدش
فاضيلكوا!!!

- بيعرف يرد على أسئلة بالإنجليش، بس مش جو واتس يور نيم يا حبيبي، لأ ده
كان زمان..

ممكن يتسأل عادي عن ال- Global warming!! أو عن refugees!!!!

- ابنك ممكن يتسأل tell us about the countries you visited with your parents
أساسًا كان لسه سايب البرونة من سنة، يعني كان طفل رضيع وبيسألوه شاف
بلاد إيه.... ابنك عشان متربي هيفتح بقه بس وهيزهبل، وأظن أن ده كان الوقت
الأمثل لجملة " تف على طنط يا حبيبي "!!!!

- يا ريت لو ابنك أخذ بطولات على مستوى الجمهورية تحت سن الرضع ياخذ الميداليات معاه، عشان هيسألوه شاركت في بطولات واللا لآ؟!!

- يعرف كل ال- animals, shapes, sounds of letters, numbers...
يعني بيجي جاهز من مجاميعه...

- يتكلم عن أسرته كلها بالإنجليش ويدردش بالإنجليش ويهزر بالإنجليش ويقول إفيهات بالإنجليش برضه..

- يا ريت يكون واخذ كورس في ال- British council قبل الإنترفيو عشان ده بيزود فرصته إنهم ممكن يقبلوه في المدرسة الفوق الوهمية دي!!!!

- يعرف يكتب اسمه.. ونخط روعة..

- يكتب ال- letters وال- numbers لوحده ولو مدرسة متساهلة هيخلوه يعمل
...tracing

- يفهم المذيع بيقول إيه في ناشونال جيوغرافيك لوحده ولو وقعت منه كلمتين
ممكن جدا يرفضوا ابنك!! وأظن ده حقهم عشان المدرسة ما تلمش...!!

- ممكن يتسأل عن ال- mammals وال- living وال- non- living وممكن لو
مدرسة جامدة أوي يسألوه عن الجهاز الهضمي بالإنجليش...

- لو ابنك بيعرف ألماني وفرنساوي بطلاقة بجانب الإنجليش يبقى شيء كويس..
ممكن تتقبلوا.. بس مقدرش أوعدكوا...

- ممكن يدوله حته translate from Arabic to English, ولو ابنك اللي

عنده 3 سنين ونص معرفهاش يبقى حضرتك بتستهيلي!!! أومال جايباه الإنترنت
ليه!!!

أنا عايزة أوضح للمدارس اللي عايشة في الدور ده أوي إن ابني اللي لسه قالع
البامبرز من كام شهر لو عرف ربع اللي إنتوا بتطلبوه من الولاد في الإنترنت
مكنتش هدخله مدارس!!!

مفيش مشكلة تسألوه في أساسيات..

تشوفوا طريقة كلامه وتفاعله معاكوا..

لكن تمتحنوه في منهج سنين قدام عشان تقبلوه أو ترفضوه، ده اللي بجد ملوش أي
معنى!!!!

بطلوا منظره فارغة!!

وبطلوا نصب على الناس في فلوس ال- registration وال- application
عشان ريجتكووا فاحت أوي!!

من إمتي التعليم كان كده!!

ومين قال إن الضغط على الطفل في السن ده بالشكل ده صح علميا ونفسيا!!

أموت وأفهم بتتنكوا على ولاد الناس ليه?!!

تطبيق مكتبة كتب مجانية

متوفر على جوجل بلاي

الفصلان نعمة

بجترم أوي الناس اللي بتعرف تفصل...
اللي مش يتمشي تخبط في كل الناس عشان مزاجها مش رايق..
اللي بتعرف مين اللي مزعلها ومين اللي ملوش ذنب..
مش ماشي بزعايبه ومطرح ما تيجي تيجي..
مش عشان متخافه مع جوزك تنكدي على صحباتك واحدة واحدة
وتعاملهم وحش..
مش عشان شديت مع مديرِك تسوّد عيشة اللي حواليك..
مش عشان مشربتيش مج النسكافية بتاعك تطلعي زرايينك على البشر..
الفصلان ده نوع عالي أوي من النضوج والاحترام..
الإنسان اللي يفصل ده بيحترم نفسه لدرجة تفرض عليك تحترمه..
بيتحكم في أعصابه عشان ما يزعلش حد منه.. ودي كفاية عشان ترفع ليه
القبعة..
ما بياخدش ذنب حد بحد..
بيفكر... مش ضاربها صرمة واللي يزعل يتفلق..

وحتى لو أتعصب شوية بيلم الليلة وبيعتذر..

محدث مجبر يستحمل حد..

واللي بيستحملك بيكون محبة منه مش واجب عليه..

مستحملك جدعنة لكن ده مش حق مكتسب.. فالتسوق فيها وتيجي عليه أكثر وأكثر..

ممکن اللي بتيجي عليه كل مرة ما يكونش في موود إنه يستحمل عصبيتك وقلة ذوقك لأن هو كمان عنده ظروف..

في صداقات عمر بتضيع عشان اتنين ما عندهم مبدأ الفصلان..

في جوازات بتبوظ عشان الزوج مش يفصل فا بيضرب مراته من الضغط اللي فيه أو عشان زوجة مش بتفصل فا منكدة على جوزها ليل نهار..

في مبدأ في العلاقات الإنسانية يقول:

ظروفك الخاصة... لك وحدك! وأدبك في الكلام... حق للجميع! لا تخاط مشاكلك.. وظروفك النفسية.. بـ تعاملك مع الآخرين..

نستحمل بعض ده حقنا على بعض لكن في حدود لكل حاجة..

ركزوا مع الفصلان عشان مريح جداً ليك ولغيرك..

مش هيخليك على الأقل بتحرق في دمك طول اليوم وبتغلي عشان حد ضايقك..

ومش هتخسرك صديق عمرك في لحظة غضب بالعكس هتزود حبايبك
واحترام الناس ليك يوم ورا يوم..
الفصلان ده أدب وتربية ودماع متكلفة..
خليك راقى وأفضل..

عدوي اللدود.. أنتي مثلي

العنوان اللي قرينه صح! متخضش!
من خلال تجاربي الشخصية وتجارب ناس كثير جدا أعرفهم ومعرفهمش , ملقتش
حد يطلع عين الستات في الشغل إلا ستات زيهم!!
مش أنا ست أهو، بس يؤسفني أقولك إن دي الحقيقة بنسبة ٩٠ ٪ عشان بس
مبقاش أوفر !!
أنا عارفة إن في ستات بتبقى متحيزة لبنات جنسها، بس للأسف اللي بقوله أحيان
كثيرة بيكون الواقع الأليم اللي بنخبط فيه أول ما نشغل مع ستات! عشان كده

لو سألت أي ست تحبي مديرك يبقى ست واللا راجل، هتقولك راجل عشان
ميقرفينش!

معرفش ليه الغباء بيلبس جزء من الستات لما تبقى في مركز قيادي وتتعامل
بغباوة وعجرفة مع الستات اللي تحتها ومعرفش ليه لو الشغل فيه ستات في قلب
بعض بيقلب لنفسه وغل وحقد وكلام ورا الظهر ولت وعجن وممكن يوصل
لخناقة من بتوع المسلسلات اللي الستات فيها بتبسط بعض ويبجيبوا بعض من
شعرهم !!

ولو حظك الأغر إنك وقعتي في مكتب كله ستات، فحضري نفسك إنك
هتصطبحي وتسمي بجوارات من بتاعة "أصل دي حطاني في دماغها"،
"أصل دي متكادة مني عشان أنا أحلى منها" ..

"أصلها بتقلدني فا جابت نفس الشيميز بتاعي، بس أقسم بالله أنا اللي شارياه
قبلها"، وحاجة كده تفقع المرارة ميت مرة في اليوم !!

معرفش ليه برضه لاحظت من خلال كتاباتي إن اللي بيهاجم الست الحامل أو اللي
لسه والدة أو اللي المتجوزة أو المطلقة غالبًا ست زيتها!! آه والله زيمبؤلك كده !!!


تلاقي كوم ستات لابسة معدات القتال ونازلة تسليخ في جلد أي ست بتشتكي أو
بتشارك تجربتها عشان محتاسة وجديدة في كار الحمل أو الأمومة فالازم الستات
دول يحسسوها إنها بتندلع ومش قد المسؤولية وإنها كائن طري رخو طحلي
ملوش في أي حاجة مع إنها ست زيتها وتعبت زيتها وشافت نفس اللي هي شافته!!
واحتاجت حد يطبب عليها مش حد يقطمها ويعملها فيها سبع البرمبة !!

محدث بيحب اللوم في الطلاق على الست قد الستات! ودي حاجة غريبة جدا!

ونفس الأرف ده بيتكرر لو ست بتشتغل وقالت إنها بتنزل الشغل عشان لازم تشتغل أو عشان بتحب مجال شغلها فالو الست الغلبانة دي اتجنت وطلبت نصيحة من الستات اللي من النوع الهجّام ده هتلاقي إن محدش بيحاربها إلا ست زيتها..

هتلسن عليها بالكلام وتتهمها بالتقصير وإنها مفترية ومعندهاش قلب وسايبة بيتها وعيالها مع إن الست اللي بتشتغل دي غالبا واخدة بالها ومركزة في بيتها أكثر من الست اللي قاعدة في بيتها وشاغلة نفسها بالحكم على غيرها ونصباهم المشانق وابنها أصلا جوه بينشن السكاكين على راس أخته اللي بتلعب في الأنبوبة عادي !!
وممكن الأرف يوصل إنهم يدعو على الستات اللي بتشارك تجارها بزوال النعمة من وشهم سواء ذرية أو أسرة أو زوج!! شوفتوا السواد وصل لإيه!

معرفش ليه مجتمع الستات معقد ومكلع غير مجتمع الرجالة اللي أعظم مشاكلهم مين هيلعب برشلونة في البلاي ستيشن ومين كسب بولة الاستيميشن!!
محدث فيهم بيركز ولا بيلت في الكلام واللي فيهم بيلت محدش بيعرفه تاني !!



تطبيق مكتبة كتب مجانية

متوفر على جوجل بلاي

أنا ست أهو وبقولكم مجتمع الستات أغلبه يسد النفس ويجيب خُلل ونفسي نلاقي حل للموضوع ده بس أعتقد الحل محتاج معجزة ربانية لأن الموضوع كبير أوي !

"جملة في الصميم"

جذبتني جملة كانت في وسط رسالة واحدة من المتابعين الأفاضل... جذبتني من بين مئات الرسائل ووقفت عندها كثير..

كانت باعتالي إنها متضايقه جدا وحاسة إنها اتغيرت للأسوأ بشكل مضايقتها جدا بسبب جوزها فا سألتها إيه اللي تاعبك مع جوزك قالتلي "بيعاملني كأني كيس زبالة بيرمي فيه كل نكده وهمه وأرفه وزعل أوي إن الكيس ده اتملئ نكد وغم وفرقع في وشنا كلنا والنتيجة إني بقيت واحدة تانية خالص غير أنا اللي أعرفها"

يااااا... قد إيه الوصف ده بيحصل وقد إيه الوصف دقيق!

ساعات من غير ما نحس بنرمي كل طاقتنا السلبية جوه نفسية شريك حياتنا
وفاكرين إن كلامنا السلبي الجاف الجارح مجرد كلام ينتقال وهيروح لحال سبيله!
بنسى إننا كل شوية بنملاهم بنكد وهم ومش بنفتكرهم بأي حاجة تبسطهم أو تفرح
قلبهم إلا كل سنة مرة!

محدث قال إن المتجوزين ميستحملوش بعض وميستوعبوش بعض في متاعهم
ومشاكلهم بس فعلا بلاش نتعامل معاهم كأنهم كيس بنعبي فيه كل حاجة وحشة
وطالبين منهم يتقبلوا كل اللي بنرميهولهم عادي من غير ما يتأثروا ويتغيروا ويتحولوا
لمنقوع نكد من الأرف اللي غطسناهم فيه!

الألغن بقى لما يبقى الكيس اللي بنرمي فيه همنا وغلبنا هما ولادنا عشان لا حول لهم
ولا قوة!

تلاقي الأب لو متخايق في الشغل يدخل يشخط ويزعق وممكن يضرب حد من
الولاد على حاجة هبلة وهو شايف إن ده عادي!!

أم تتخايق مع جوزها فا تطلع همها في العيال وهي بتذاكر وتبهدهم تهزيق وشتيمة
وصريخ!

مينفعلش أي طرف يتعامل مع الطرف الثاني إنه مقلب الزبالة! إنه الدولاب
المدغدغ اللي بنلم فيه المتكسر والخربان والحاجات المتبهدة!

إحنا بنتعامل مع بشر بيحسوا ويبتأثروا بكل حاجة مش مع جماد معندوش قلب

ولا مشاعر! شريك حياتكم وأولادكم ليهم حق عليكم مهما كانت الدنيا صعبة والأرف
مواطننا في كل حنة!

سنة أولى خيانة

كمية شكوى غير طبيعية من الخيانة، وكمية مرعبة بتحصل في أول كام شهر
جواز!!!!

اللي هما شهر الاهتمام والدلع والخروج والسفر!!!!

جاتلي رسايل تخض من بنات لسه متجوزة ومكلوش شهرين على بعض واكتشفتوا إن أزواجهم بيكلموا ستات على الماسنجر ويبيعتوا لبعض صور ولغة الحوار بينهم قمة في الانحطاط!!! مع إن شكلهم ما يياش عليهم خالص كل البلاوي دي!!!

البت لسه عروسة جديدة ومالحقش أصلاً تقصر في حاجة أو تنشغل عن جوزها بطفل، يبقى ليه الزوج يمشي في السكة الغلط دي!!

وليه بيطلع مشاعره ورومانسيته مع واحدة ما تحلوش ومراته حلاله قدامه والعجيب إنهم واخدين بعض عن حب وملحش الملل اللي كل اللي بيخونوا بيعلقوا عليه شماعة الخيانة إنه يدخل حياتهم أصلاً!

معقول بعض الرجالة ضعيفة كده!! مظنش إن في حد يمشي في السكة الزفت دي ومبيكونش عارف إنه بيخرب كل حاجة ويبطربقها على دماغه!!

مداخل الشيطان مفيش أكثر منها والنفوس الضعيفة مش بتقدر تقاوم أي حاجة، خصوصاً بعد الافتتاح اللي بقى بيأذينا أكثر ما بيفيدنا..

أي حد ممكن يكلم أي حد وفي أي وقت ويشوفوا بعض صورة وصوت!!!

تلاقي رجالة بتكلم ستات لما اللي متجوزينهم يناموا وفي فيديو وأوديو وبلاوي بتحصل والطرف الثاني ممكن جدا يكون بيراعي ربنا في الشخص الخاين ده بس أهو ديل ال... بقى!!!

مفيش حاجة اسمها اتشديتها غصب عني واللا كانت بتحكي لي عن مشاكلها مع
جوزها الساعة 2 بالليل!!

إنتوا بتضحكوا على مين؟!!!

كلنا نفوسنا ضعيفة يبقى نحاول نتجنب الوقوع في الحرام مش نخط كل الظروف
اللي تخلينا ننجرف لعلاقة حرام ونقول كان غصب عننا.. أو نظلم الطرف الثاني
ونطلع فيه العبر عشان منظرنا بس قدام الناس!!!

ستات متجوزة وبتكلم رجالة متجوزة ويخونوا وبيتقابلوا وبيطعنوا شركاء حياتهم في
ضهرهم ومكلمين وبيطلعوا لنفسهم مبررات خايبة زيهم!!!

اتقوا ربنا شوية عشان مسير ربنا اللي ساتركم هي فضحك عشان تعتبروا وتتعضوا من
الأرف اللي بتهبوه ده!!!

مفيش حد بيكون سعيد مع شريك حياته بدون أي خلافات أو اختلافات، بس
في ناس غاوية رمرمة زي ما يقولوا.. يتجوزوا بنت الناس لكن ما يهداش باله إلا
لما يعمل علاقات كل يومين!! ومش مهم بنت الناس دي هي جرالها إيه بعد كده!!
منتهى الأنانية والاستهتار والله!!

كل ده اسمه خيانة عشان ما تحاولوش تسموها أي مسمى ثاني، خياااااااا...


"استهدي بالله يا حاجة"

- ألوو.. إزيك يا حبيب قلب ماما، عامل إيه؟
- * الحمد لله يا ماما..
- لا، شكل صوتك متضايق، ما لك؟
- * والله مفيش أي حاجة.
- لا هو أنا مش عارفك، شكل الشمولة منكدة عليك، هو جديد عليها يعني،
- نحسانا من ساعة ما دخلت بيتنا !! بومة !
- * والله أبدًا، إحنا كويسين سوا الحمد لله.
- أموت وأعرف عاجبك فيها إيه!!!
- تلاقيها مقشطاك أول بأول يا حبة عين أمك..
- * لا والله يا ماما دي حتى شايلة عني مصاريف كثير.
- ليه يا حبيبي!! إنت قصرت معاها يعني؟ واللا مستنقصاك واللا مش شيفاك
- راجل يعني!!! تلاقيها بتدلك باللي بتدفعه..
- * أبدًا يا ماما والله بتساعد عشان الدنيا بقت صعبة..
- صعبة!!! دي عايشة عيشة مكانتش تحلم بيها!!!
- أومال مزعلاك في إيه بس ومنكده عليك كده يا حبة عيني؟
- * لا والله، مضغوط في الشغل بس.
- ما أنت مضغوط عشان تعجب البرنسيصة أم معلقة ذهب في بقها!!! إيه لازمة
- الهدية اللي جبتها لها في عيد ميلادها!!! مش إنت أولى بالفلوس دي!!!

* يا ماما مجبلهاش إزاي مش مراتي ؟

- إيه يا نحنوح!!! هي عملالك عمل واللا إيه!!! وإيه لازمة العربية وبنزين ورايحة بالعيال النادي وراجعه من النادي!!! الله يرحم!!! عمرها ما عتبتة إلا بعد ما ناسبتنا..

* إزاي يا ماما، أنا أصلا عرفتها من النادي !

- أيوه صح، هي معرفة النوادي دي بتعمر بيوت!!! بلا خيبة..

* وتعالالي هنا، إيه لازمة المصيف!!! خير يعني ؟ ما تقعد في البيت زي خلق

الله!!! الدنيا بقت غالية نار واللا هي صحيح هتدرى منين!!! عايشة في عز وهنا مكانتش تحلم بيهم!!!!

- عايز أوديهم يغيروا جو يا ماما اشمعى هي يعني!!! ودي مشاركة معايا كمان في المصاريف..

* مشاركة!!!!!! تلاقيها بتدفع ملاليم بتلحس بيهم عقلك!!! مفيش مصيف السنة دي

يا أمير وخلي مراتك تتلم وتعيش عيشة أهلها يا أمير!! ومفيش عربيات تاني كفاية لّف وصرمحة في الشوارع!!! لمّ مراتك يا أمير!!!!

* وإيه لازمة الخروجة اللي كانت من أسبوعين ونزلت صورتكوا على الفيس بوك!! هي مش بتعرف تطبخ!!! تيجي تشوف طبيخ ندى أختك وجماله..

- بس ندى عندها طباخ يا ماما..

* إيه المشكلة، جوزها بيريجها بس طبيخها سكر، دي عليها سلطة خضرا تهبل، ربنا يحميها..

ونسيت أقولك: قولها تبطل بهرجة في اللبس، دي لابسة جاكيت أختك شافته ب-800 جنيه!! قولها ترحم جيبك شوية!

يلا هقفل معاك يا حبيبي عشان ندى أختك هتعدى عليها بعريتها ورايحين ننقي
هدية عيد جوازهم، عشان محتارة بين خاتمين سوليتير يهبلوا وبعدها هنقعد في
النادي شويه عشان هتوحشني أوي... أصل جوزها هيسفرها يورو تريب
أسبوعين لحسن نفسيتها تعبانة أوي يا حبيبة قلبي ونفسها تعمل شوينج، ويارب
ترجعلنا أحسن لحسن الناني سابتها بقالها ٤ أيام وتعبت أوي فيهم.
- طيب، سلمى عليها يا ماما.

* لا، تعالى وسلم عليها، والللا الغندورة قايلالك تقاطع أهلك !!

- ما إحنا كنا لسه عندكوا إمبراح يا ماما.

* خلاص بقيت بتعد علينا الأيام يا أمير!!! طبقتك وحطتك في جيها بنت أمل!!!
وابقى لم مراتك يا أمير!!! قولها تعيش كده على قد حالكوا يا حبيبي إنت هتلاحق
عليها منين!

- بس ما هي ندى مسافرة هي وجوزها يا ماما عادي يعني.

* إنت هتقارن أختك ندى النسمة الملاك اللي تتحط جنب المحيط بمراتك
المفجوعة أم عين فارغة!!! اخص عليك يا أمير اخص، اقلل السكة بدال ما أقولك
قلبي وربي غضبانين عليك!!! واشبع بالشملولة وخليها تنفعك يا حيلتها، وحسك
عينك تقارن أختك بالبت دي تاني!! سامع والللا مش سامع!!! سلام
عيشنا وشوفنا!



تطبيق مكتبة كتب مجانية

متوفر على جوجل بلاي

التربية مش حرام

ستات بتشوفني مزوداها لما بطلب من ابني اللي عنده 6 سنين يقولي ويقول لأي حد حتى أخته الصغيرة من فضلك، واني على طول بفكره يقول شكراً لما أي حدّ يديله حاجة..

طبعا بفضل أكرر الكلام مليون مرة عقبال ما يستجيب وبيقولهم... وفي ناس ببقى خارجة معاهم بيبصولي إني ممة أوي.. بس بفرح جدا لما ألاقيه زعلان عشان نسي يقولهم لحد جابله حاجة أو حد ساعده..

مش بيفرق معايا خالص أي حد شايف إن دي تفاهات لإن دي بالنسبالي وبالنسبة للأمهات كتير أساسيات..

في أمهات بتقولي ليه بتخليه يلم اللعب؟ ليه بتخليه يشيل طبقه؟ ما تشيلهم إتي..

ليه بتقوليله من فضلك!! ده طفل!

مش لازم يحط الكوتشي بتاعة في الجزامة كل مرة وهو راجع من المدرسة..

مش لازم لما ياكل يغسل إيده لوحده.. مع إن مدرسته طالبة مني كده بس

هما في نظرهم مش لازم..

ليه بخليه يعتذر لأخته الصغيرة لو خبطها، مع إنها لسه مش فاهمة أوي..

أنا بعمل كل ده عشان مش صح أسيب التلفزيون والتاب وتصرفات الأطفال اللي حواليه يربوه.. في أمهات مش بيفرق معاهم ابنهم يقول آسف أو شكراً أو من فضلك بس أنا بيفرق معايا أوي..

لما يتعود إنه لما يغلط يعتذر وهو صغير وإنه يحط حاجته مكانها وما يتعافاش على الأصغر منه يبقى ساعتها هحس إن تعبي معاه مراحش هدر.. ولما يتعود إن كل حاجة حلوة بيعملها ليها مقابل أحلى وأحلى يبقى هيتعلم إن الصبح ده حاجة جميلة أوي وهيحب يعملها..

ومش معنى إنه طفل يبقى محترموش ومقولوش من فضلك وشكراً ولو سمحت!! ده أول واحد لازم يتقاله الكلام ده.. عشان يتربي عليهم...

ربوا ولادكوا.. التربية رخمة وصعبة في أوقات كثير وبتعوز طولة بال بس هتحسوا بقيمتها لما ولادكوا يكبروا واستحالة يرفعوا صوتهم عليكوا أو يقعدوا زي تنابلة السلطان وانتي تعبانة وطالع عينك..

هتحسي قيمتها لما تلاقيهم بيعتذروا للي غلطوا فيهم وبيراعوا ربنا في اللي هيتجوزوهم..

معندهمش مبدأ مدّ الأيد والضرب..

معندهمش مبدأ إنهم يبصوا لأهلهم بتحدي وقلة أدب!!

أنا شوفت بعيني ابن ببيجح في باباه وبنت بترد على أمها الكلمة بكلمتها،
وعيال بتشوح لأهلها والأهل ساكتين ويقولوا يا ريتني..

أوقات كثير بتعب وبجس إن كل اللي بعمله بيروح في الهواء، بس سبحان
الله بعدها بلاقي ابني عمل حاجة بقالي كام شهر بقولها له حد ما ريتني نشف
بس هو بقي بيعملها لوحده..

كل تصرفات ولادكوا لما يكبروا أساسهم أول كام سنة في حياتهم، وقت ما
بتقولوا حرام ده صغير..

الحرام بالنسبالي إنه يبقى عديم الإحساس باللي غيره بيعملهوله أو إنه يبقى
سليط اللسان أو بيفتري على اللي بيحبوه..

التربية الصح عمرها ما كانت حرام أو ضغط على الطفل.

التربية عمرها ما كانت إنه يأكل ويشرب ويلبس ويدخل مدرسة... التربية
حاجة تاني خالص..

الحرام إنكوا تظلموه وما تعرفهوش الصح من الغلط ولما يكبر تحاسبوه هوا
ليه طالع كده...!!

ما هو لازم يطلع كده وأسوأ من كده...!!

تطبيق مكتبة كتب مجانية

متوفر على جوجل بلاي

"الجواز مش لعبة"

معلش الموضوع طويل، بس مش عارفه أختصره لأنه مهم جدًا ...
مش ملاحظين إن محاكم الأسرة مبقتش ملاحقة على قضايا الطلاق والخلع؟
وإن كثير أوي بيتطلقوا خلال أول سنة جواز؟
وإن نسبة الطلاق زادت جداااا في المجتمع الفترة الأخيرة؟
عشان كده نفسي أقول رسالة لكل راجل وست :

* ما تاخدش بنت ناس وانت عارف إنك هتهبدلها معاك، وإن الجوازة مش فارقة معاك من البداية ..

* بدال مش عايز تتجوز وشايف إن لسه بدري عليك ما تتجوزش، ودي حرية شخصية محدش يقدر يلومك ..

* مش عشان أهلك بيزنوا عليك أو إنك عايز تتجوز زي ما كل الناس اتجوزت يبقى ترمط واحدة معاك وتعيشها في غلب ونكد عشان لا حاسس بيها ولا عايزها ..

* لو الحيانة عندك أهم من أسرتك.. يبقى ما تربطش واحدة بيك ولا أطفال بأب زيك.. بيشوفوا خيانتته لأهم أكثر ما بيشوفوا وشه في البيت ..

* لو مصمم تكلم بنات كلمهم وانت عازب وحسابك عند رينا.. ما تقهرش مراتك لما تبقى متأكد إنك عارف عليها بدل الواحده عشرة وساكته عشان ملهاش مكان تروحه بعيالها بعد الانفصال.. واللا عشان أهلها يهددوها بالقطيعة لو طلبت الطلاق بدل ما يكونوا سندها وضرها ..

* لو تهينها قدام الناس ويتجرح كرامتها وتهزأها قدام أهلك عشان تبين إنك

مسيطر وراجل يبقى إنت فاهم الرجولة غلط !!

* اعتبر مراتك دي أختك أو بنتك.. هتحب جوزها يهدلها زي ما بتعمل ؟ !!

= لو حضرتك متدلعة ومش عايزة تتعلمي تشيلي مسئولية وهتقضيها شغل عيال من نوع "طلقي.. يبقى بلاش منه الجواز ..

= لو إنتي متجوزة بس عشان تاخدي لقب مدام وبس يبقى حسبتيها غلط!! لو محدتيش واحد شهبك وفي بينكوا اتهامات مشتركة يبقى ظلمتي نفسك قبل ما تظلمي حد تاني ..

= لو مش قادرة تصوني بيتك وتحفظي أسرارته وبتحكي خصوصياتكوا لطوب الأرض يبقى ما تخربيش على أسرة إنتي جزء منها !!

= بدال كل شوية شايفة إن بيت بابا أولى بيكي ومحسنة جوزك بالتقصير ليل نهار مع إن جوزك مش مقصر معاكي وبيتقي ربنا فيكي، يبقى مكنتيش سبتي بيت بابا من الأول وتعتبي معاكي راجل محترم !!

= لو بتدي ودنك لكل من هب ودب ومش بتعتلي القرار قبل ما تخديه وكلام صحباتك عندك مقدس وأهم من بيتك وجوزك يبقى كفاية عليك صحباتك ..

= لو معندكيش استعداد تحترمي أهل جوزك وتبريهم مع إنهم بيعاملوكي زي بنتهم يبقى عايزة بيتك يعمر إزاي ؟

= لو إنتي سليطة اللسان ومش بتعلمي احترام لجوزك وبتعامليه معاملة هتقصص ريشه عشان ما يبصش لغيري يبقى إنتي غلط !!

= لو مش فاهمة إن الجواز مشاركة واحتواء وتحمل يبقى إنتي فاهماه غلط.. الجواز مش دلع وهدايا وواحد يبصرف عليك وبس ..

قدسية الجواز اللي كنا بنسمعها وإحنا صغيرين من أهالينا وجدودنا بقت بتتلاشي

كل يوم عن اللي قبله !!

بقي سهل أوي تلاقي اثنين لسه مكلوش سنة ومتطلقين ورافعين على بعض
قضايا !!

وتحس إن محدش فيهم طابق للتاني كلمة وبيتلكله كأنهم أعداء!! كأنهم في حرب!!!
لازم حد يكسب وحد يخسر!!!

ومش هحتاج أفكرم إن لو في أطفال الحال بيكون عامل إزاي قبل الانفصال
وبعده !!

في أسباب كثير هي اللي وصلتنا لكده أهمها :

- قليل اللي بقى بيربي ولاده على احترام الطرف الثاني وإنه يحترم الجواز نفسه وما
يفرطش فيه بالساهل ..

- في ستات ورجالة كثير بيدوا ودينهم لناس حواليم بتخرب عليهم ويمشوا وراهم
لحد ما البيت يتخرب فعلاً ..

- وسبب أساسي لكل ده إننا بعدنا عن كلام ربنا عز وجل وعن اتباع الطريقة اللي
رسول الله صلى الله عليه وسلم كان بيعامل بيها زوجاته وبعدنا عن الاقتداء
بسلوك زوجات الرسول !!!

- في ستات ورجالة بيتربوا إن أهلهم بيعملوهم كل حاجة وإن أحلامهم أوامر وده
بيخلق أشخاص أنانية لأبعد حد ..

ما تربوش بناتكوا إنهم لازم يقبلوا بأول واحد يخبط على الباب عشان خايفين عليهم
يعنسوا!! الجواز ده أویشن، لو جه خير وبركة ولو مجاش يبقى رزق بنتكوا في
حاجة تاني ..

ما تربوش ولادكوا إنهم معصومين من الغلط وإن الطرف الثاني لازم هو اللي

غلطان ..

ما تجوش في صف ولادكوا مع إنكوا واثقين إنه غلط.. خليكوا حقانيين ..
قربوا من ولادكوا وخلوهم صحابكوا عشان ياخدوا برأيكوا ويستشيروكوا دائما ..
ما ترموش بنتكوا لأول راجل رغم إنكوا شافين عيوبه وعارفين إنكوا بتلصموا
الجوازة !!

ربوا ولادكوا يحترموا أخواتهم وأي بنت وما يهينوهاش ولا يعاملوهم إنهم مجرد
بيخدموهم وخلاص !!

ربوهم إن الاحترام أساس كل حاجة وإن الجواز مش لعبة وإنهم يتقوا ربنا في بنات
الناس وبناتكوا يتقوا ربنا في أزواجهم.. أظن ساعتها نسب الطلاق دي هتقل ياذن
الله؛ وهنرحم أسر كثير من انفصال ملوش لازمة بسبب جوازة مكاتنش صح من
الأول ..

فكروا بعقلكوا وقلبكوا واختاروا اللي هيراعي ربنا في بنتكوا واللي هتصون بيت
ابنكوا.. الموضوع مش إننا نفرح بشبكة وفرح وبعدها نتشحطط في المحاكم سنين
وسنين بسبب اختيار كنا عارفين إنه غلط من الأول ..
وفي زيجات بتكون ناجحة في الأول بس ساعات في طرف حد يلعب في دماغه أو
يتغير وساعتها بيكون ابتلاء وإن شاء الله ربنا يعوض الطرف اللي اتظلم بكل خير
عن اللي شافه ..

ونداء أخير للأهل .. مش عشان عنده إمكانيات مادية كويسة يبقى كويس .. ممكن
يكون عنده فيلا وعربية ومصنع، بس لو معدوش دين هيطلع عين بنتكوا ويسفها
التراب ..

تطبيق مكتبة كتب مجانية
متوفر على جوجل بلاي

"مبروك.. المدام حامل"

لو الدكتور قال لحضرتك مبروك المدام حامل لازم تتعامل مع الحقايق دي :
- أييبون... في وحم ومراتك لو ده حملها الأول هتسحك معاها.. يا محمد عايزة
جمبري، يا محمد عايزة 10 برطمانات نوتيللا.. يا محمد هاتلي سمكة بزاعفها.. يا محمد
قعدي جوه محل كباب وكفتة واقفل عليا... طب عايزة آكل تفل الشاي اتصرف
!!!




أنت بقى هات اللي تقدر عليه، وصدقني هترتاح كثير بدال ما تلبسك تهمة وحمه

نسمي إيه؟ نسميها اسم أوزبكستاني واللا اسم إغريقي...؟

لازم تشاركها لأنها فعلا متحمسة جدًا فوق ما تتخيل ..

- لما مقاس رجلها يكبر أو وشها ينفخ أو مناخيرها تبقى وأكلة نص راسها فاده مش

بمزاجها... حسسها دايماً إنه مرحلة مؤقتة وكل ده هيفش.. مش تعمل شير لصورة

ميريام وهي حامل وفي مليون واحد بيخدمها، خلي فيه ذوق   

- لو لقيتها قرفانة من الطبخ مش لازم تنشف دماغك وتصمم تاكل كبدة! إذا

كانت مبتطيقش ريجيتها في العادي، هتطيقها وهي بتتوحم إزاي بالعقل كده!

- خليك حنين عليها عشان تقلبات مزاجها بتبقى كتيرة أوي في الحمل وده غضب

عنا.. ساعات هتلاقها مربعالك على الكنبه ومتقمصة دور عبلة كامل، ساعات

هتחס إنك دخلت فيلم سعد اليتيم.. أو ناقصك فنجان قهوة وشيخ عشان

يناسب النكد اللي هي فيه ..

وساعات هتلاقها منشكحة وحلوة كده مع نفسها برضه .. وبترقص على 3 دقائق..

حاول تحتويها.. هرمونات الحمل عاملة زي المرجيحة.. يوم تحت وفوق!

- بلاش تزعلها عشان بجد البيبي بيتأثر بنفسية الأم.. كييب كالم شوية ..

- لما تدخل التاسع بالسلامة وتقولك أنا حاسة إني بولد، صدقها لأن غالباً بتكون

بتولد ...




أو قربت بس هي مش عارفة تتصرف ...

مش لازم تتفرج على الماتش أو تشوف صحابك على القهوة انهارده

استعد وحسسها إنك مستعد.. حسسها إنك متحمس زيها، ويا ريت يكون ده

إحساسك بجد، حاول تظمنها.. أنا عارفة إنك في الموقف ده لأول مرة زيها بس هي

محتاجك وسلملي على النونو لما يبجي بالسلامة ..

- لما البيبي ييجي بالسلامة وتسلملي عليه زي ما قولتلك ولقيت مراتك حاضنة بنتكوا وبتقولك دي شهي خالص بلاش تكسر خاطرها وتقولها إن حتة اللحمة الحمرا دي لسه مطلعهاش شبه أو ده شهي أنا جداااا حتى بصي واخذ نفس بصتي ونفس قصتي وكل تقاطيعي، ده حتى واخذ مجاني وترايبسي !!! دي حركات ابتدائي أوي.. إحنا عارفين إن قدامنا 6 شهور عقبال ما تبان واللا بيان هو شبه مين وساعات سنة، بس خليك فاكر هي تعبت فيها أد إيه.. ممكن تسد نفسها في مناسبة تاني بس بلاش دي؟ ده بعد إذنك طبعًا    ومبروك يا بابا.. يتربي في عزك.

بُعْبُع السِّتَات

بَطْلِي ترعبي من الجملة اللي بقت بالنسبالك زي البُعْبُع بتاعة "لحسن جوزك يبص لبره" !!!..!! "لحسن جوزك يتجوز عليك يا خايفة!!" إنتي بقيتي بتاخدي بالك من جسمك ووزنك، مش عشان صحتك ولا اتباعًا لمبدأ "إن لبدنك عليك حق"، لأ... عشان جوزك ما يبصش بره وبس.. عشان إنتي علطول خايفة وحاسة بالخطر!!
خايفة يسبيك لو تخنتي!!
لو رفعتي!!!

لو شاف واحدة أحلى!!

لو شاف واحدة أشيك!!

لو شاف واحدة بتشتغل وليها كارير!!!

دايرة الخوف دي مش هتخلص وهتدمرك في كل حاجة... هتقضي عليك
كبي آدمة!!

بقيتي متحملة فوق طاقتك ومش بتتكلمي وبتضحكي ضحكة صفرا عشان
متبقيش نكدية.. عشان جوزك ما يبصش بره برضه!!!..

بقيتي بتدبلي عشان بطلتوا تتكلموا في اللي مضايقتك عشان ما يقولش
بتشتكي وعايزة نكد وكل ده هياثر على نفسيتك لو مكانش انهارد هيبقي
بكره!!

بقيتي محتارة تشتغلي عشان جوزك ما يبصش بره لزميلته في الشغل واللا
تقدي في البيت عشان تهتم بنفسك بزيادة وتعيشي عشانه وتنسي إنتي
عايزة إيه.. وإيه اللي يسعدك.. وتلغي نفسك لحسن ممكن يبص بره!!!

الدين وصابنا نهتم برضا أزواجنا والأزواج يهتموا برضا زوجاتهم، بس ده يبقى
دافعنا عشان بنحب بعض وما ننساش حق نفسنا علينا، لكن إن الستات
تبقى عندها حالة هلع من إن جوزها يبص لبره فاده الغريب..

هو لو يبحبك وهو عينه مليانة مش فارغة مش هيبص لبره..

لو هو راجل بجد مش هتخافي عليه من أي واحده تلوف عليه وتوقعه

بكلمتين..

حبي جوزك وحي نفسك عشانكم إنتوا مش عشان خايقة أو متهددة أو حاسة إنك ممكن تاخدي القلم المتين على سهوة..

اللي مقرر يلعب بديله هيلعب بيه حتى لو قيداله صوابع إيدك ورجلك..

واللي بيراعي ربنا، لو لقاكي مقصرة هيتكلم معاكي عشان تلاقوا حل، مش هيترمي في حضن أول واحدة يتكعبل فيها...

الراجل ما بيتحوطش عليه زي الكتاكت..

الراجل لو عايز يعمل حاجة هيعملها سواء وفاء أو خيانة..

خوفك من إنه يضيع وهلعك المستمر إنه ممكن يسبيك ويمشي هيعك الدنيا أكثر لأنك أصلاً مش واثقة فيه..

والثقة دي أساس الأساس..

لو ضاعت يبقى عليه العوض يا بنتي..

اعملي اللي عليكي واسعدي جوزك وسبيك من بعبع "عشان جوزك ما يبعش بره" عشان اللي عينه زايدة هتفضل زايدة مهما عملتي.. واللي مقرر يترمي في حضن أي واحدة هيترمي، واللي محترمك وبيحبك مش هيشوف غيرك ولو شاف هيلاقى مليون سبب وسبب إنه ما ينجرفش لعلاقة حتى لو العلاقة دي جباله على طبق من ذهب..

اللي إنتي مش حاسة معاه بالأمان وحاسة إنه ممكن يروح لغيرك لو قالته
كلمة حلوة أو غمزتله وإنتي مراعية ربنا فيه وفي بيته.. إنتي عايزة منه إيه؟!
خليه يروح.. عشان لو قعد معاكي سنة سنتين فا هوا برضه في الآخر
هيروح..

"هو ده عيبه"

أكثر ناس اتقرصت من قرف السوشيال ميديا هي أكثر ناس كانت ضد فكرة
داري على شمعتك ..
كانوا أكثر ناس بيطلقوا صواريخ آر بي جي في وش اللي ينهم ويقولهم بلاش تكتبوا
تفاصيل حياتكو كلها على الفيس بوك.. بلاش تنزلي صورك وصور ولادك علطول
وإنتو مبسوطين ... بلاش تكتبي إنتي فين ومع مين وحاسة بإيه !!
الناس اللي اتقرصت دي كانوا فاكرين إن كل الناس بتتمنى لغيرها الخير وإن محدش
هيستكثر ومحدش هينسى يقول بسم الله ما شاء الله !!
الناس دي تجاهلت كل التنبيهات والتحذيرات اللي نزلت ترف عليهم من كل اللي
بيحبوهم على اعتبار إنهم بيأفورو أو اعتقادًا منهم أن جزءًا من الناس دي بيحقد
عليهم وبيتغاض لما يشوف صورهم وأخبارهم فابقوا بيعندوا وينغمسوا في حياة
السوشيال ميديا أكثر وأكثر، لحد ما بدأوا يلاحظوا تغيير في حياتهم !
فجأة خناقات زوجية على تفاهات، عيا ومرض للولاد بدون مقدمات وبصورة
بتنكد عليهم في كل خروجة صورها متشيرة على الفيس بوك، مراية عربية تطير،
كاوتشات تنزل على الأرض فجأة في نص السفيرية!! حاجات بتضيع كانت ملبوسة

في صورهم !!

المفارقات دي بقت بتتجمع جنب بعضها زي البازل لحد ما بقت الصورة واضحة
ومفيهاش جدال قدام الناس اللي مش معترفة بالحسد ..

كل ذي نعمة محسود، وده مش كلامنا إحنا ده كلام سيد الخلق صلى الله عليه
وسلم.. ونمط حياتنا السريع بيخلينا ننسى نتحصن ونقول الأذكار بانتظام، وفي
الآخر لو بصيت للي بيحصلك من ورا أخبارك اللي مالية الفيس بوك هتقول
وعلينا إيه من ده كله!

احفظوا نفسكم وأهلكم وأولادكم.. احفظوا بيوتكم... في ناس كثير بتستكتر حتى لو
عندها قدّ اللي عندك عشرين مرة.

"بالسهولة دي"


- حسن يا حبيبي، ما تيجي نتغدى بره..

* أنت تؤمري يا قلب حسن، أنا معنديش أي مشكلة خالص، بس فاكرة آخر مرة
لما سيف وقع طبق المكرونة على الطقم التحفة اللي كنتي لسه جايباه من زارا وكان
بألف جنيه واتنكدتي آخر نكد وأنا زعلت عشانك أوي..



- آه صح عندك حق، متفكرينش      طيب إيه رأيك

نوديم كيدزانيا؟

* اقتراح تحفة طبعًا برضه، بس فاكرة لما لچين تاهت مننا وقعدنا ندور عليها ساعة
لحد ما أغمى عليكي وقعدتي تلطمي والناس افتكرتك بتشحتي ولمينا حبة فلوس زي
الفل وقولتي عمري في حياتي ما هعتبها تاني؟

- ااه ااه ده كان يوم أغبر     لا لا بلاها كيدزانيا ده
أنا بكرهها..

طيب إيه رأيك نروح كافيه؟

* الله   جميل جدا بس فاكرة لما اتطردنا عشان سيف لعب هو وكل
ولاد اللي في الكافيه خلاويص لسه وكانوا بينطوا على حجر اللي قاعدين وتفوا على
الويترز ولجين قررت تلحس السيراميك ببقها وجالها نزلة معوية واتحجرت 5 أيام
في المستشفى؟

- ااه ااه ده أنا كنت في نص هدومي والله، وأصلاً كله إلا تعب لجين دي بتهدلنا
طيب إيه رأيك نروح لمها أختي وأهو العيال يلعبوا سوا؟
* مها دي غسل وكنت أتمنى تبقى ليا أخت زيها بالمللي، بس المشكلة إن جوزها
رخم وبيقعد يتكلم معاكي كتير.

- إيه المشكلة، ده طارق جدع جدا..

* هو جدع مقولناش حاجة، بس أنا بغير عليكي من نسمة الهواء، ده إنت حب
حياتي يا ياسمين، مبستحملش حد يبصلك بس.

- يا حبيبي يا حسن، طب خلاص بلاش مها، نروح لماما..

- طنط دي ست الكل أصلاً، بس طنط فاتن اللي في الدور الأول نقرتنا عين المرة
اللي فاتت وكنا هنتطلق فاكرة، بقيت بخاف أي حد يحسد حبنا يا ياسمينه حياتي..

تفضل فيه باليومين ، ولو ولدت قيصري فاربنا يكون في عونها عشان الجرح
وفتحة البطن ..

سيبك من كل ده... مراتك فجأة حياتها اتقلبت!! بقت مسؤولة عن بني آدم
مسؤولة كاملة.. لا هي فهاله عايز إيه ولا بيعيط ليه !!!
بيزن ٢٤ ساعة وهي صاحية معاه ليل ونهار!! بترضع علطول.. مختارة مش عارفة
الإسهال تعمل معاه إيه والإمساك حله إيه وترضع طبيعي إمتي وصناعي إمتي ...
خايفة يكون حران أو بردان.. خايفة يكون تعبان وهي مش فاهمه ما له ...
بتلف بيه على الدكاترة.. خايفه عليه لحسن يأكل حاجة غلط... لو تعبان مش
بيغمضها جفن لحد ما تتظمن عليه ...

مراتك فجأة لا بقى عندها وقت تاكل ولا تنام ولا تشرب نسكافيه ولا تصلي بتركيز
..

ولا حتى تقعد مع نفسها نص ساعة لأن وقت ما البيبي بينام بتنهار جنبه لأنها طالع
عينها طول الليل والنهار ...

حتى خروجات صحاها نسيتهها والنزول من البيت بقى عايزله خطة إستراتيجية
منهجة عشان تعدي على خير !!!

واضرب ده كله في ١٠٠٠٠٠٠ لو مراتك متغربة ومفيش حد معاها ولا جنبها !!
في حاجة اسمها اكتئاب بعد الولادة علميا، وده مش دلع ولا مياصة منها ..
فعلاً مراتك بتبقى مكتئبة وحاسة إنها مش مسيطرة على حياتها وخايفة.. محتاجة
منك الدعم والحب والتقدير ، مش إنك تقعد تقولها إنك تهمليني وبتسيبيني !!
بره الرجالة بتشارك الستات في مسؤوليات البيبي من أول يوم ويخلوا يوم للأم
تخرج فيه مع صحباتها دون مسؤوليات ومن غير نارزة ...

مراتك مش بتتدلع.. مراتك محتاجك لأنها بتعدّي بأصعب مرحلة في حياتها ..
خليك السند بجد مش حمل فوق كتافها ..
دوروا بنفسكوا على اكتئاب ما بعد الولادة او post partum depression
عشان تتأكدوا إن ده مش دلع وإن فعلا الستات بتستحمل كثير ..



تطبيق مكتبة كتب مجانية
متوفر على جوجل بلاي

"الهروب الكبير"

بنهرب من اللي خايفين نواجهه بحركة ناصحة أوي! ألا وهي النوم!
بنهرب من اللي واجعنا بإننا نخبي راسنا في المخذة زي ما النعامة بتدفن راسها ..
واحنا عارفين إننا مش هنام ولا هيغمضلنا جفن!
بنهرب من وحدتنا، وإن مفيش حد بقى بيهمه يرفع علينا سماعة التليفون أو يسأل
علينا ويهمه غيابنا لو اختفينا وغطسنا بالأسابيع بالنوم !!
لما بنخاف نفكر في حاجة بنستدكي ونستنصح ونقول هندخل ننام مع إن فردت
جسمك على السرير وبصتك للحيطه دي هتخلي كل الأفكار اللي بتهرب منها جاية
ترقصلك عشرة بلادي وبتطلعلك لسانها عشان انتصرت عليك وختلك قلقان
ومصحح ومطبّق لتاني يوم !!
النوم هو أغبي طريقة بنضحك بيها على نفسنا عشان نحس إن يومنا انتهى وإن
اللي تابعنا هيعمل نفسه مش شايفنا لو غمضنا عيننا زي الطفل الصغير اللي
مبيكونش عايز يروح المدرسة الصبح فا بيغمض عينه بالعافية قال يعني كده رايح
في النوم وكل تفاصيل وشه وجسمه فاضحاه .. وفي الآخر بيلاقي أمه جيباه من قفاه
وبتلبسه عشان ينزل ..

مهما حاولنا نهرب ونتجاهل مشاكلنا بدفسة راسنا في ملاية السرير بين ٤ مخدات
فا عمرنا ما هنرتاح غير لما نقعد مع نفسنا قعدة محترمة ونفكر في اللي تابعنا ونقرر
إننا لازم ننشف على نفسنا ونواجهه وعادي لو فشلنا بس كفاية إننا واجهنا ومش
خايفين من حاجة !

" اللي بيخاف من العفريت بيطلعه " والتظاهر بالنوم والراحة وإنت من جواك في

كلاب سحرانة تهوهو في دماغك فاده هيخلي كل عفايرت الدنيا تنتلط في وشك
وهتخلي قلقك يزيد يوم عن يوم ..
إنت قوي... مهما كان اللي بتمر بيه فإنت قده... لإن ربنا بيبتليك بجاجات إنت
تقدر عليها وعارف إنك هتصمد فيها لو مسكت نفسك ...
ردد لنفسك إنك قوي.. وإن مهما الدنيا كانت صعبة فإنت عارف اللي فيها... إن لا
حلو بيدوم ولا مر بيدوم فاشد نفسك كده وارفع راسك ونقض كل اللي تاعبك
وراعبك من دماغك.. متدفنش راسك تاني في مخدة عشان عمر ده ما كان الحل
..

معاناة امرأة

أكثر نوعية من الستات بتعاني في مجتمعنا مع إني أظن إن كل الستات
بتعاني بطريقة ما: (المطلقة..
واللي لسه ما اتجوزتش.. لإني بكره كلمة عانس، عشان بتنتقال إنها شتية!!
والأرملة..
واللي لسه ربنا مرزقهاش بأطفال (.

في كل الحالات المجتمع بيحاسبهم على حالتهم الاجتماعية أو على نصيبهم!!
عمركو شفتوا استفزاز أكثر من كده !!!!

يعني بدل ما يلاقوا دعم من اللي حوالهم بيلاقوا برطمة ونأرزة وتلقيح كلام
!!!!!!

المجتمع مصمم يطلعهم فيهم حاجة غلط مع إن اللي باصلهم كده هو الغلط
نفسه وماشي على رجلين!!!!

مين ادالك الحق تسأل ليه علانة قررت تنفصل عن شريك حياتها، أو
تقولها ما إنتي اللي غلطتي من الأول لما قبلتي بيه وتنكد عليها وتقلب عليها
المواجع كلها!!!! إنت مااااالك؟؟!!

ليه تجربها تدافع عن نفسها وهي مش محتاجة تبرر لجناب سيادتك حاجة
أصلاً!!!!

ليه تحطوها في وضع اتهام!!

دي حاجة خاصة جداً بيها وبية ومش من حق أي حد يتدخل فيها أو
يعايب بسببها!!!!

ممكناً جداً جنابك لو مكانها كنتي انفصلي قبلها بمراحل ومقدرتيش
تستحملي زيها!!

ومين إدالك الحق تسأل هي علانة لسه ما اتجوزتش ليه!! هي لمعلوماتك
مش ناقصها إيد ولا رجل ولا بتمشي على الحيط!! وممكن جداً تكون أحسن
مننا كلنا، بس لو كانت لقت شريك حياة مناسب كانت هترتبط بيه فامش
من حق أي حد يديها كلام ملوش معنى أو يلمح لها إن سنها اتأخر!!!! لا
إنت بتصرف عليها ولا شايل همها ولا قاعدة فوق دماغ حضرتك!!

يتربوا في بيئة محترمة مفيهاش غلط وإهانة وضرب... أو هزّ لصورة الأب
والأم في عين ولادهم..

في بنات كثير لسه مجاش نصيبهم أو ربنا كاتب نصيبهم حاجة تاني أحسنهم
من الجواز..

مش إنتوا اللي بتقسموا الأرزاق..

محدّش عارف إيه اللي بيحصل جوّه البيوت عشان يحكم ويتهم ده ويبرّأ ده!!
المجتمع ملوش دعوة مين اتجوز ومين لأ..

مين انفصل ومين مكمل..

يا ريت نبطل نحسس أي حدّ منفصل سواء ست أو راجل إن فيهم حاجة
غلط، لأنهم وارد جدّا يكونوا أحسن مننا كلنا بس ربنا كاتب كده.. وده
الخير ليهم..

ما تتحشروش وما تسألوش أهل البنت كل يوم عن عدلها وتحسسوهم إن
بنتهم عالية!!!

ليه عايزينها تقبل بأي حدّ؟ إنتوا هتستفيدوا إيه؟ ده إنتوا أصلاً لو بتحبوها
عمركو ما هتسربعوها كده ولا هتضغطوا عليها كده.. إنتوا ناس حشرية
ولتاتة مش أكثر!!

كثير القعدة في بيت الأهل بترحم من بهدلة جوازة مش متكافئة ولا
مدروسة.. حصيلتها البنت بترجع مقهورة وشايلة عيال لحمة حمرا على ذراعها

أو دايرة تلف بيهم على محاكم الأسرة..

"المنظرة جابتنا لورا"

- هاللاي يا زيزي.. قدمتي لكنده pre kg واللا لسه؟
= هاي يا روجي.. آه هوديا المدرسة british english amazing international school واتي؟
- كويس، أنا هوديا american super-fantastic overseas school
= طيب، ودي إيه الحلو اللي فيها؟
- دي كل المدرسين مولودين في واشنطن واتبوا في لوس أنجلوس وطلعوا مع أوبرا وينفري في البرنامج بتاعها وكانوا بيتترجموا خطابات الرئيس أوباما ترجمة فورية ومتزيين على الكورن فليكس المستورد kellogg's مبياكلوش غيره وب-
... skimmed milk
= طيب تمام، إحنا بقى عندنا في المدرسة المدرسين في منهم كانوا بيدرسوا للأمير ويليم في قصر باكينجهام، وشوية منهم كانوا بيدرسوا لهاربر بنت ديشيد بيكهام في البيت... الأكسنت بتاعتهم وهم الوهم الصراحة حتى أخو خديجة الكبير لقط منهم بقى fluent ع الآخر.. بقى بيتكلم في البيت عربي مكسر ربنا يحميه..
- إحنا عندنا بنات شيرين وأصالة في المدرسة..

- = وإحنا عندنا بنات عمرو دياب وشريف منير..
- إحنا عندنا summer camp في سويسرا.
- = وإحنا عندنا رحلة لژحل وعطارد في الشتا إن شاء الله.
- التيتشرز والاسستنت كلهم native
- = البواب عندنا " double nationality "
- .. British italian
- اليونيفورم بتاعنا رالف لورين..
- = بتاعنا من تصميم إيلي صعب للبنات، وللولاد روبرتو كافالي.
- فتحوا إستاذ جوه المدرسة.
- = هيعملوا كاس العالم الجاي عندنا في البلاي جراوند.
- بيوزعوا على الولاد soft drinks و fresh juices مرتين في اليوم.
- = إحنا السكول ultra all inclusive with snacks
- = بندفع المصاريف بالدولار.
- بندفع نصهم يورو ونصهم فصوص ألمان حر بنشتره من البرازيل ..
- = مدرسين الفرينش بيجوا يدوهم الحصة ويسافروا فرنسا تاني كل يوم.
- مدرسين الفرينش عندنا شاركوا في الحملة الفرنسية بنفسهم.
- الكانتين كله حاجات imported
- = عندنا بيسفروهم في الويك إند يجيبوا حاجتهم من هارودز ويرجعوا.
- = بيقدموهم في البريك saumon fumé و lobsters
- بيجبوهم الأكل بالطيارة من باريس والمياه معدنية من جبال الألب ..
- = عندنا اللي بيدرب الولاد كرة مانويل جوزيه.

- وإحنا اللي بيدريهم جوزية مورينيو.
- = البروم بتاعنا عملوه في rixos العلمين اللي اليوم فيه بـ ٢٠ ألف جنيه.
- وإحنا هنعمله في جزيرة لانكاوي وهناخد أوتيل من بابيه.
- = جابولنا عمرو دياب وتامر حسني.
- جابولنا شاكيرا وبتاع ديسباسيتو.
- = مدرسة الموسيقى rihanna
- عندنا سيلين ديون والاحتياطي بتاعتها JLO
- = الألماني بيدهولهم ألمان من معهد جوته.
- الألماني بيديه ابن خالت بنت عمت سلفة أخو هتلر ذات نفسه.
- المهم يكون مستوى المدرسة حلو، الواحد مش يبص على المظاهر والله.
- = طبعا مصالحتهم أهم حاجة.. هو إحنا هنعمل زي المحدثين اللي بيتنظروا على بعضهم بالمدارس!! أديهم يتعلموا وخلص ..



تطبيق مكتبة كتب مجانية

متوفر على جوجل بلاي

"مجرد فضفضة"

طبيعي لما أعامل حد كويس أستنى منه معاملة كويسة ..
وطبيعي لما أقف جنب حد مرة واتنين وعشرة هستنى منه لو وقعت يكون معايا ..

لسبب بسيط إني من لحم ودم وعندي إحساس .. وعارفة إن جزاء الإحسان هو الإحسان .

واللي يقولك عكس كده يبقى يقولك كده وهو من جواه مش مقتنع ..
إحنا بني آدمين وعائشين مع بشر ، مش منعزلين لوحدنا فا طبيعي جدًا نستنى من اللي حوالينا ردود أفعال ..

صعب أوي نبقي جدعان ومُخلصين وكويسين ، وفي الآخر مطلوب منا ما نستناش حاجة من حد!! أو ناخذ على قفانا ونفضل كويسين زي ما إحنا !!
ليه يعني؟

أنا نفسي كنت بقول مش هستنى حاجة من حد ، بس لقيته كلام ما يتعقلش !!
أومال ليه بنكوّن صداقات ومعارف وبنيجي على نفسنا عشانهم في حاجات؟
عشان ما نستناش منهم حاجة وقت شدتنا !!

أنا كل اللي بتكلم عليه شعورنا كبني آدمين مش إننا بنشيّل حدّ جمايل والهبل ده .. أو نعاير بعض مين عمل ومين ما عملش .. أنا عارفة كويس إن الخير بيتعمل لوجه الله بس غضب عننا كبشر بنستنى رد فعل من اللي حوالينا لأننا مش ملايكة .. حتى لو بكلمة أو طبطبة ..

اللي اكتشفته إن الناس اللي بتقولك ما تستناش أي حاجة من أي حدّ يقولها
عشان ما تتصدمش، بس في الحالتين سواء استنيت وما لقيتتش أو ما استنيتش
حاجة أصلاً فأنت حاسس إنك جيت على نفسك عشان ولا حاجة!! وده ظلم
لنفسك من الآخر .. الخلاصة إني في كل الأحوال بعامل ربنا وبعمل الخير لوجه
الله بس ساعات غضب عني بحس إني محتاجة ردود أفعال من ناس معينة لأني
مش ملاك ..

ربنا يقدرنا على فعل الخير ويقوينا لما نحس إن محدّش معنا وولا في بيسندنا زي
ما سندناه ..

الدّبة اللي قتلت صاحبها ..

كلنا عارفين القصة دي اللي فيما معناها إن في حب ممكن يموت اللي بنحبه والقصة
دي واقعية جداً لأقصى حد ..

في الجواز بتشوف كذا سيناريو بيتحور حولين القصة دي ..
مرة تلاقي زوج بيحب مراته جدا بس كل حبه منحصر في زاوية الغيرة القاتلة..

بيحجر عليها في كل حاجة.. في تفكيرها، في لبسها، في اختياراتها لأصحابها
وللحاجات اللي تحبها وكأنه متجاوز إنسانة مسلوقة الإرادة عديمة الشخصية بلا ميول
أو اهتمامات !!

أهو الشخص ده بيقعد يخنق فيها ويخنق عليها ويزهقها ظنّاً منه إن هو ده الحب ..
لحد ما تتحول لشخص عكس الشخص اللي اتشد ليه وحبه في البداية! هو ده
اسمه حب؟

هو ده حب فعلاً بس اسمه حب امتلاك.. حب سيطرة... حب هيمنة، لكن عمره ما هيكون الحب بمعناه الراقي الشفاف اللي بيحرك القلب من جوّه ويدقيّه !

اللي بيطلع منا وفي اللي معنا أحسن ما فينا!

الزوج ده بيفضل يضغط يضغط لحد ما مراته تطرشق وتنفجر وتقرر في لحظة ما إن كفاية أوي لحد كده، ده لو هي عندها إرادة وكيان لسه متبقي أو إنها هتعيش متدمرة وكارهه عيشتها لحد ما ربنا يتولاها بقي ..

على الصعيد الآخر في دبةً فعلاً بتقتل صاحبها.. اللي هي الزوجة ..

دي عايشة في دور كرومبو.. خانقاه طول اليوم.. حاشره مناخيرها في كل تننوفة وكل التفاصيل.. مش مديّة لجوزها مساحة يتنفس أو حتى يعبرّ فيها عن حبه لأنه علطول محاصر باستجابات واتهامات وعلطول في وضع دفاع !! وبرضه الزوجة في الحالة دي بتكون فاكرة إن هو ده الحب !!

حب إيه اللي إنتوا جايين تقولوا عليه بس بعد ده كله !!

الحب عمره ما كان أنانية أو فرد عضلات أو تنشيف دماغ والسلام ..
عمره ما كان محي لكيان أقرب حدّ ليا عشان يبقى كربونه مني أو يبقى متفصل على مزاجي !

الحب يعني مساحة حلوة نتجمع فيها بمشاعرنا وقلبنا وعواطفنا، بس في نفس الوقت مش لاغيين كيان بعض .. مش لاغيين مساحتنا الشخصية ولا اهتماماتنا ولا كياننا!

الحب ملوش علاقة بالكبس على النفس ولا بالدبة اللي فعصت صاحبها! ده موت بالبطيء!

تطبيق مكتبة كتب مجانية
متوفر على جوجل بلاي

"إحنا بنكذب"

متصدقوناش لما نقولكوا "سيبونا لوحدنا وامشوا" ..
متصدقوناش لو قولنا "كله تمام ومش محتاجين أي حاجة" لأن لا كله تمام ولا نيلة!!
إحنا من جؤانا مجروحين وقلوبنا تعبانة ..

أوقات كثير بنكون متضايقين وزعلانين بسبب أو بدون سبب وبنبقى عايزين نقعد
لوحدنا، بس في جؤانا حته إن نفسنا حبايبنا يفضلوا جنبنا حتى لو قولناهم
ابعدوا.. حتى لو كنا رخمين ومودنا زفت.. حتى لو قاعدين ومبتفتحش بقنا بولا
كلمة !!

حتى لو غلاستنا ممكن تطفش أي حدّ ..
يمكن بنكون عايزين نثبت لنفسنا إن حبايبنا بيحبونا في كل حالاتنا.. وهيتقبلونا في
كل الظروف.. واخذينا شروة واحدة بفرحنا وحرزنا.. بنكدنا وضحكنا ..
بنبقى مستنين نحس إننا فارقين معاهم حتى لو كنا في أسوأ موود ..
متصدقوناش لما نقولكوا إننا كويسين وكله تمام وتقدرنا تسيبونا عادي.. إحنا نفسنا
نترمي في حضنكم ونعيط زي العيال الصغيرة، بس مش عايزين نطلبها وعايزينها
تيجي منكم.. عشان منحسش بالذنب إننا بنكد عليكم ..

إوعوا تمشوا وقت الزعل أو الحزن أو الاكتئاب وتدوا ضهركوا للناس المهمة في
حياتكم.. الناس دي بتكون محتاجكم أكثر من أي وقت تاني وحتى لو شاركتمهم
القعدة وهما ساكتين هيشيلوهمالكم أوي وعمرهم ما هينسوها ..

اللمة الحلوة مش بتبقى على الحلوة بس، بتبقى على الحلوة والمرة لأن المرار هو اللي

بيدي قيمة للأوقات الحلوة بعد كده.. وهو اللي بيخلي علاقتكم تبقى قوية بجد
وتعيش طول العمر.

"سر الخلطة"

هو إيه السر اللي بيخلينا نكمل في الجوازة، وإيه اللي بيخليها تستمر لآخر يوم في
عمرنا؟

ليه جدي وجدي كانوا قاعدين مع بعض كل ده، وليه مكانوش بيستحملوا يفارقوا
بعض حتى في عز مرضهم؟ مع إني مكنتش بشوف في عنينهم نظرات إعجاب أو
شوق زي اللي بتتشاف بين اتنين بيحبوا بعض؟!

من الحياة اللي حوليا توصلت إن سر الجواز الناجح اللي بيعمر للآخر هي خلطة
سرية بين كل اتين متجوزين زي بتاعة كنتاكي... حاجة ناس كثير من برّه بتحاول
تعرف مكوناتها بس محدش بيبيقى عارف سرها إلا الاتنين اللي طابخينها سوا...
أهم أساسيات التوليفة دي "الألفة والاحترام والتعود اللي بيحصل مع السنين
الكثير اللي بتمر"

كل درجات الحب حتى وإن كانت أعنفها، وحتى لو كان الحب أفلاطوني ومفيش منه وياما اتضرب بيه المثل إلا أن حدته ولهيبه وشعلته بتنطفي تدريجيًا بروتين الحياة اليومية ... بزحمة الدنيا .. بكثر الطلبات .. بمسئوليات الأولاد..

بس في أزواج أذكاء يحاولوا يكسروا الروتين على قدّ ما يقدرُوا، بس حتى مهما حاولو فا الحب المولّع اللي كان بينهم اتطفى شوية... أخذ منحني تاني وشكل تاني... بقي عشرة وسند واحتواء وكتف تتسند عليه لما تتعب مش بصة كلها انهار بشعر أو بشكل خارجي أو شوق مراهقين ...

اللي يخلي الناس تكملّ سوا وتستحمل عيوب بعض هو إنهم مبقوش يشوفوا الحياة إلا مع بعض.. شافوا إنهم ناقصين ومبيكملوش إلا وهما سوا ... مش قادرين يتخيلوا إن حدّ فيهم يقرر يلّم هدمه ويسيب التاني فا ماسكين في بعض هما الاتنين بعزم ربنا ما اداهم ...

الجواز جميل أوي إنه يبدأ بحب وشوق وضربات قلب سريعة صوتها بيتسمع من على بُعد كذا متر، ووش بيقلب أحمر أول ما نشوف اللي بنحبهم قدامنا، بس اللي بيزق الجواز عشان يكملّ لآخر المشوار هي العشرة والنضج في الحب اللي بيترجم لإيد ماسكة في إيدنا لحد آخر يوم مكتوبلنا نعيشه في الحياة دي ... إيد مقررة إنها مش هتسيينا لحد آخر نفس.

"فلاش باك"

عايزة أسجلّ صوت عياط ولادي وهما أيام وشهور... صوت الواوأة ده هيوحشني عشان شوية وهيعرفوا يتكلموا وهنسى الصوت ده ...

أصور كلبشتم فيا بصوابهم اللي بخاف أمسكها لحسن أكرها وبصتهم ليا لما
يشوفوني ماشية قدامهم في الشقة وعايزيني أشيلهم "أوبج"
أصوّر أول سنّة... وأول قصّة شعر ...
عايزة أسجل أول ماما وأول بابا وأول كلمة "مام" اتقالت عشان هتوحشني لما يبقوا
رغاين وبيعرفوا يقولوا جمل زيهم زينا ..
أصورهم بالباقتة ولحوسة بقهم وهما بيتفوا الأكل عشان عايزين يرضعوا وخلص !
عايزة أصور لحظاتهم أول مرة يجبو..
أول خطوة جربوا يقفوا فيها ويسندوا عشان يوصلونا واحنا فاتحين دراعاتنا ليهم
وبنقولهم "تاتا... تاتا" ورميتهم علينا واحساسهم بالأمان أول ما يلمسوا طراطيف
صوابنا ...
أفكر أول عيد ميلاد وبصتهم باندهاش لأول تورتة ولغوصتهم قبل ما يبقوا على
سجدة عشرة في يوم عيد ميلادهم ومتصورين مع صحابهم ومش فاضينلي ..
أحتفظ بصورهم بأول يونيفورم وبوزهم الصغن طالع في الصورة ووشهم المكشّر
وبصتهم اللي من طرف عنيم عشان مش عايزين يتصوروا عشان صاحيين بدري
وشايلين الشنطة اللي عليها سبونج بوب على كتفهم ...
لحظة ما بجيهم من المدرسة وابتسامه "وحشتينا يا ماما" ورغيم وقت النوم
وبوستهم الدافية اللي على خدي لو زعلوني في حاجة ...
لحظة الجراد يويشن بارتني وهما لابسين الكاب ويتكعبلوا في الروب وحركاتهم وهما
بيعملونا باي باي بقلبهم قبل ما يكون بإيدهم عشان نبقي مركزين معاهم طول
الحفلة ...
أفكر فرحتي بأول شهادة وفرحتي بأول مرة تمرين... وفرحتي بأول سورة قرآن

تتحفظ ...

فرحتي بأول مرة يسوقوا عجلة من غير سنّادة وأول مرة يعوموا من غير عوامة البطة
!



كل ما سنة بتعدي بحس إني عايزة أمسك فيها..
عايزة أكلبش في كل تفاصيلها

على قدّ ما بفرح وهما بيكبروا قدّام عنيا على قدّ ما بيبقى نفسي أحضن كل لحظة
فاتت كانوا فيها في حضني أنا وبس ومكانوش يعرفوا في الدنيا دي حاجة غير
حضني.

الأيام هتجري وهنتفاجئ إن الصغيرين كبروا ..

وإن اللي بناخد بالنّا منهم بقوا هما اللي بياخدوا بالهم منّا ..

وإن الكف الصغنن بقي إيد كبيرة لابسة دبلة ..

وإن الفستان اللي قدّ الكف فجأة بقي فستان أبيض بطرحة  
استمتعوا بالأيام... استمتعوا بكل تفاصيل ولادكوا عشان مش هترجع تاني.



تطبيق مكتبة كتب مجانية

متوفر على جوجل بلاي

اسكتي إتني ولا فاهمة حاجة !!!

المهندسة دي ممنوعة منعًا باتًا من الشغل حتى لو شاطرة ومش مقصرة في بيتها
وظروفها تسمح !!!

اللي رتبت على دفعتها دي منعها تكمل دراسات عليا عشان ما تتشغلش عنك
وعن البيت !!

الواجهة الاجتماعية دي ممنوعة تقابل أصحابها أو تختلط بالناس لأن الاجتماعيات
دي مش مهمة!!! كبيرها تروح لماتها ودمتم ممنوع منع تام الاختلاط بصحباتها
لأي سبب..

السؤال هنا ليه مخترتهاش واحدة أمية.. مش بتفك الخط.. مش بتحب تفكر..
مكملتش تعليمها.. مش بتعرف تتكلم كلمتين على بعض ليه اخترتها عكس ده كله؟

أكيد عشان عاجباك، طيب ليه عشان عاجباك لازم تحطمها وتموت فيها كل
مزايها..

عشان لما تكسرهما تثبت قوتك !!

هو ده مقياس القوة عندك؟

مراتك اللبقة بقت علطول مخروسة وحاطة إيدها على خدّها!!

مراتك اللي معاها أعلى شهادة بقت حمارة ولا بتفهم أي حاجة !!

مراتك الاجتماعية بقت خيال مائة بلا روح !!

اللي تلاقيه كده إوعي تتجوزيه.. إوعي تقبلي تكوني برواز شيك على الحيطه أو
حتة أنتيكة غالية مرمية على الأرض وماليها التراب لحد ما هيجيلها يوم وتترمي في
الزباله !!!

إوعي!

ملحوظة.. لزم التنويه إن ده مش كلام عام على الرجالة دي حالات موجودة بس
مش بعمم طبعًا..

زي ما في رجالة بتخسف بستاتها سابع أرض في رجالة بترفعهم لسابع سما وأصلًا لو
سما واحدة رضا برضه..

قالك Bridesmaid !!!

موسم الأفراح جاي في العيد..

مبدئيًا.. ألف مبروك للعروسين..

بس أبوس إيد كل عروسة..

مش لازم تلبسي عشرين واحدة من صحباتك بالإجبار لون أصفر كناري فاقع
وطرحه أورانج فسفوري كده من اللي بتنور وييقوا شبه الكتايت اللي بنص
جنيه..

ويدخلوا القاعة يعموا الناس بألوانهم..

عشان برايد ميدز وكدزه..

عيننا بتوجعنا صدقيني وبيطلعوا في الصور زي العفاريت..

وأرجوكي بلاش تلبسيهم فساتين أحمر منقط في أسود..

إيه الحكمة إنهم يتقمصوا دور البطيخ ولب البطيخ؟

اختاري ألوان عادية وجميلة...

ليه تختاري الليلاه؟ وإنتي أصلاً ولا تعرفي درجته؟ وليه شبطانة في الكافيه أوليه

اللي فيه تينج ماهوجني جانجااه مع حزام جنزاري؟

ما تخرجيناش عن شعورنا بقي!

هو أي كلام ينتقال وخلص..!!

فهمني بس إنتي مصممة تزنيهم في الألوان العجيبة دي ليه!!

المنظر يبقي زي لوح فاروق حسني اللي بتقلب البطن دي ومحدث فاهملها أي

حاجة!!

بتبقي فن ترجيعي بأمانة..

حضرتك عروسة على عينا وراسنا ومقولناش حاجة، بس مش عشان الصور

تطلع حلوه ترمطي بنات الناس معاكي وتلبسيهم كده..

أو تقوليهم يحولوا كلهم ويوروننا قدرات التخلف العقلي المكبوتة من تبريق ونفخ
خدود كنوع من الفنفة..

ده اسمه هطل رسمي مش صور فرح يا ماما..

وحرام برضه تقطعي نَفَس أهم نط في الهوا وإنتوا بتتصوروا... وتعيدي النطة 50
مرة عشان سوزي ما ناطتش كويس أو عشان النطة بتاعة مها كانت أوطى من
نطة سها بتلاتة مللي !!

إن شالله عنهم ما نطوا..

وإن شالله عنكوا ما اتصورتوا..

العيال بقوا شوربة والميك آب باظ من الفرهدة!!

وفكرة إن كلهم يتصوروا بيلطموا وإنتي في حضن عريسك.. قال يعني حركة.. فا
دي فكرة مهبة الصراحة..

أو إنهم يلبسوا شنبات.. يجد يع بالأوي..

أنا بنصحك كأخت والله..

بوررراحه شويه يا عروسة..

دول طلوعوا نزلوا صحابك بردك..

وممكن سوقهم يوقف لو واحد شافها لابسة بطيخة واللا كتكوت.. أو عايشة دور
المينتالي ريتاردد..

حرام المرطه دي...

ونتمرظلكم يا حبايب في أفراحكوا، قولوا إن شالله..

"# من_الإنبوكس"

"رسالة مش هتوصل"

أنا وواحدة كنا أصحاب جدًّا من فترة المدرسة لحد الكلية، كلنا مع بعض عيش وملح.. عدت علينا أيام كثير حلوة ووحشة..

اتربينا مع بعض، في بيوت بعض..

أهلها كانوا أهلي..

بس مرة وبدون الدخول في تفاصيل كثير الشيطان دخل بينا جامد أوي وقاطعنا بعض بسبب موضوع أخذناه إحنا الاتنين على كرامتنا... خلصت أيام الكلية وإحنا مقاطعين بعض ومرت الأيام...

عرفت فجأة إن صاحبتى جالها نزيف واتنقلت المستشفى وحالتها اتدهورت بسرعة جدًّا لأن عندها أنيميا حادة والنزيف وصل للمخ وعقبال ما عرفت وقررت أروح عشان أصلحها كانت توفها الله لأنهم مقدروش يسيطروا على الحالة..

مش هقدر أوصفلكم قهرتي وإحساسي وأنا رايحة أعزّي فيها!!! وأنا رايحة أمشي في جنازتها!!!

وأنا رايحة أشوفها من سنين، بس المرة دي بشوفها في كفن ونعش قدامي!

مش قادرة أوصفلكو إحساسي وأنا شايفة أمها زي المجنونة ومش مستوعبة اللي
بيحصل قدامها!

افتكرت كل لحظاتنا سوا... ضحكنا, هزارنا.. حتى زعلنا!!
كان نفسي أصرخ وأقولها سامحيني لأن عمري ما تمتيت تروحي مني وإحنا مقاطعين
بعض !!!

أنا كلمتها طول ما إحنا في الجنازة وقولتلها متزعلش مني بس معرفش هتسامحني
واللا لا

معرفش هتحس بيا زي زمان واللا قلبها زعلان وواحد على خاطره وبطل يحس
بيا!

محدّش يعمل زي.. اغفروا وسامحوا اللي بتحبوهم، العمر بقى قصير أوي ومحدّش
عارف هنتلاقي تاني واللا هنشوف وشوش بعض تاني إمتى !!
واللا العمر قصير أوي لدرجة إن مفيش لقا أصلا ..

أنا ندمت إني مصالحتهاش وكنت بتقطع لما عرفت إنها بين الحيا والموت ومش
قادرة أدخلها وأقولها إني بحبها ... وإن عمري ما عرفت أزعل منها!
الدنيا والدوام لله والدنيا مش مستاهلة نضيع فيها لحظة وإحنا متخاصمين مع ناس
حبناهم بجد وكلنا معاهم عيش وملح ..
سامحيني والوداع يا صديقة العمر..
الوداع يا أختي ...

تطبيق مكتبة كتب مجانية

متوفر على جوجل بلاي

"زتونة كذب"

لو إنتوا داخلين على جواز أتمنى تقروا الكلام اللي تحت ده عشان فيه الزتونة من واحدة بقالها حبة حلوين متجوزة وشافت كتير من حكاوي اللي حولها ...

- الجواز مش زي ما بيطلع في الفيديو كليبات "رمي مخدات... جوزك هيمسكك من وسطك وإنتي واقفة بالشورت وشعرك سايح على كتفك وبتعمليله توست بالنوتيل"، لأن أصلا جوزك استحالة هيفطر حاجة غير فول وطعمية... وإنتي شعرك سلك مواعين واتهرى من فرد البروتين والكراتين وجسمنا كمصريين الوسط فيه جزء مندثر ملوش وجود ولازق صبّ كده في الكرش.. الجواز حالة عادية جدًا يا حبابي، وفي الواقع هتلاقي جوزك جنبك بالفانلة الحمالات وكرشه مدلل ولو ربنا كرمك مش هتشوفي الفانلة القطنيل إلا بعد كام شهر من جوازكو..

- جوّ إنك تدخل الشقة فا تلاقي النور بيتفتح وفي شمع وبلايين مالين الشقة ده تكلمة لجوّ أفلام تامر حسني في "عمر وسلم"، الكلام ده ولا بيحصل... ولا هيجصل، واستحالة هيجصل...

إنتي ممكن تدخلي هتلاقي المطبخ ضلّمة فا تفتحي النور ويقابلك ذكر بط بريشه نايمك في الحوض عمت جوزك بعثاهولكم من البلد وعاملك مفاجأة عشان تنضيفه وتعمليهوله بكره هو وأمه وأبوه وإخواته مع ملوخية ورز، يعني حتى ذكر البط مش جايبه عشان سواد عيونك !!

- مراتك اللي شوفتها يوم فرحكو صعب جدًا أوعدك من قريب أو من بعيد إنك هتشوفها تاني.. خليك واقعي... إنت دفعت ٨٠٠٠ جنيه للكوافير عشان

يردهالك على البارد، فا منفعش، فا ردهالك على السخن، فا متعملش إنك متفاجئ بشكلها أول ما بتصحى من النوم لأن شكلك إنت كمان غريب جدًا وهي ساكنة ومستحمة... فا حاول تنسى شكلها اليوم ده وتقطع صور فرحكو!! مالها صورة الإيديين أم دبل.. حلوة ومبتقلبش المواجع ... عشان الجرح لسه واجع سعادتك!

- حوار إنك تقعدى بين رجليه على الكنبه وهو يلعبك في شَعرك وِانتوا متغطينين ببطانية عليها قلوب وبتتفرجوا على فيلم السلم والتعبان وفي إيديكو مج هوت شوكليت.. فا دي برضه زتونه كذب.... كل واحد منكم هيكون متلحق على كنبه ومعاه بطانينه وبتشوفوا عبد الغفور البرعي وبتشربوا حلبسة ...

- الطواجن والمحمر والمشمّر اللي كنت بتاكلهم عند حماتك وكانت خطيبتك بتحلفك بأغاظ الأيمان وباللات والعزي إنها اللي عملاهم، مش هتلمحهم تاني... خدلك بقى ٣ سنين بانيه ومكرونة، ومكرونة وكفتة لحد ما يبانلك صاحب وتتوب ...

- مش هتقضوا الليل بتلعبوا بلاي استيشن وتحضنوا بعض لما تجيبوا إجان.. عارفه ليه؟ عشان معاكوش تشتروا بلاي استيشن أصلاً... فوقى ده إنتو بتشحتوا من تاني أسبوع في الشهر ... يا شحاتيينيين..

- مش هترشوا على بعض دقيق في المطبخ وتضحكوا... إنتي لو فكرتي عملي كده هتتسحلي كنس ومسح وممكن من غلك تشفطي جوزك بالمكنسة عشان يحس بالأرف اللي وراكي وهيهدك على الدقيق اللي اترمى، هو إنتي متعرفيش الكيلو دلوقتي بكام يا ماما!

الأفلام والفيديو كليبات لعبت في دماغ بنات كثير أوي إن الجواز كله لعب وهزار

وحب بلا توقف، وعليت أوي بسقف طموحات وتوقعات الشباب والبنات فا بقوا بيتصدموا أول ما يتجاوزوا ويتقفل عليهم باب
الجواز فيه حب ولحظات حلوة كتير وفيه ضحك وكلام جميل، بس مش كله كده... في أوقات بيكون في شدّ وزعل وخصام وده الطبيعي فا اعرفوا حقيقة الجواز عشان متتصدموش وتقولوا مش لاعبين!
الجواز علاقة مقدسة بين اتنين فيها كتير حلو بس عمرها ما كانت وردي أوفر زي ما بيصورولكم.. معقولة هتصدقوا تامر حسني ومي عز الدين وتكدبوا 40 مليون كابل متجوز!



"منيو الانش بوكس"

مامت يوسف: يا ماميز... ممكن أفكار للانش بوكس بليز؟

مامت زياد: ممكن تحمّري بانيه أو عملي كفتة و عملي معاهم رز بسمتي وخضار سوتيه مسوياه على البخار و متنسيش البروكلي عشان مفيد جدا..

مامت جاسر: ممكن عملي فيليه سمك و سمبوسك لحم و معاهم فشار وكل ده بمعلقة زيت إكسترا فيرجن أوليف أويل..

مامت أيتن: إنتي جبتي القلاية اللي بمعلقة زيت واحدة بكام؟

مامت جاسر: كانت من سنة بـ ٢٥٠٠ ممكن دلوقتي بـ ٦٠٠٠ معرفش.

مامت أيتن: تمام جدا.

مامت لينا: ممكن عملي جلاش بالبسطرمة وحتت سويس متشوحة في زيت بذرة القطن، بس السويس يكون معمول في البيت هبعثلك طريقته سهلة أوي ممكن تصحى قبل الباص بخمس ساعات تعمليه و هتلاحقي.

مامت روان: جرتي سبرينج رولز الجمبري الچامبو مع رز أسمر كامل الحبة عشان يكون صحي أكثر؟

مامت يوسف: لاء، والله مجربتش.

مامت روان: جريبه ده تحفة.

مامت حمزة: ممكن ستيك لحمة متشوح في زبدة مع مشروم صوص مع نودلز بالخضار و فرينش فرايز بنكهة الباركيو، وأهي حاجة سريعة و حطيله معاها سلايس أناناس طازة هيجبها.

مامت هنا: جربي ميني بيتزا ستافت كراست قسميها أربع تربع... ربع بيروني... ربع سوبر سوبريم... ربع سي فوود... ربع هاوايان مع صوصات بقى زي رانش صوص والحاجات المعروفة دي وجنبا موتزاريلا ستيكس و خلاص.. عشان

تخلصي ..

مامت فريدة: بصي متغليش نفسك... أنا بجيب بواقي الديك الرومي وبعمله فاهيتا
كده، أو ممكن كوردون بلو مع عيش بالحبوب الكاملة وزبادي بعمله في البيت
بطعم التوت أو الكريز على حسب الفاكهة الموجودة عندك في التلاجة عشان
متتكلفيش جامد.

مامت چايدا: اللي جربتها وچوچو حبتها أوي سوشي بالخضار كان يجنن جنبته من
موري سوشي وأهو تغيير برضه للولاد عشان ميزهقوش ...

مامت يوسف: ميرسي أوي يا ماميز تعبتكوا معايا بجد
♥♥♥♥♥

لا على إيه يا حبيبتى، المهم الولاد يتغذوا حتى لو بحاجات بسيطة وخفيفة..



تطبيق مكتبة كتب مجانية

متوفر على جوجل بلاي

أفكر إنني طول حملي في ابني كنت فاكرة إنني هبقي مبسوطه بنسبة ١٠٠٪ وبس ..

يعني مفيش أي شعور تاني هيختلط مع سعادي.. وكنت مستنية اليوم اللي هشوفه فيه بفارغ الصبر ...
بس المفاجأة كانت أول ما فوقت من بنج الولادة!! محسيتش بأي حاجة إلا وجع...
وجع مؤلم مع كل عطسة وكل حركة وكل نفس!!!
هو في إيه؟ مبقتش فاهمه!!
سألت على ابني وسألت على مُسكن بنفس قوة السؤال، لأن الوجع اللي حسيته كان أقوى من اللي تخيلته...
أول ما جابولي ابني لقيت إن إحساسي كان مش مفهوم.. مش واضح... متنغمش...
خليط من السعادة والخوف..

والغريب بالنسبالي إن نسبة الخوف كانت بتزيد كل ما أفكر إنني هقعّد مع البيبي الصغير ده لوحدي بعد كده!! وبعد ما حضنته وعيَّط حسيت إنني اتسمرت مكاني مش عارفة المفروض أسكته إزاي!!! وكنت عايزة أديه لأي حدّ يتصرف معاه!

أنا كنت فاكرة إن الأمومة تغيير بامبرز في هدوء وطفل نايم زي الملاك في سريريه وجنبه موسيقى رقيقة ورضاعة هادية واخده في حضني واستمتع بكل لحظة بتمر وهو في حضني... وحياتي ماشية عادي ...

طلع إن ده بيحصل بس في إعلان بامبرز!!!

واكتشفت إنني أخذت أكبر قلم لما لقيت لا الرضاعة سهلة ولا المصص بينيم ابني،
وحتي البامبرز بتاع حديثي الولادة كبير عليه ويسرّب!! وحياتي بقت واقفة
مبتتحركش!!

تحوّلت حياتي من محاولات فاشلة للرضاعة وتعب ووجع مع نوبات صراخ متوقفش
من وجع مخص وانتفاخات ابني مع هزّ وشيل وطبطبة ومرجة على أمل إنه ينام
ومينامش!!

بقت التيتينة أهم عندي من أي حاجة في الدنيا، وممكن أنسى اسمي بس منساش
أحطله كريم التسلخات عشان ميتعبش ويفضل صاحي بيتألم طول الليل!

بقت خروجاتي تتلخص في مواعيد لدكاترته ومواعيد لدكاترتي أو رايحة أشتريه
حاجات من الصيدلية!! وبقت أهم تواريخ عندي بدل الأنيفرساري وعيد جوازي
مواعيد تطعيم ابني!!! وتواريخ انتهاء صلاحية الأدوية!

من جوايا كان نفسي أصرّخ وأقول "بس إحنا متفقناش على كده!" يعني هي دي
الأمومة!! طب مش لاعبة!!! أنا عليا من ده كله بإيه؟

أومال اللي كنا بنشوفه في التلفزيون ده كله إيه؟ خيال علمي؟!!

ومع الصراع اللي جوايا بدأ يتسرب جوايا عفريت "اكتئاب ما بعد الولادة" اللي
هو أنا مش ناقصاك أقسم بالله!!

ده بييجي كومبو كده "عياط بدون سبب مع هروب من القعدة مع الناس ونكد مع
نفسه كده"

بقيت أبص لنفسي الأقي واحدة منكوشة فابقيت أجري بسرعة من قدام أي مرآة
عشان مشوفش المنظر ده!! بقيت واحدة بتتقلب من على السرير عشان تعمل
ببرونة الأعشاب، وممكن تدخل الببرونة في مناخير الواد من كتر ما هي مطبقة
ومش دريانة!!
معقولة عيشتي هتبقى كده؟! أو مال اللي قبلي خلفوا وعاشين إزاي؟! !!

وقبل ما انفجر ابني قرّر يعوّضني عن كل الكآبة اللي جوايا... بدأ يناغي.. يبصلي
ويضحك... يحضن صباغي بإيده... يهدى لما يبقى في حضني...
المغص بدأ يقل... النوم بدأ يظبط... بدأت أحسّ بجلاوة النعمة اللي في أيدي
وأعرف إن اللي عدّيت بيه كان لازم أعدّي بيه لإن ده أول بيبي... وإنه فترة مؤقتة
مش هفضل كده طول عمري...

شوية وابني قرّر يعوّضني أكثر، وبدأ يجبي ويسند ويلف ورايا الشقة عشان
يحب يشوفني قدامه... فجأة نسيت كل السواد اللي مرّيت بيه أنا وهو لقلة
خبرتي، وعرفت يعني إيه الأمومة مش سهلة بس مستاهلة

"سؤال جماهيري"

اللا بالحق.. هو ليه الرجل المصري يبقي قمة في الجنتلة والذوق مع أي ست غير
مراته؟ وخصوصًا لو زميلاته في الشغل..

تلاقية ظريف ولذيد ومُتكلّم ولبق ويفتّح مواضيع ويرد على النقاشات مع إن الغلبانة في البيت بتقعد تكلم نفسها بالساعات على أمل إنه يرد وكل اللي بتاخده منه هزّ راسه وبتلاقية كالعادة نام منها في النص أو عمل نفسه نايم عشان يسبها تهاتي لوحدها!! في البيت بتشد منه الحرف والكلمة وفي الشغل الرغي ملوش نهاية ... ومش بس رغي ده ضحك وهزار ولذاذة!

طب ليه بيستذوق مع أي حدّ غير مراته؟! تلاقية يفتح باب العربية... يشيل أي حاجة بدلها عشان عيب هي تشيل وهو واقف مع إنه بيسب مراته تغير الأنوبة في البيت وتنتعها على قلبها عادي لأن مش كل حاجة هو هيعملها؟! ولو قالتله ما تفتحلي باب العربية فاممكن يمشي ويسبها تجري ورا عربية الرش ورا!!

وليه لو واحدة خدت عليه شويتين تلاتة وجيتي تقويله يقطع معاها يركبه ٦٠ عفريت إن إزاي يقل ذوقه ويعمل كده أو إزاي تبقى عملا له منشن وميردش مع إنك كل يوم بتعمليله منشن في أورطة بوسات بس بيقولك مش فاضي للتفاهات دي..

إنتي لو خرجتي مع جوزك وأصحابكو في خروجة بتذهلي من مدى ال-cuteness والعسل اللي بتبقى في جوزك، وقد إيه بيكون مشارك في الكلام خصوصًا لو واحدة وجهته كلام!!

السؤال هنا: هل الراجل المصري بيحب يحس إنه محبوب من كل اللي حوليه فيما عدا مراته عشان ضامن إنها في إيدته وبتاعته خلاص فامش محتاج بيهرها؟ واللّا بيحب يحس إن في نظرات إعجاب من البنات اللي حواليه، اللي هو بصوا ده چنتل إزاي.... ده رقيق إزاي؟ ده خسارة فيها!!!

بس وبعدين أخرت الموضوع ده إيه غير مرقعة من كل من هب ودب، وإنك
بتأذى مشاعر مراتك اللي مشافتش منك ربع الدلع اللي بتدلقه على زميلاتك بره
!!

استذوق مع مراتك أولى عشان اللي بتعمله ده آخرته مش حلوة.. اعتبرها فريق
العمل يا أخي!!

الأول والثاني واللي بعده

الحمل الأول: مش قادرة أستنى أعرف نوع البيبي إيه!! لازم أروح أعمل سونار 4)
أول ما أدخل التالت..

الحمل الثاني: هبقى أروح أشوف النوع على الرابع عشان بيان..
الحمل الثالث: يعني هيكون النوع إيه يعني؟ فيل أبو زلومة!! ما هو يا ولد يا بنت
!!

الحمل الأول: الجنين دلوقتي في حجم العنبة، أنا منزلة أبلكيشن بيتابع حجم البيبي يوم
بيوم..

الحمل الثاني: والله معرفش، بس أنا كرشي كبير فا أعتقد حجمه حلو هبقى أشوف

بس هدخل الواد التواليت الأول.
الحمل الثالث: والله إنتوا عالم فاضية!! أنا رايحة أجيب العيال من المدرسة.

الحمل الأول: وضبت أوضة تحفة للبيبي كلها بينك وفيها دولاب صغنن ومليتها
دباذيب..

الحمل الثاني: هينام في وسطنا معندناش مكان..

الحمل الثالث: هفرشله على الأرض جنب إخواته بس هنبه عليهم لحسن يدوسوا
عليه يبطوه..

الحمل الأول: كتبت على ١٠ جروبات عشان أختار اسم للبيبي وبعمل سيرش على
الت واشترت كذا كتاب.

الحمل الثاني: أي اسم يليق على اسم أخوه.

الحمل الثالث: لما ينزل هيتسمى.. ملحقين على إيه ولو قعد أسبوع من غير اسم
هيجرى إيه يعني!

الحمل الأول: لبست لبس الحمل من التالت واشترت دريلات وفساتين حمل
مخصوص..

الحمل الثاني: جبت بنطلون حمل واحد بلبسه على بقيت لبيسي.

الحمل الثالث: هو إحنا بتوع لبس حمل !!

الحمل الأول: اشترت كل لبس البيبي من بره وجبت حاجات أونلاين تحفة، نفسي يكون مميز..

الحمل الثاني: هيلبس من أخوه..

الحمل الثالث: هيلبس من أخوه أو أخته أو من أبوه عادي!! هنلاحق على إيه واللا إيه..

الحمل الأول: اتوحت على بنتي في جمبري.

الحمل الثاني: اتوحت على جنبنة رومي.

الحمل الثالث: والله عيب علينا.

الحمل الأول: هعلمه البوتي من وهو سنة.

الحمل الثاني: ما له البامبرز؟

الحمل الثالث: ما لها الكوافيل؟



"مول إيه؟ هو إحنا بتوع مولات؟"

متوفر على جوجل بلاي

- عايزة أخرج يا محمود!

* حاضر بكره إن شاء الله نروح لماما.

- بقولك عايزه أخرج، إيه علاقة ماما بالخروج؟ ما كل مرة الجيران يسمعوا صوتنا من كتر الخناق وبنبقى هنتطلق! مش فاكر آخر مرة لما سبتك البيت شهر!
* عايزه إيه يعني؟

- مروان وفريدة هيقولوك..

* ما تقولي إنتي؟ يا جبانة بتجيبها في العيال الغلابة يا جبانة!!

مروان وفريدة

تعاللووووا بابا عايزكم!

* أنا لا عايزهم ولا نيلة!!! ادخلوا جوّه يا حبايبي!

= بابي حبيبي... عايزين نخرج!

* ما قولنا ماشي... هوديكوا بكره جنينة الحيوانات..

= جنينة إيه، عايزين نروح نتزحلق!

* نتزحلقوا!! بس كده؟ وإنتي جايباهم من جوه يا هبة عشان يقولولي عايزين

نتزحلق!! هخلي ماما تمسح الأرض والبسوا بيجامات قديمة واتزحلقوا يا حبايبي..

= يا بابا، نتزحلق على الجليد!

* يا نهى!! العيال دي اتبهلت!! مش قولتلك بلاش شيبسي كثير يلحس النافوخ!

أديهم عملوا دماغ ويندوز أبو ريحة وحشة ده وهيقرفوني بقي..

- لا يا حبيبي، دول عايزين يتزحلقوا بجد..

* يا نهى، هو أنا لاقى أأكلكم عشان أوديكوا سويسرا واللا حتى لبنان!!! ادخلي

كلمي مكواه واستغفروا ربنا!

= يا بابي، ودّينا نتزحلّق وهنشوف ال- penguins مرة واحدة بس.

* ما هو يا تترحلّقوا يا نلعب بينج بونج، لكن الاتنين إزاي يعني.. والله العظيم ياما
قوت الويندوز ده أوحش من البانجو ومحدّش صدّقي!

= يا بابي penguin يعني بطريق!

* يا نهى العيال دي ضارية محشي على الصبح!!! بطريق إيه؟!!! ده إحنا معندناش
إلا غوريلا يتيمة مأشفة وعندها أكتئاب في جنينة الحيوان!!! اعقلوا الطلبات
وقومي أكوي أم القميص يا نهى!

- يا حبيبي، ده في مول مصري مول الإمارات..

* وده بكام بقي؟

- 400 جنيه لكل واحد فينا، ولو عايز جواناتيات زود 30 جنيه..

* بس، يا خسارة!

- إيه بس قلقتيني.. أنا كده اتوغوشت!

* البطريق لسه هتيجي الأسبوع الجاي..

- يا لهوووووي!!!!!! تهزري يا نهى!!!!!! سيبوني لوحدي دلوقتي..

* ما لك يا محمود؟..

- لأ، سيبوني بجد واقفلوا النور وافردني الكوفرتة!

* في إيه يا محمود!!!

- خبر البطريق ده قفلي اليوم!! معقول لسه مجوش!!!

* إنت بتتريق.. طيب دخلنا السينما اللي هناك..

يقولوا فيها مؤثرات، لو الفيلم فيه تراب أو مطرة بيدلقوها عليك عشان تعيش في

الفيلم..

- طب يرضيكي أهبيك بالتراب إنتي والعيال!!! وبعدها أخرج تقويلي اشترى لنا
لبس بدال اللي اتمرغ في الطينة في السينما!!!

أنا ناقص مرمطة كمان هتمسخر جوه السينما!!! هبقى أردمك بالتراب في الصلاة
وأفتحك روتانا سينما وأخلي العيال تهريكي تفاعلة بدل المطرة ..
* محمود، إيه النكد ده !!!

- يا نهي أحب أعرفك إن كل ما أملكه 115 جنيه لحد آخر الشهر، وإحنا لسه
يوم 3!!! جاية تقويلي بطاريق وتلج و1500 جنيه في ساعة زمن!!! قومي احرقيلي
الزفت القميص ده بسرعة وابدأي لنا في الغدا الله لا يسيئك بس ابقى كترى ال-
penguins واردميه في الفجيتار عشان بجه سبايسي ! قال بينج بونج قال، ده
إحنا بنتشعبط في رضا ربنا يا كلاب!

"أشكو إليك"

- هااااي يا زيزي.. قدمتي لكنده pre kg واللا لسه؟
= هاي يا روجي.. آه هوديا المدرسة british english amazing
international school وإنتي؟
- كويس، أنا هوديا american super-fantastic overseas school
= طيب و دي ايه الحلو اللي فيها؟
- دي كل المدرسين مولودين في واشنطن و اتربوا في لوس انجلوس و طلوعوا مع

اوبرا وينفري في البرنامج بتاعها و كانوا بيتترجموا خطابات الرئيس اوباما ترجمة
فورية و متريين علي الكورن فليكس المستورد kellogg's مبياكلوش غيره و ب
... skimmed milk

= طيب تمام احنا بقي عندنا في المدرسة المدرسين في منهم كانوا بيدرسوا للامير
ويليم في قصر باكينجهام و شوية منهم كانوا بيدرسوا لهاربر بنت ديشيد بيكهام في
البيت ... الاكسنت بتاعتهم وهم الوهم الصراحة حتي اخو خديجة الكبير لقط منهم
بقي fluent ع الاخر .. بقي بيتكلم في البيت عربي مكسر ربنا يحميه

- احنا عندنا بنات شيرين و اصالة في المدرسة

= و احنا عندنا بنات عمرو دياب و شريف منير

- احنا عندنا summer camp في سويسرا

= و احنا عندنا رحلة لژحل و عطاردي في الشتا ان شاء الله

- التيتشرز و الاستنت كلهم native

= البواب عندنا double nationality "

.. British italian

- اليونيفورم بتاعنا رالف لورين

= بتاعنا من تصميم ايلي صعب للبنات و للولاد روبرتو كافالي

- فتحوا استاد جوه المدرسة

= هيعملوا كاس العالم الجاي عندنا في البلاي جراوند

- بيوزعو علي الولاد soft drinks و fresh juices مرتين في اليوم

= احنا السكول ultra all inclusive with snacks

= بندفع المصاريف بالدولار

- بندفع نصهم يورو و نصهم فصوص الماظ حر بنشتره من البرازيل ..
- = مدرسين الفرينش بييجوا يدوهم الحصة و يسافروا فرنسا تاني كل يوم
- مدرسين الفرينش عندنا شاركوا في الحملة الفرنسية بنفسهم
- الكانتين كله حاجات imported
- = عندنا بيسفروهم في الويك اند يجيبوا حاجتهم من هارودز و يرجعو
- = بيقدمولهم في البريك saumon fumé و lobsters
- بييجولهم الاكل بالطيارة من باريس و المياه معدنية من جبال الالب ..
- = عندنا اللي بيدرب الولاد كرة مانويل جوزيه
- و احنا اللي بيدربهم جوزية مورينيو
- = البروم بتاعنا عملوه في rixos العلمين اللي اليوم فيه ب ٢٠ الف جنية
- و احنا هنعمله في جزيرة لانكاوي و هناخد اوتيل من بابه
- = جابولنا عمرو دياب و تامر حسني
- جابولنا شاكير و بتاع ديسباسيتو
- = مدرسة الموسيقى rihanna
- عندنا سيلين ديون و الاحياطي بتاعتها JLO
- = الالماني بيدهولهم المان من معهد جوته
- الالماني بيديه ابن خالت بنت عمت سلفة اخو هتلر ذات نفسه
- المهم يكون مستوي المدرسة حلو الواحد مش يبص علي المظاهر والله
- = طبعا مصلاحتهم اهم حاجة .. هو احنا هنعمل زي المحدثين اللي بيتنظروا علي بعضهم بالمدارس !! اديهم يتعلموا و خلاص .

تبات نار تصبح رماد

لو شدّيتي مع جوزك وقالك مش عايز يتناقش في أي حاجة دلوقتي.. وحسيتي فعلاً إن الكلام جاب نتيجة عكسية والموضوع عمال يكبر.. وقّفوا كلام واستنوا لما تهدوا إنتوا الاتنين، هتلاقي طريقة نقاشكم أحسن والدنيا هديت ..

إحنا كستات ساعات كتير بنصر نتكلم دلوقتي وحالا يا إما مش هنتكلم تاني، مع إن اللهوجة والتسرع ده عمره ما جاب إلا مشاكل أكثر ..
ساعات الانسحاب المؤقت وقت المشكلة بيكون ٨٠٪ من حل المشكلة مهما كان حجمها ..

الكلام وقت العصبية بيوجب غلط وندم وزعل أكبر من الحاجة اللي إنتوا زعلانين عليها أصلاً ...

لو طرف حاسس إنه لازم يسكت ويفصل عشان تقدرؤا تفكروا في حل للمشكلة احتراموا قراره..

الدنيا ياما بيحصل فيها مواقف بنفتكر إنها استحالة تمر بسلام، بس بتعدّي لما بنمسك نفسنا ساعة العصبية عشان نمنع حدوث مشاكل أكبر لو كنا اتكلمنا فيها وإحنا الغضب مالينا ..

في متجوزين كتير للأسف وصل الموضوع بينهم للطلاق بسبب إن موضوع بسيط تصاعد بينهم، وهما متعصبين وبدأوا يغلطوا جامد ولما بيتسألوا إزاي وصلوا لكده يقولوك والله ما نعرف كل ه حصل إزاي ..

وعن أبي هريرة رضي الله عنه، أن رجلاً قال للنبي صلى الله عليه وسلم، قال :

"أوصني, فقال عليه الصلاة والسلام: لا تغضب, فردد مرارًا, قال: لا تغضب"
صدق رسول الله صلى الله عليه وسلم ..

قرارات الغضب غلط وقرارات العصبية غلط.. استغفروا ربنا وفكروا كويس
واهدوا وحلوا المشاكل بينكوا وبين شريك حياتكم ومتدخلوش بينكوا حد تاني ..
ساعات كثير الانسحاب المؤقت يبقى نص الجدعنة عشان الموضوع يتلّم



"أنت أم... إذن إنت بطلة"

إوعى تخجلي من إنك "ربة منزل" أو إنك بالإنجليزي Stay at home
...mother

ما تقوليهاش وانت وشك في الأرض!!! إوعى ..

إوعى تسمحي لحد يقلل من عظمة دورك ..

أنا كلامي مفهوش أي تقليل للأم العاملة ..

بالعكس كل التقدير والاحترام.. للأم اللي بتقدر توفق بين بيتها وشغلها وبتيجي

على نفسها عشان توازن بينهم... لأن حلها الوحيد إنها هتيجي على نفسها ..

في أمهات ظروفها بتضطرها للشغل وربنا يعيننا جميعًا في الحياة الصعبة دي ...

بس دلوقتي أنا برد على أسئلة كثير بتجيلي: "أنا سبت شغلي عشان ولادي

محتاجني... والناس بتقولي إوعي وإزاي تقدي في البيت... إنت كده بتضيي كل حاجة.. هو أنا كده غلط؟"

أو"أنا قررت أقعد مع ولادي لحد ما يكبروا شوية وكل اللي حواليا محسني إني ما ليش دور، اعمل إيه؟! "

أنا كده غلط واللا صح؟

عشان كده عايزه أقول لكل الأمهات :

" اختاروا اللي يريحكوا... اختاروا الأنسب والأفضل لولادكم... اختاروا اللي يناسب ظروفكم... محدش عالم بحالكم قدم "

لو مشيتوا ورا كلام الناس عمركو ما هتوصلوا لحاجة ...

الناس لا بيعجبها اللي بتشتغل وموفقة بين بيتها وشغلها ..

ولا بيعجبها اللي اختارت ولادها وبيتها وأخرت خطوة الشغل شوية لحدّ ما يكبروا

..

كده كده بينتقدوا ..

في أمهات كثير ما شاء الله معاهم أعلى الشهادات، وممكن يكونوا محضرين ماجستير ودكتوراه، بس اختاروا بمحض إرادتهم يتفرغوا لولادهم لفترة وهما صغيرين عشان محتاجينهم.... فامش معنى كده نعاملهم إنهم مجانيين إنهم اختاروا يقعدوا في البيت لأي سبب يخصهم...!!

الأم اللي قاعدة في البيت بتعمل كثير... بتعمل حاجات في منتهى الأهمية ... بتربي وبتكبر وبتشارك ولادها في كل تفاصيلهم ومش عايزة حدّ غيرها يريهم أو يشكل سلوكهم ..

إنك تتكلمي مع ولادك في كل حاجة وتسمعهم لما يحكولك أي حاجة حتى لو

كانت عبيطة بالنسباك، فهي حدث مهم بالنسبالم مش حاجة هبلة ..
إنك تهتمى بأكلهم وتتابعى مستواهم الدراسي، ومش كل كلامك معاهم اسكتى
واسكت وأنا راجعة تعبانة ومش عايزة حس، فا دي مش حاجة عبيطة والشغل
أهم منها زي ما بيقولوك ...

إنك تعيشي معاهم كل لحظة في سنهم، وما تسيبيهم مش يعيشوها لوحدهم فا دي
رسالتك في الحياة ..

قعدتك في البيت مش عبط منك.. ده اختيار وألويات.. وكل شخص حر في
ألوياته ..

في أمهات بتعرف تاخذ بالها من شغلها وبيتها وولادها سوا.. وما يقصّروش في
حق ولادهم وبيتعمّدوا يعوّضوهم عن ساعات غيابهم عنهم بالحب والاهتمام ...
وفي أمهات تقولك صاحب بالين كداب... مش هقدر... "رحم الله امرأ عرف قدر
نفسه" ...

ده ما يعيبش أي حدّ فيكوا

في أمهات بتشتغل وعارفين يمشوا الحياة صح.. بيشتغلوا ومحافظين على ولادهم
وعلاقتهم بيهم، ومش بيخلوا حدّ تاني يريهم بداهم ..
والأمهات دول بيقوموا بدور بطولي إنهم يقدروا يشتغلوا وما يجوش على ولادهم في
أي شيء ...

برغم تعب اليوم بيلاعبوهم ويحضنوهم وبيشاركوهم كل حاجة، وده طبعا مش سهل
خالص وياخذ منهم مجهود خرافي ...

في أمهات لو قعدت في البيت نفسيتها بتتأثر بالسلب وولادها يتأثروا معاها ...
وفي أمهات لو اشتغلت واتعرضت لضغط بتأثر سلبيًا على بيتها

عشان كده كل شخص وليه ظروفه اللي بيحدد عليها اختياره ..
الأم العاملة لها مناكل التقدير، إنها موفقة بين بيتها وأولادها وشغلها، ومش من
حق حدّ يحاسبها ..
وربة البيت لها مناكل التقدير، إنها اختارت بيتها وكل واحد ليه أولوياته اللي لازم
تُحترم، ومش من حق حدّ يحاسبها ..
ما تتكسفوش من أي اختيار أو قرار مناسب ليكوا عشان كلام الناس ..
أنا ركزت على ربة المنزل لأن في ناس كتير في المجتمع بتهمش دورها وبتحسسها إنها
مش فعّالة، عشان مش بتشتغل كمهندسة أو طبيبة أو مدرسة.. أو.... أو.....
والأمهات بتحسّ إنها كده دفنت نفسها بالحيا ..
وأنا أويد جدّا إن الست يكون ليها الكيان اللي بتحلم بيه.. اللي شايفه إنه بيتحقق
جوّه البيت أو بالشغل ..

بس أرجوكوا لما حدّ يقولك إيه ده إتي مهندسة وسبتي شغلك واللا إتي إزاي
تضحى بمركزك في الشركة الفلانية أو بمرتبك الوهمي اللي كنتي بتاخديه.. أرجوكوا
إوعوا تتكسفوا وانتوا بتقولوا أنا قررت أقعد في البيت ..
إوعوا تبرروا للناس كإنكم متهمين !!..
ما تسمحيش لحد يقولك دماغك صدّت من قعدة البيت، واللا إيش فهمك في
كذا !!!

إتي رافضة شغل بألوفات بمزاجك، مش لعيب فيكي
قولوها وبكل فخر وانتوا متأكدين إنكم بتعملوا أعظم حاجة ممكن أم تعملها لأولادها،
خصوصًا وهما لسه في أول سنين حياتهم ومحتاجين حنانك وعطفك ورعايتك
وتربيتك ليهم ..

محدّش هيريهم زيك سواء إتي بتشتغلي أو قاعدة في البيت ولا حدّ هيخاف عليهم
زيك.. تأكدي من كده..

..



دكاترة الشفوي

تطبيق مكتبة كتب مجانية
متوفر على جوجل بلاي

- اسمك إيه؟

* محمد عبد الرحمن.

- بتحب مادتي يا محمد؟

* هااا!!! اه طبعا يا دكتور..

- أنت كداب يا محمد، لو كنت قولت لأ كنت هديك الدرجة النهائية، بس بدال د

أنت بتحبها تعالالي بقي ...

* والله بحبها..

- طيب، كنت بتحضرلي محاضرات؟

* اه طبعا يا دكتور..

- وكمان بتقول طبعا... طيب طلعي نفسك من الصورة دي..

* صورة

- وتغيب ليه يوم محاضرتي!!! المرض ما بيحلاش غير يوم محاضرة دكتور ضرغام!!!

تلاقيك كنت بتاخذ درس يا واطي!

* معلش يا دكتور آسف.. بس والله كنت تعبان..

- طيب مذاكر كويس؟ يا اللي بتاخذ درس مع المعيد السيكي ميكي !!

* آه، إن شاء الله..

- طيب اسمي الثلاثي إيه؟ ضرغام إيه؟

* ضرغام حسونة..

- الثلاثي يا حبيبي ...

* معرفش والله..

* عيب والله العظيم!!! إزاي بدرّسك شهرين ومتعرفش اسمي الثلاثي؟ هخصلك
5 درجات لجهلك و5 درجات حضور..

- طيب، أول حرف طيب!

* أنا بلعب معاك!! اسمي ضرغام حسونة أبو عجوة النجاوي.... صعبة دي؟!!!!
واللا حافظ بس اسم السيكي ميكي..

- طيب، اسألني أي سؤال في المنهج هرد عليه..

* مش إنت اللي تقولي أسألك إيه يا بيه!!!! طلعي نفسك من الفيديو ده كده!
- أنا أهووو..

* مش باين!! كنت قاعد آخر صف ليه؟ ما أول صف فاضي!!!

واللا المعيد بتاع الدرس منبه عليك تحضري ورا.... وقولي هنا إنت كنت بتكلم
اللي جنبك ليه!!!! خصم 5 درجات عدم انضباط..

- حرام والله يا دكتور..

* كمان بتقولي حرام!! حُرمت عليك عيشتك يا فاشل... طيب قولي يوم إيه كانت
المرة الوحيدة اللي اعتذرت عن المحاضرة وسبب الاعتذار كان إيه؟

- والله ما فاكّر، أنا هرکز كمان في أيام حضرتك اسألني في المنهج أي سؤال والله
مذاكر كويس..










* ما تركز يا حبيبي... ورا جناب عظمتك إيه!!!! بس عامة ماشي يا عم الفكافة....
قولي من غير ما تفكر بقي....

تعرف تقول "أرنبنا في منور أنور وأرنب أنور في منورنا" 50 مرة!
- إيه ده يا دكتور ...

* طب بلاش قوول: "بطتنا نطت على بطن بطتم، تقدر بطتم تنط على بطن
بطتنا، زي ما بطتنا نطت على بطن بطتم"

- بطتنا نطت على بطة بطتكوا ...

* غلط... صيبييفر... غور يا واد من وشي... مش عارف أي حاجة وولا
بتحضر وحالتك بالبالا... وفي الآخر يقولوا دكتور ضرغام مفترى وبيتلكك
للطلبة!!! بلا قرف ...

دخّلو الحمار اللي بعده اللي هياخذ الصفر... خلونا نقفل اللجنة ...   
     

#من_الإنبوكس

"حكاية بنات كثير"

تطبيق مكتبة كتب مجانية
متوفر على جوجل بلاي

أنا دكتورة في أوائل الثلاثينات.. من صغري وأنا متفوقة جدًا وتفوقي كان يبهر كل اللي حوليا.. كل الناس بتحسد أبويا وأمي على طفلة زي.. مش لعبية... بتذاكر لوحدها... بتسمع الكلام... هادية.. كل المدرسات بيحبوها..
كان كل أطفال العيلة مش بيحبوني عشان كُنت المثل اللي بيتقَطّموا بسببه ...
" شايف فلانة شاطرة إزاي... اععمل زيها يا خايب "

واستمر شغفي بالتعليم لحد ما جت ٩٩٪ في الثانوية العامة وكعادتنا كمصريين المجموع ده خسارة يضيع في أي كلية، لازم تدخل ط ب ...
أنا عمري ما كنت شخصية متمرّدة، بحب أرضي أبويا وأمي لأقصى حدّ عشان ياما تعبوا عشاني ..

دخلت الكلية ورتّبت على الدفعة وبقيت ستاف جامعة ...

لحدّ هنا هتقولولي المشكلة فين؟

أُكيد إنتوا توقعتموها "قطر الجواز "

تحوّلت نظرات قرايبي من الانبهار بالتفوق العلمي للتعجب والاندھاش "هي إزاي متجوزتش لحد دلوقتي؟!!"

حتى نظرات أبويا وأمي اللي فضلت كثير بتحاول تخبي قلقها على عنوستي، بس عنيم بقت فضحاهم !

أبويا تجاوز الستين وأمي في نص الستينات، واللي فاضل في العمر مش قدّ اللي راح !!

والعجبية إن مكانش في حدّ بيخبط على بابنا، إلا نادراً ولو حدّ جه وبنبدأ نقعد سوا فا النتيجة إننا مش بنرتاح إحنا الاتنين، وكان الموضوع ينتهي بسرعة جدًا ...

لدرجة بتخوّف أبويا وأمي أكثر وأكثر!

انجرفت أكثر في الدراسة وتعمّقت أكثر واثقمتلي كذا حدّ مرة واحدة فإمي قالتلي
العقدة شكلها هتتفك !

اللي يعتذر عشان أنا طموحة..

واللي يعتذر عشان خايف أشوف نفسي عليه عشان معايا الدكتوراه ..

واللي يقول عايز واحدة أحلى..

واللي عايزني أقعد في البيت وخلص !!

واللي يمشي من غير ما يقول سبب!

مش هكذب عليكم أكتأبت ودبلت وخسّيت بشكل رهيب، وحسّيت إن كل
حياتي اتمحورت حولين "هتجوز إمتي" وباقي حياتي بقت مُهمشة وملهاش أي
لازمة !!

لدرجة إني روحت لدكتور نفسي لأني قفلت على نفسي أكثر من الأول وأنا مش
ناقصة !!

بعد كذا جلسة، وبعد فضفضة كثير، وبعد ساعات كثير من الخلوة مع نفسي
استغربت أنا ليه وصلت لكده !!

فيها إيه لما ربنا ميقاش كاتبلي أتجوز؟

فيها إيه لما رزقي يكون في تعليمي وصحتي وبرّ أهلي وحب الناس والتفوق ونعمة
الستر والعافية !

فيها إيه لما أتوكل على ربنا، وملعون كلام الناس اللي بيضغطنا ويخلينا نتوتر
ونكتئب عشان حاجة لا يايدينا ولا يايدي أي حدّ ...

ملعونة أي نظرة تحسّسك بالنقص مع إنك راضي برزقك ومبسوط وفي نظرتك
لنفسك قانع وبتحمد ربنا !!

وسبحان الله في أثناء رحلتي للتعافي من قرف الناس وضغطهم عليا راسلت جامعة
أجنبية عشان أدرس مجال ثاني في دراستي وتم قبولي الحمد لله ودلوقتي أنا في
الدولة دي... وجبت والدي معايا بعد وفاة أبويا الله يرحمه... عايشة مبسوطه
وراضية وبحقق كل طموحي ومحدّش أبدًا هناك شايفني ناقصة حاجة عشان
متجوزتش لحدّ دلوقتي ...

إوعوا تمشوا ورا كلام الناس ...

إوعوا تدمّروا نفسيتكوا عشان تصنيف غبي الناس بتحطه لغيرها ...

إرضوا برزقكم ونصيبيكم وثقوا إن ربنا هيراضيكم ..

الرزق مش جواز وبس... الرزق حاجات كثير أوي بس للي يفهم !!!

"إلبس عشان نازلين"

نادر ممكن تودينا المول نتمشى شوية..

- = نتمشى، والا هتدبس في حاجات أشتريها؟ إحنا آخر الشهر ويا دوب اللي

معايا هيكفيننا اليومين الفاضلين بالعافية..

- ماشي، وهجيب بس لحمة الشهر عشان بدل جينا هنا منطخش المشوار ثاني،
وهحتاج بس سمنة وسكر وشاي وصابون مواعين وبيض وحلاوة ومربي وزبادي
ولبن..

- = والله ده اللي كنت عامل حسابه!! بقولك معناش ولا مليم!! هاتي الأساسيات
وتعالى!

- حاضر.. متقلقش!

بعد ساعة ونص..

- ألووو... نادر ممكن تجيلي لحظة عند الكاشير؟

- = خبيبيير؟! مش قولتك هاتي الأساسيات..

- ما الأساسيات طلعت ب-١٢٠٠ جنيه، وإنت مديني ٢٠٠ جنيه، فتعالى كمل
الباقي عشان الطابور ورايا طويل والناس بدأت تشتم..

- = أنا جاي عشان أشتم معاهم والله... حسبي الله ونعم الوكيل فيكي يا شيخة..

- إنت بتحسبن عليا!! الرصيد هيخلص اقفل عشان أشترى كارت..

- = يا لهوووووي اشحني ب-10 بس يا نهال، أنا جايلك يخرب بيتك !! نهال

نهال الله يخرب بيتك يا شيخة!



تطبيق مكتبة كتب مجانية

متوفر على جوجل بلاي

"إحنا كبرنا واللّا إيه؟"

- إحنا بلا فخر ال- life goals بتاعتنا بقت تتلخص في :
- كاندي ب- ناكل في مكان فيه كيدز ايريا عشان يلعبوا ويفرهدوا وما يجنوناش .. الهبل..
- ها بي ميل بلعبها الباردة الرخمة..
- نجيب كل تنتوفة عليها إيلسا وسبايدر مان وبات مان وكل الناس السكر دول..
- كاندي تاني .
- إن ابنك ياكل إن شالله ربع سندوتش .
- إنك تروح المول وما يفرّجوش عليك الراجح والجاي..
- إنك ما تناديش عليهم في المحلات عشان يطلعوا من جوه البروفة عشان يلعبوا خلاويص .
- إنهم ما يقولوش عايزين بوتي أول ما تنزلوا من البيت ..
- إنك تقنعهم يصحوا للباص اللي بيزمر بقاله ساعة عشان اتأخروا على المدرسة ..
- إنك تلبّسهم لبسهم أصلاً قبل أي مشوار..
- إننا نشرب بيبسي من غير ما ياخدوا بالهم .
- إن محدّش يضرب أخوه ولا حدّ يغلّس على صاحبه .
- نوديمهم كيدزانيا .
- نرجع بالتوك اللي في راس البنات مش ناقصة .
- نخرجهم من غير ما يتنكدوا وينكدوا علينا .
- نرجع البيت سُلام ومحدّش متعوّر .
- وحلم الحياة بقي إن بعد 20 ساعة لعب وفرهدة يقولوا شكراً ..

- بنزل بيهم أي خروجة عشان نفرهدهم وينامو..
- أي لايف جول تانية إنت حاططها الفترة دي وولادك صغيرين،
اعتبرها بلح ..

"رُبُّوهم مش أكسروهم!"

الطفل الصغير اللي أول ما وعى على الدنيا لقي أهله بيقولوله "يا حمار.... يا غبي.... إنت معندكش مخ.... إنت مقرف... إنت أخيب إخوانك..... "

هيطلع مقتنع إنه حمار وغبي ومتخلف وكله عيوب ..

هيبقى فاقد الثقة في نفسه من غير أي ظروف يتعرض لها وبدون أي ضغوط حياتية ..

هيطلع متوقع الفشل وإنه مكروه من اللي حواليه حتى لو كان متفوق ويحب صحابه ..

إيش حال أبوه وأمه أقرب اتنين ليه في الدنيا بيشتكوا من غبائه ومن قرفه وإن دايما مقارنته بأقرانه بتكون لصالحهم وبقي بيتوقع كده علطول، يبقى هيوجب الثقة بنفسه منين وهيحب نفسه إزاي وهيقتبل أهله من أنهي اتجاه؟

الطفل ده بيبقى كاره للتجمعات وللحياة الاجتماعية ككل..
مش قادر ولا حابب يختلط بأصحابه لأنه متأكد إنه أقل منهم بناءً على كلام أهله
ليه .. اللي هو بالنسبة ليه كلام ثقة للأسف ومفيش بعده كلام!
أهالي كثير بتنسى يعني إيه تربية..

يعني إيه نفسية طفل ..

يعني إيه نشدّ ونرخي ..

أهالي كثير بتنسى إنها خط الدفاع الأول لولادها وإنهم معنى السند والحماية
والضهر ..

إنت أول واحد بتدي لابنك الثقة وبتقول لولادك إنهم مميزين ونعمة كبيرة من عند
ربنا وإن وجودهم بيحلي الحياة مش بينكد عليك عيشتك ..

أهالي كثير مقضياها ضرب وزعيق ومعلقينها على شاعة التربية !!

أهالي كثير بتطلع أطفال متدمرة نفسيًا، بس فرحانة إنهم طوع إيدهم وملهومش

حسّ.. فرحانين بشخطهم فيهم وبصة الرعب في عين ولادهم لما ينادوا عليهم !!!

لا تتعجبوا من انطواء أولادكم ..

لا تتعجبوا من نظرة الانكسار اللي بتشوفوها في عيونهم وبالوقت بتتحول لنظرة

تحدي وعند لكل حاجة من ناحيتكم .

لا تتعجبوا من إنه أول ما يكبر ويفهم اللي عملتوه فيه يبعد عنكم ويقرر يعيش كل

لحظة لوحده حتى لو هو مش قدّ الوحدة دي ..

ما تربوش ولادكم على الإهانة عشان دي مش تربية دي كسرة نفس .. وإنتم أول

ناس هتدفعوا تمها بمجرد ما يكبر ويعاملكم بالتربية اللي ربتوهاله!

"مكالمات البنات"

- في واحدة تتصل بيكي عشان تقطّمك "إيه فينك يا ندلة.. يا واطية..."، يا أي شتية وخلاص.. هي لا عايزة تسأل عليكى ولا إتني وحشتيها، بس كان عندها فائض عُلب وأرف فا قررت تطلعه عليكى..
- واحدة تتصل تشكي همها من أول ثانية في المكالمة لحدّ ما تقفلوا، وعمر ما شكل المكالمة ولا محتواها اتغيرّ من ساعة ما عرفتها... الشكوى والشحفة بيخيموا على أي مكالمة بينكوا..
- واحدة تتصل تقعد تتمّ على كل خلق الله، وتجب في سيرة طوب الأرض وطول مكالمتها إبليس بيرقص عشرة بلدي وبيتمزج من كمية الذنوب اللي بتأخذوها إنتو الاتنين!
- واحدة بتتصل تخزي العين وتقل عطلول.. "مش جوزي خبطه قطر! مش ابني وقعت عليه طاسة الزيت كلها... مش أنا غرقت في الساحل ومت 3 مرات وروحي هي اللي بتتواصل معاكي دلوقتي"
- المصلحجية؛ بتاعة "اللا صحيح... كنت عايزة أسألك على حاجة"، وأصلا لولا الحاجة دي ولا كنتي سمعتي صوتها ولا كانت هتفتكرك أصلا..
- الصامته القامطة... دي بتتكلموا وهي واخدة وضع ال- don't disturb ... بترد بالعافية... مفيش أي تجاوب أو رد فعل لأي حاجة بتحكيها.. ممة جدّا فا بتقفل معاها وتقرري تمسحي نمرتها عطلول..
- الرغبة: دي بتاكل دماغك من أول ما تردي عليها لحدّ ما تقفلوا، وممكن خلال المكالمة تطبخي وتحضري الغدا وتحمّي الولاد وتذاكريهم وهي معاكي على الخط

عادي وغالبًا يكون يا عندها دقائق مجانية يا بتتصل على الماسنجر من نت الشغل ..

- الدّحلاب... شخصية الدّحلاب دي تكلمك عشان تجرّ منك أي معلومة وتدحلبك في الكلام... كل أسئلتها "هااا عملتوا إيه إمبراح؟، هاااا اشتريتي إيه؟ هاااا دفعتي فيه كام؟ هااا جوزك مسافر فين "

- المتسرّبة: بترد عليكي، وهي بتعمل ٥٠٠٠ حاجة فا علطول تديكي إحساس إنها مش فاضياك واقفلي أحسن وبتلاقي في المكلمة صوت خبط ورزح وجلل وورق ونونوة ققط وزنّ عيال وكلكسات عربيات.. عمرك ما هتعرّفي تحددي هي بتهبّب إيه بالظبط، وأي وقت تكلمها فيه بتحسّسك إنه غير مناسب!!

#من_الإنبوكس

"سامحني يا ابني!"

أنا متجوز من ٦ سنوات، وأنا شخص - للأسف - عصبي جدا . كل مشكلتي إني كنت عصبي جدا على أولادي.. ابني الكبير من أول ما تم سنين وأنا كنت بضربه وأتعصب عليه وبعامله إنه كبير وفاهم .. كنت بضربه جامد لو وقع كوباية، كسر طبق، لعب في أوراق شغلي .. ياما مراتي اتخاقت معايا بسبب الموضوع ده، وللأسف كنت بعاند أكثر معرفش

ليه !

كنت فآكر إن التريية هي الضرب بالحزام والمدّ على الرّجل عشان بيتقى مؤدب
ويطلع راجل ..

ابني كان بيكرهني، كان يشوفني يدخل أوضته، وحتى وقت الغدا مكانش ينفع
نتكلم ..

أبويا كان مرييني كده، وأنا افتكرت إن ده الصح..

كنت بقسى على كل ولادي، بس ابني الكبير كنت بخاف عليه أوي، وكنت
شادد عليه بزيادة، مكنتش بسمحله يغلط زي أي حد في سنه.. التلطيش
بالأقلام كان عادي لو عمل غلط، ومراتي كانت بتعيّط علطول عشان بيصعبوا
عليها وخصوصًا ابني الكبير ..

مكانش في بيني وبينه أي حوار غير إني أحاسبه على غلطاته، لا عمري إديتله
مساحة يقرب مني ولا نبقي صحاب ..


في يوم كلموني في الشغل قالولي الحق ابنك خبطته عربية ومات في لحظةا حتى
ملحقوش ينقلوه المستشفى .

روح المكان وصحابي ساندينيّ لقيت ابني على الأرض ومتغطي بجرأيد !!
ابني البكري مات خلاص، مات ومشافش مني غير قساوة وضرب وبهدلة !!
اليوم الوحيد اللي خدته في حضني وأنا رايح أدفنه !!!
أنا مش قادر أوصفلكوا إحساسي، بس ربنا ما يكتبه على حدّ..
من يومها وأنا ببكي ومش بسيد المسجد يمكن ربنا يغفرلي، ويمكن ابني يسامحني..
من يومها وأنا زاهد كل العيشة وبدعي ربنا يريّجني وأروح لابني.. من يومها وأنا
باخذ ولادي في حضني وبحاول أعوضهم عن اللي عملته في أحمد .

ادعولي في الأيام المفترجة دي ربنا يصبرّ قلبي على الوجد ويخلي أحمد يسامحني
وربنا يغفرلي ..

يا ريت إيدي كانت اتقطعت قبل ما كنت مديتها عليك..
يا ريتني كنت أقدر أفديك بعمرى، بس أنت تعيش يا حبيبي يا اللي قطمت
ضهرى بموتك..

إوعوا تضربوا عيالكو أو تهينوهم، ربنا ما يدوقكوا المزار والقهرة اللي أنا فيها يا رب .
التربية عمرها ما كانت إهانة وضرب وتخويف وتجريح، أنا ربنا حسّ إني مش مقدر
النعمة اللي في إيدي وخدها منى، خلوا بالكوا من النعمة اللي في إيديكو قبل فوات
الأوان .

متحرموش نفسكو ولا ولادكو من حضنكم وحبكم، علموهم الصبح والغلط بهداوة،
أنا ابني كنت معقدة طول أيام حياته وأديه راح لى أرحم عليه من أي حدّ 



سامحني يا ابني! ..

أنت كنت فاكّر إني كده برييك والله كنت خايف عليك أكثر من نفسي ..
سامحني!!



تطبيق مكتبة كتب مجانية

متوفر على جوجل بلاي

وكلامه ليا... مش هقدر..

العقل: إنتي اتسابتى يا حمارة عايزة إيه تانى!! إنتي لازم تكرهيه ده واطي.



البطن: ومعاهم ببسي ساقعة مشبرة... يا وعدي

القلب: أنا استحالة هقدر أعيش من غيره..

العقل: أنا مش قادر أصدقك!! تستاهلي تتسايي يا سهلة يا رخيصة.

البطن: طيب أنا هطلب سندوتشين شاورمة سوري.. أعمل حساب حدّ معايا،

واللا هتفضلوا تهرؤا في المهري وتعيطوا علي سي زفت ده طول الليل..

القلب: خليم 4..

العقل: لأ 8 ومتنساش التومية..

البطن: أبو اللي يزعلكوا يا جدعان والله.. أيوه كده هو إحنا بتوع غمّ برضه ثواني

والأورد ر هيجي وينسيكوا اللي جابوه....



تطبيق مكتبة كتب مجانية

متوفر على جوجل بلاي